

JESUS JXKAAHNISAWE'SX DXUS YUWE'S PTA'SXNI

Dxus Espiritu's kaajxa' neeyũni

¹ Jesusa' nyafxte k̄hwa kaapiya'jna k̄jk̄hwa ew yũuk cielute tejkapkaçx txã'sna, Teofxilo, idxna pta'sxna adx libru nyafxte fxi'th. ² Txã' cielun u'jmey, piçthē'jwe'sxtxi txhitxhku jxkaajxa', sa' ma'wēçxah yũuwa'ja'swa kaapiya'kh Dxus Espiritu pu'çxte. ³ Sa' uuniijũ ki' ĩtxi kiiteçxa', nyafxii na'wēyçxáak petx kakwe yã'jçxa txãawe'sxtxi vxyaana ũsu' kuarenta entepkaçx. Txã'wē ĩtxi yuuyuhga sũhna ew jiyukahnu txã'wē vxyaana ũsu', sa' Dxus ma'wē jxkaahwa'ja'swa pta'sxnak ũsu'. ⁴ Sa' cielun u'jya'waçxa', txajx txhitxhnisawe'sx yakh nee ũsí, Jesusa' neewe'wek Jerusalen çxhabuh u'jmée ũskahn na'jĩna:

—Mũyhaswe, adx Tata kaajxa' neeyũuk txã's jxpa'gapkaçx, adx i'kwe'sxtxi pta'sxthu txã'sna. ⁵ I'kwe'sxa' jii i'kwe Juana' naasáa yu'teçxáak akhna bautisaĩ'. Nawa i'kwe'sxa' Dxus Espiritute yuu bautisãyni yuune'kwe jxukaysa ja'daçxah txaçxmeyna jĩnak we'we.

Jesus cielun sxawedni

⁶ Txajũ' Jesus txhitxhnisawe'sxa' txãa yakh ũsçxa', paapējxtxi:

—Ăçxha' idx wáa naa ensu Israelwe'sxtxi romanowe'sx kuseju nwe'wewa'jsane'ga jíte',
⁷ Jesus pasçxa':

—I'kwe'sxa' jiyuwa'jsamée i'kwe Israelwe'sxtxi nwe'wewa'j en bagaçxtewa. Dxus kwe'sx Tata yuuçxáa txã'wě yũuwa'j ena's jiia'.⁸ Nawa Dxus Espiritu kĩhte', txãa yu's jxpa'gawa'jsa yuji'kwe, kĩhtewa jxuka ajaya'. Sa' txã'wě yũunijũ kasehçxa u'jwene'kwe adxa's tuuthe'jya' Jerusalente, Judea kiwesu, vxite' Samaria kiwesu mtee mtee maa kiwetewa jxuka jĩnak jxkaah.

⁹ Txã'wě we'wena jxã'jniijũ txaçxmeyna, txãawe'sx thegna ũsiyna Jesusa' ěete kiisnik yuu cielun pe'jna u'jya'. Naapkaçxha' tãaph kũhçxa aphku, aça' peena yu' vxyaame'.¹⁰ Txã'wě Jesusa's cielun pe'jna u'jweçte', txãawe'sxa' cielute pagayna ũsiyna, e'z piçthě'j ropa çxihmesa athçxa txãawe'sx pukatetx vxya.
¹¹ Txã'wě vxyaaçxa', na'wětx we'we:

—Galileajuwe'sx, çkĩh yuupa'ga cielute pagayna ũskwe? Jesusa' i'kwe'sx ksxavxyuh ma'wě cielun u'jweçtekwe uy, txã'wěyçxáa ki'kin kĩijana txãaíçxáa jĩnatx pta'sx.

Judas pa'gate Matias txhitxhni

¹² Txajũ' thã'j Oliwos yaasesaju u'jtx Jerusalen çxhabna sxawedna. (Txãa Oliwos vxıça' Jerusalen utxak yu' teeçx kilometroçxáak ah jxu'j neeyũ'.)¹³ Jerusalente pa'jçxa', txãawe'sx paadeeni ěe yatte tejkatx Pedro, Jakobo, Juan, Adres, Fxelipe, Tomás, Bartolomé, Mateo, Jakobo Alfxeo nçxi'k, Simon kananista ju'gusa, vxite' Judas Jakobo nyakh txãawe'sxtxi yu'.

¹⁴ Txãawe'sxa' kxteetx tahtatey pkhaakhe' Dxus yakh puutx we'weya' jxukaysa yakh, Jesus nyakhwe'sx vxite' njĩ'j Maria, txã'wěy vxite u'ywe'sx yã'jçxa.

¹⁵ Txãn ensuk Pedro' kxtee pkhaakhesawe'sx ciento weinte ksxavxyte yujuçxa na'jĩ:

¹⁶ —Yakhthě'jwe'sx mjiyuwe: Judas ewmée yũuwa'ja's Davxida' fxi'kh Dxus Espiritu kaaũusuthe'jni's Dxus librute txã' kxtey yuuwa'ja's yuh yu'ne'. Txajĩik Judasa' Jesusa's preesu'jwa'jsatx pe'jna kũhçxa dukh. ¹⁷ Judasa' kwe'sx yakh u'jusak yu', txãasak kwe'sx na'wěy mjĩwa'ja's yu'. ¹⁸ Nawa Jesusa's txweyni vxyuju kiwek wey, sa' kxteek tēekhēe dxiktheju sutenus wete, aça' meetu'ja' jxuka ubuk. ¹⁹ Txajũ' Jerusalentewe'sxa' txã'wě yũuni's jiyuçxa', txãa kiwe's Akéldama yasetx ki'p, txãawe'sx yuwete yu' Ee pkawni kiwe jĩnik yu'. ²⁰ Judas uuwa'ja's we'weçxak Salmo librute na'jĩ':

Txãa yatte u'pwa'ja's kim yuhwa neeyũumeetxna,

Aça' txajx yata' namu ji'phmée peekx neeyũuna jĩ'k.

Vxite ajkhēwa na'wě fxi'jni':

Txajx mjĩwa'ja's vxite tee mjĩ jĩna fxi'jni'.

²¹ Txãa pa'ga kwe'sx ksxavxyte piçthě'j ũsta' kwe'sxtxi jxpe'ja's Jesus makwe txaçxne' kwe'sx yakh ũsu' txagaçxhĩi txutemée pi'kxna u'jusa.

²² Txãawe'sxa' Jesusa's Juan bautisãynijũjx uyya' takhçxa cielun u'phkaçx uysaata' txãatx teeçx txhitxhiga, Jesus ĩtxi yuuni's tuuthe'jna kwe'sx yakh fxi'zewa'ja's jĩk.

²³ Txajū' e'ztxi pakweçxa ki'p, José Barsabás yaasesa's txã'sna íçxáa Justo jĩnatx kxsuusū', vxite' Matiasna. ²⁴ Sa' na'wētx Dxus yakh puutx we'we:

—Idxa' maa maa nasa ũus yaakxni'swa jiiġ. Kwe'sxtxi meen mkhiyu'j naa e'zsatx maaçxahtxga txhitxh, ²⁵ Judas pa'gatewe'sx, na'wē Judas txajx mjīia's nvxihtçxa vxituk txajx pkalpa'ga txāa mjīia's jxpa'gawa'jsa jĩnatx Dxus yakh puutx we'we.

²⁶ Txajū' swerte kahtx kiim yase kasehtewa jiyuya', aça' Matias yasek kaseh. Txajūjx Matiasa' oncesawe'sx yakh utxaak pi'kxna u'juya'.

2

Dxus Espiritu kīini

¹ Pentekostes fxiesta en ähte', jxukaysa kx-teeçxaçxáatx pkhaakheçxa ũsu'. ² Naapkaçxha' cieluju wejxaa wala na'wē susna kīhçxa txāawe'sx ũsni yatte jxuka utak. ³ Naapkaçxha' ipx beeni na'wēsatsx jxukaysa kajkwesu vxyaa. ⁴ Aça' jxukaysa ja'daçxah txāawe'sx ũuste Dxus Espiritu yuuçxaçxáa jxuka khēete', txã'sna jxpa'gaçxa maa nasa we'weni yuwe'swa we'weya' äjatx, Dxus Espiritu maa yuweju we'wewa'ja's jxkaathe' txāaju.

⁵ Txān ensu' Dxus jxkaahni's nwēese'jsa judiuwe'sx maa maa kiwejūwa pa'jçxatx ũsu' Jerusalente. ⁶ Txajū' txāa seena' susni's wēse'jçxa', nasa jxukaysa pkhaakhetx. Sa' txã'wē teeçxsa na'wēçxah txāawe'sx we'weni yuweju we'weni's jiyuçxa', wala kuh yajkxna

neeyũutx ⁷ ¿Ma'wěçxaki'tx txã'wě yũu? sũhna. Sa' txãawe'sx pwe'sx na'jĩnatx puutx paapěyi':

—Na'wě we'wena ũsta' txãawe'sxa' jxukay ¿Galileajũwe'sxmeetxná'? ⁸ Sa' ¿ma'wěçxata nasa iisa kwe'sx yuweju we'weya' aja'? ⁹ Ayte ũstha'w Partiajũwe'sx, Mediajũwe'sx, Elamjũwe'sx, Mesopotamiajũwe'sx, Judeajũwe'sx, Kapadociajũwe'sx, Pontojũwe'sx, Asia kiwejũwe'sx, ¹⁰ Fxrigia vxite' Panfxilia kiwejũwe'sx, Egipto vxite' Afxrika Cirene kiwetewe'sx, txã'wěy Romajũwe'sxwa ayte ũstha'w. Maaí yu' upxhíi judiuwe'sxtha'w, aça' vxite' judiumeeçxawa judiuwe'sx na'wěy Dxus jxkaahni's nwěese'jsa ũstha'w. ¹¹ Txã'wěy Kretajuwe'sx vxite' Arabiajuwe'sxwa ũstha'w. Nawa jxukaysa Dxus yuwe zhiçxkwesa'stha'w wěse'je', kwe'sx we'weni yuweju pta'sxpa'ga jĩ'tx. ¹² Txã'wě yũuni's jxukaysa wala kuh jwed we'wena ũsu'tx na'jĩna:

—¿Kĩh yũuya' txã'wě yuuçki? jĩ'tx. ¹³ Naapkaçxha' vxite yu' açewe'wena npeevxysxijkana na'jĩ'tx:

—Naawe'sxa' vxino pus tudxçxa tũuçxa txã'wě we'wen ũsta' jĩ'tx.

Pedro nyafxçxah nasatx we'weni

¹⁴ Txajũ' Pedro' Jesus jxkaahnisawe'sx oncesa yakh yujuçxa sus we'wena na'jĩk:

—Judeatewe'sx vxite' Jerusalentewe'sx i'kwe'sxa' ew jiyuçxa neeyũuya' ew mwěese'jwe adx pta'sxya'wath txã'sna: ¹⁵ Naa piçthě'jwe'sxa' tũunitxna jĩ'i'kwe nawa txã'wě meeta'. Kusíi las nweweçxá' aça' ¿ma'wě tũuni

yuukxtha'w? ¹⁶ Na'wě yuuk txã' Dxus yuwe pta'sxsa Joel we'wek txãak kxtey yuu. Txã' na'jĩ'k:

¹⁷ Dxus we'weçxa':

Nmeh ensu', adx Espiritu's naa kiwete nasa jxukaysatx makwewa ũsu'nja,

Aça' i'kwe'sx nçxi'k i'kwe'sx niisa txãawe'sxa' adx yuwe's pta'sxixna.

Naapkaçxha' piçtakxwe'sxa' cieluju zhiçxkwesa vxyaani's uyuutxna,

Aça' thě'jsawe'sxa' ewsa ksxa'utxna.

¹⁸ Sa' adxa's selpisaawe'sxtxi piçthě'j ma'k yuu meeçxa' u'y ma'k yuu nawa txãawe'sxtxi adx Espiritu's makwewa ũsu'nja, adx yuwe's pta'sxkahn.

¹⁹ Txajũ' cielujũ kim yuhwa uynimeesa zhiçxkwesa kaavxya'ja'ja'nja:

Sa' naa kiwete' ũukhũukhsa kaavxya'ja'ja'nja: ee, ipx wala, aah wala txã'wěsatx.

²⁰ Aça' seka' kus na'wě çxhi'dxina, a'tewa ee na'wě beh yuuna.

Nawa kwe'sxtxi nwe'wesa kīiwa'j en zhiçxkwesa āhmeyna txã'wě yuuna.

²¹ Aça' maawa jxukaysa Dxusa's neewe'wena fxi'zesa' txãa ente' nwe'weni yuutxna jĩ'k.

²² Āçxha' Israelwe'sx mwēese'jwe na'jīya'wath: Jesus Nasarethũwe'sx Dxus kaahnisa i'kwe'sx ksxavxysu kījkihwa ewsaçxaçxáanak kaavxya'ja'j açã'satx nuykatxhina, uusaatx ĩtxĩ vxitna Dxus pu'çxte, Jesukristo' txã'wěk yũu. Txã'wě yũuni's jīiyã'jne'kwe. ²³ Nawa txã'sa' kluuste fxuççxa

ikhkahn i'kwe'sxa' dukhi'kwe nasa ewmeesa kusetē. Txā'wē uuwa'ja's Dxusne' txhitxhçxa nvxiht txāniitey, txāa pa'ga i'kwe txā'wē yūu. ²⁴ Nawa Dxusa' ki' itxi vxitçxa uuníi seena' ũukhũukhsaju kutxi'kh, txāa pa'gatey ikhsa' багаçxtewa uuniiçxāa ji'phuya' yu' ājawa'jsameek yu' naa pa'ga. ²⁵ Jesus uuçxa ki' itxi yuuwa'ja's Davxida' na'jīnak pta'sx:

Adxna jxpe'jsa' багаçxte yuhwa pu'vxitumée adx yakh nesku yu'.

Txā' adx pukate ũsa' paçu ju'gte, kīh yuhnawa ũukhkahmén adxa's nwe'wena.

²⁶ Txāa pa'gak adx ũuste txakwe wala weçweçxa ũusuthe', aça' weçxaawa'j yuuçxá'sthu we'we'.

Txāa pa'ga adx kakwe' ki' itxi kiiteena sūhnaçxāa skhēwu'nja,

²⁷ Txāa pa'gatey idxa' adx ũusa's uusaawe'sx ũsnite nvxihtmeene'ga,

Sa' idxa's selpisāa kakwe'swa suweepkaçx yu' khikhmeene'ga.

²⁸ Pçuwa'jmée itxi ũswa'the pa'jwa'ja's kaapiya'jg,

Sa' iidx ũsnite weçxana ũswa'ja's yuuçxāa ũsune'ga jīna fxi'jni'.

²⁹ Yakthē'jwe'sx ew mjiyuwe: Na'wē kwe'sx yaçgawe'sx Davxid we'wek txā' peekx uuwa'ja'siūçxāa txā'jī'çme'. Txā'wēmeete iūçxāa Davxid uute' pedaatx, aça' txajx kakwe' txkaa ũsa' pedaní āçxpkaçx. ³⁰ Nawa Davxida' Dxus yuwe pta'sxsak yu'. Txāasak jii yu' Dxusa' teeçx ũsya' puutx we'wek txajx ji'thewe'sx txā' Kristok yu' Davxid na'wēy jxkaahwa'jsa txā'snak jii

yu'. ³¹ Kristo uuçxa itxi kiiteeçte uyna üssa na'wêk pta'sx Davxida'. Txãasak na'jî: txajx üusa' uusaawe'sx üsnite neeyüumeena, aç'a' txajx kakwe kha'txwa suweemeena. ³² Davxid we'we'k Jesus txã'snak Dxusa' uuniijüwa ki' itxi vxit, aç'a' kwe'sxa' jxukaysa uysaatha'w, txãasa ew jiitha'w. ³³ Sa' txãa Jesusiik Dxus pukate paçu ju'gte kãhpkaçx pe'jna u'jni yuu. Sa' kxte' Ney üsya' neeyüuk txajx Espiritu's txã'sa' jxpa'gaçxak txãa Espiritu's kwe'sxtxi makwewa üs. Aç'a' txã'si'kwe i'kwe'sxa' jxuka uyna wêse'j. ³⁴ Davxid txã'wê cielute tejcame', txajîik Davxidíiwa na'jî':

Dxusa' adxna jxpe'jsa's na'jîk:

Adx pukate paçu ju'gte mkaaçx,

³⁵ Idxna açesatx idxçxaçxá's nwêese'jwa'ja's vxitna jxã'phkaçx jîk.

³⁶ Israelwe'sx jxukaysa ew mjiyuwe: Naa Jesusa's i'kwe'sxa' kluuste kaafxuç'u'ji'kwe txã'snak Dxusa' Kristo jxkaahwa'jsa vxit.

³⁷ Txã'jîna pta'sxte wêse'jçxa', üuste wala nxus yajkxtxi. Sa' Pedrowe'sxtxi pêjxtxi:

—Yakhthê'jwe'sx, açxha' çma'wê yüukxtha'w? jîte', ³⁸ Pedro paççxa':

—I'kwe'sx pkaltxi nvxihtçxa, Dxus tasxte misxawedwe, sa' Jesukristo's üuste jxpa'gaçxa yu'tewa ya'bautisâywe, kxah i'kwe'sx pkaltxi peltunâyni yuuna. Txã'wê yüute', i'kwe'sxtxiwa Dxusa' txajx Espiritu's üsuna. ³⁹ Txãa pa'gatey Dxusa' txajx Espiritu's üsya' neeyüuk txã' i'kwe'sx jîi petx i'kwe'sx luuçx jîi yã'jçxa', sa' maazkuêesa majüwe'sxwa üstxna Dxus pa'yanisa txãawe'sxwa jxpa'gatxna jî'k.

40 Txã'wě we'wena wala yu'kxpejk Pedro' na'jĩna:

—Nasa ewmeesa ksxavxyte jxpubana fxi'zemée Dxus tasxte mutxaawe ewte neeyũuya' jĩnak pta'sx. ⁴¹ Aça' Pedro pta'sxni's nwēese'jçxa yu'te ya'bautisãytxi. Txãa ente' tekh mil ähtx Kristo's jxpa'ga. ⁴² Sa' Pedrowe'sx kaapiya'jni's piyaçxa', jxukaysa Dxusa's çxhãçxha yajkxnatx neeyũu. Sa' txutemée kxteeçxahtx pkhaakhena fxi'ze', Dxus yakh puutx we'wena, ũ'wa'ja'swa kxteeçxah ũ'na.

Puutx kxteeçxah ewçxáa fxi'zeni

⁴³ Txajũ' nasa jxukaysa wala kuh yajkxna ũsu'tx, naapkaçxha' Pedrowe'sxa' äça'satx nuykatxhina kim yuhwa äjanimeesa'swa kaavxya'ja'jnatx ũsu'. ⁴⁴ Jxukaysa Kristo's jxpa'gasa' txutemeetx kxteeçxah fxi'ze', sa' kĩh ji'phuni'swa ja'daçxaçxáatx puutx peesu'sna fxi'ze'. ⁴⁵ Sa' txãawe'sx ji'phuni's txweyçxa vxyu's kxteeçxah pkhakhçxatx peejĩna fxi'zesatx peesu' txãawe'sx peejini's pu'çxna. ⁴⁶ Een isatx dxuus yatte pkhaakhe', sa' ũ'wa'ja's yu' yat iisatx pi'ki' ũusuh jxuka weçxana, ⁴⁷ sa' Dxusnawa txã'wěy weçxana. Txã'wě yũute', nasa' txãawe'sxtxi' wala ew we'we'tx. Aça' Dxusa' een isak txajx luuçxtxi' nuypehnana u'jwe' ewte neeyũuwa'jsatx.

3

U'juya' äjãsamée dxuus yat vxitxte katxhini

¹ Teeçx ente' Pedro Juan yakhtxi dxuus yatte kũjuç yu', kusuçte las treste Dxus yakh puutx

we'wewa'j orate. ² Kxte' teeçx piçthē'j up-xhíi çxida puuple u'juya' ājasameek u'p yu'. Txā'sa' een isatx yakhna kūhçxa dxuus yat Vxixt Zhixkwesa jīnisa pukate ki'pu' kxtee nasa u'kasatx lmusxnu pe'wna u'pkahn. ³ Txāa puuple' Pedro Juan yakh dxuus yatte u'kaya' kūjuçte uyçxa', lmusxnu thāasku. ⁴ Aça' Pedrowe'sxa' txāa puuple dxi'pte ew thegçxa', Pedro' na'jīk:

—Mtheg kwe'sxtxi jīte', ⁵ txāa puuple' çkīh peesya'watxki? sūhna ewku txāawe'sx dxi'pte theg. ⁶ Aça' Pedro we'weçxa':

—Vxyu yu' kīh yuhwa ji'phmeeth. Nawa adx ji'pthu txā'sçxáawa peesu'nja: Jesukristo Nasarethūwe'sx idxa's āçxhíi nuykatxhina aça' kiiteçxa ew mneeyūu jīna'wa, ⁷ Pedro' paçu kusete uwena' pu'kisku, aça' naa dudtey fxiðxa' ku'lete', çxida' jxuka ewtxi neeyūu. ⁸ Txajū' txāa āça'sa' ūphçxak kiite, sa' u'juya' ājaçxa txāawe'sx yakhíi dxuus yatte u'kak, ūphūuphna Dxusna weçxana tuuthe'jna. ⁹ Txajū' txāa çxida puuple' txā'wē ūphūuphna Dxusna weçxana yuute nasa jxukaysa uyçxa', kuh yajxna ūukhtxi. ¹⁰ Txāa nasa' çxida puuple's jīitx yu' txā'wē dxuus yat Vxixt Zhixkwesa jīnisa pukate kaçxçxa lmusxnu thāasna u'psate.

Dxus yuwe's Pedro pta'sxni

¹¹ Çxida puuple u'juya' ājasameeçxawa katxhiyā'jçxa', Pedrowe'sxtxi uweçxa txhweetemée u'jute', nasa jxukaysa wala kuh yajxna Pedrowe'sxtxi thegya' seena' wala kuh pkhaakhetx dxuus yat pwa' Salomon jīi jī'tx kxtee. ¹² Txā'wē nasa pkhaakhetē', Pedro' na'jīk:

—Israelwe'sx, ¿kĩh yuupa'gakwe i'kwe'sxa' txã'wẽ ũukh we'wena kuh yaaki'? Naa piçthẽ'ja's kwe'sx txã'wẽ Dxus na'wẽ nuykatx-hiçxa ew u'juwa'ja's peesuçthas i'kwe yajkxna kwe'sxtxi thegu'. ¹³ Mwëese'jwe: Kwe'sx yaçgawe'sx Abrahan, Isaak, Jakob txãawe'sx Dxusa' txajx Nçxi'k Jesusa's cielute seena' jx-tuhthesa vxitku na'wẽ i'kwe'sx yu' ahçeçxa jxkaahsa Pilato kusete dukhi'kwe. Aça' Pilato yu' txhweeteya' yajkxtewa, i'kwe'sx yu' kaatxhweete'jmée i'kwe, ¹⁴ wejxwa kĩhwa yu-uwemeesa', mitxhwete jĩpkaçxte, i'kwe'sx yu' teeçx piçthẽ'j wala yuuwesa ewmeesaçxá's i'kwe txhweete kaah. ¹⁵ Txã'wẽ yũuçxa i'kwe'sxa' Jesus itxi kaafxi'ze'jwa'jsa yu'sa' kiikhe'ji'kwe. Nawa Dxusa' txã'sa' ki' itxi vxitni's kwe'sxa' uysaatha'w, txãasa jiitha'w. ¹⁶ Txãasatha'w Jesusa' nuykatxhina sũhçxa txajx yase's kxsusna pi'kx, naa piçthẽ'j i'kwe'sx jiyunisa's nuykatx-hikahn. Txãa Jesus nuykatxhipa'ga yuuçxáa naa piçthẽ'ja' jxuka ew katxhite', i'kwe'sx jxukaysa uyna ũsi'kwe.

¹⁷ Yakthẽ'jwe'sx, txã'wẽ yũui'kwe nawa jiimeeçxane'kwe txã'wẽ yũu sũju'th, txã'wẽy jxkaahsawe'sxwa jiimeene'ta yu'. ¹⁸ Nawa i'kwe'sx txã'wẽ yũuwa'ja's Dxusa' yaçtey pta'sxku txajx yuwee pta'sxsawe'sxtxi na'jĩna: Kristo' wala pxthaa pa'ga yuuna jĩna aça' txã' kxtey yuukahn i'kwe txã'wẽ ikh. ¹⁹ Txã'wẽ yũupa'ga Dxus tasxte sxawedçxa i'kwe'sx pkalpa'ga perdon mpějxwe txãa pkaltxi khũkhni yuuya'. Txã'wẽ yũuçxa' weçxana ũswa'j ena's ji'phune'kwe, ²⁰ Dxus kaahni Kristo Jesus

jxkaajxa' kĩhte. Txã' i'kwe'sxtxi ew yũuwa'jsa' jĩnik yu' txãníi entey. ²¹ Ãçxhíi yu' Jesukristo' cieluteçxáa ũswa'jsa', Dxus naa kiwete kĩhnawa jxuka pheu'phkaçx. Nyafx entey Dxus yuwe pta'sxsawe'sx txã'wẽtx Kristo' naa kiwete jxkaajxa' kĩiwa'jsa' jĩna pta'sx naa pa'ga txã' kxtey yuuna. ²² Txã'wẽy Moiseswa na'jĩk: Dxusa' i'kwe'sx jĩ teeçx kaajxa'wa' i'kwe'sx ji'thewe'sx txajx yuwe's pta'sxwa'jsa, adxa's ma'wẽga kaah txã'wẽy. Txã's mwẽese'jwe, ma'wẽ jxkaathewa jxuka kxtey yuuna. ²³ Txã'wẽme', maawa Dxus yuwe pta'sxsa's nwẽese'jsame', Israelwe'sx tasxuh txudeni neeyũuçxa jxukaysa vxituwa'tha' jĩk.

²⁴ Ew mjiyuwe: Dxus yuwe pta'sxsa Samwel fxi'zenijũjxwe'sx jxukaysatx ãçxh naa ensu Kristo kĩiwa'ja'sçxaçxáa we'wena pta'sx. ²⁵ Aça' i'kwe'sxa' Dxus yuwe pta'sxsawe'sx ji'jĩkwe, sa' txã'wẽy Dxusa' txãniitey Abrahan yakhwa puutx we'wek i'kwe'sxtxi ew yũuwa'ja's na'jĩna: Naa kiwete nasa' jxukaysa bediciona's jxpa'gatxna iidx ji'j pa'gate jĩna we'wek txã'snawa jxpa'gasai'kwe. ²⁶ Txajíik Dxusa' txajx Nçxi'ka's nyafxte' i'kwe'sx tasxte khuẽ'yku kaah i'kwe'sxtxi nwe'wekahn, kxah i'kwe'sxa' teeçxsa na'wẽçxah ewmée yũuni's nvxiitkahnku txã'wẽ yũu jĩk.

4

Pedro Juan yakh judiu npiĩthẽ'jwe'sx tasxte kuutxa'jni

1 Pedro Juan yakh nasatx we'wena ũsiyna, sacerdotewe'sx vxite' dxuus yatte thegsawe'sx npiiçthê'j vxite' saduceo txãawe'sx pa'jtx tud-ya'. 2 Txã'wê Jesuswa ma'wêga îtxi yuu txã'wêy uusaawe'sxwa îtxi yuuwa'ja' jîna Pedrowe'sxa' nasatx kaapiya'jna ũste jiyuçxatx wala ũusaçxana pa'jçxa, 3 preesu'jçxa karcelte kxuuph kuskuuspkaçx, kusuçyã'kh yu' naa pa'ga. 4 Nawa Pedrowe'sx pta'sxni's wêse'jçxa Kristo's jxpa'gasa yu' seena' wala kuh yu'tx, piçthê'jçxáatx isani cinko miltxi yu'.

5 Kuskuus enkhê' judiwe'sx npiiçthê'jwe'sx vxite' judiu nthê'jsawe'sx vxite' Dxus ley kaapiya'jsa 6 vxite' sacerdote npiiçthê'j Anas vxite' Kaifxas, Juan, Alejandro vxite' jxukaysa sacerdote npiiçthê'j nwe'sxwa pkhaakhetx Jerusalente. 7 Sa' Pedrowe'sxtxi pe'jya' kaahçxa txãawe'sx ksxavxyte txahçxa paapêjxtxi:

—¿Kim pu'çxtekwe na'wê yũuya' âja'? meeçxawa ¿kinga jxkaah? jîte', 8 Pedro' txajx ũuste Dxus Espiritu's jxuka ji'phçxa', na'wêk pas:

—Judiu npiiçthê'jwe'sx, Israel nthê'jsawe'sx: 9 I'kwe'sxa' paapêyi'i'kwe kwe'sx ma'wê yũuçxa naa âça'sa's nuykatxhitewa jiyuya'. 10 Aça' i'kwe'sx dxi'pte teehwed âate pta'sxiçtha'w, kxah Israelwe'sx jxuka jiyutxna. Naa piçthê'j ayte i'kwe'sx dxi'pte ũsa' txã' Jesukristo Nasarethũwe'sx nuykatxhini ũsa'. Txãa Jesukristo's i'kwe'sxa' kluuste kaafxuçu'ji'kwe, nawa Dxusa' uuniijũ ki' îtxi vxitku. 11 Txãa Jesusa's i'kwe'sxa' ahçei'kwe yat txaahsawe'sxwa ma'wêta: Naa kweta' selpime' jîçxa wãatahtewa

txãafi wejx selpisáa yuu txã'wěysak yu'. ¹² Kim yuhwa txãa na'wěy nasatx nwe'weya' ãjawa'jsa yu' meea' naa kiwete, naasáa Dxus kaahni Jesus yuuçxáa kwe'sxtxi nwe'wewa'jsa' jík Pedro'.

¹³ Pedrowe'sxa' kim yakh yuhwa piyana ùssamée naasáa Jesus yakh yuuçxáa piyana u'jusaçxawa weh yuhwa ùkhna sxiigmée we'wete', judiutx jxkaahsawe'sx wěse'jçxa' kuhtx yajkx. ¹⁴ Txãapkaçxha' katxhisa piçthē'ja' txãawe'sx yakh ijk ũsu', aça' ewmée yūuna ũsi'kwe jīya' ãjameeta'. ¹⁵ Txajū' Pedrowe'sxtxi' eka kaseh kahtx txãawe'sx pwe'sxçxáa puutx we'weya'. ¹⁶ Sa' na'wětx puutx we'we:

—¿Kīh yūukxtha'w naa e'z piçthē'jwe'sxtxi'? Txãawe'sxa' naa ãça'sa's txã'wě nuykatxhini's maa maawa Jerusalentewe'sx jxuka jīta', aça' kwe'sxa' txã'wě nuykatxhimeeta' jīya' ãjame'nja'w. ¹⁷ Nawa mtee mteewa nasatx jwee tuuthe'khamen juuna' we'we'nja'w, kxah peena yu' Jesus kaapiya'jni's pta'sxmeetxna jīçxa', ¹⁸ Pedrowe'sxtxi' ki' pa'yaçxa, wala juuna' we'wētx:

—Ãçxha' peena yu' bagaçxte yuhwa Jesus kaapiya'jni's kaapiya'jmeene'kwe jīte', ¹⁹ Pedrowe'sxa' na'wětx pas:

—I'kwe'sx ũus mīiyajkxwe. ¿I'kwe'sx jxkaahniçxá's nwěese'jçxa', Dxus jxkaahni yu'sa' nwěese'jmeete wáa ewna? ²⁰ Kījkīhwa kwe'sx yafxju yuu uyna wěse'jna yuuni's weh yuhwa sxuuna' yuuya' ãjame'nja'w jīte', ²¹ judiutx jxkaahsawe'sxa' ma'wě yuhwa kaapeçxukwe'jya' ãjameeçxa', juuna' we'weçxaçxáa kaatxhweete'jtx. Txã'wěme',

nasa' jxukay Dxusçxáanatx tuuthe'jna ũsu' txã'wẽ ãça'sa katxhipa'ga. ²² Txãa katxhisa' kuarenta anxu jxthaakwek ji'phu'.

Dxus yuwe's ũukhmée pta'sxwa'ja's pēyni

²³ Txajũ' Pedrowe'sxa' txhweetení yuuçxa', u'jtx txãawe'sxtxi pi'kxna u'jusawe'sx tasxna. Kxte pa'jçxa', jxuka pta'sxtxi judiutx jxkaah-sawe'sx ma'wẽ we'wete txã'wẽy. ²⁴ Aça' txã'jĩni's wẽse'jçxa', jxukaysa Dxus yakh na'jĩnatx puutx we'we:

—Cielu, kiwe, ĩkh wala, kxte kĭjkĭhçxah ũstxna txáatx jxuka vxit-sa Dxus, ²⁵ na'wẽg kwe'we'j idxna selpisáa Davxida's:

¿Kĭh yuupa'gata vxite nasa majũwe'sxwa tx-akwe ũusaçxana suste', nasa' kxulçxáawa ma'wẽ yũuwa'ja'swa pakwé'?

²⁶ Naa kiwete jxkaahsa' weeçxi'tx,

Aça' çxhabte npiiçthē'j pkhaakheçxa, Dxusa's ahççxa txã'wẽy Nçxi'knawa açe'tx jĭ'k.

²⁷ Txã'jĩni kxtey yuuk. Txãa pa'gatx Herodes vxite' Poncio Pilato kxtee Israelwe'sx petx vxite nasa yã'jçxa iidx Nçxi'k Jesus kĭh pkal yuhwa ji'phmeesa's kaag txã'sna ahççxa naa çxhabte pkhaakhe, ²⁸ ma'wẽ yũuwa'ja'swa idx ma'wẽne'ga vxitçxa nvxiht txãni entey txã'sa' jxuka kxtey yuuya'. ²⁹ Nawa idxa' txãawe'sx ewmée yũuya' yaakxnijũ nwe'weçxa kwe'sxtxi meen kçxhãaçxha'j, kxah iidx yuwe's kĭhte yuhwa ũukhmée pta'sxi'nja'w. ³⁰ Sa' idx pu'çxte', ãça'satxwa nuykatxhiçxa kĭjkĭhwa kaavxya'ja'ja'nja'w iidx Nçxi'k Jesusa's pi'kçxa.

³¹ Txã'jĩna Dxus yakh puutx we'wena jxã'jaçpkaçxha', txãawe'sx pkhaakhenite' ehd u'kh, naapkaçxha' Dxus Espiritu' txãawe'sx ũuste khēete', Dxus yuwe's ũukhmēetx pta'sxi'.

Txãawe'sx ji'phuni's kxteeçxah ji'phuni

³² Kristo's ũuste jxpa'gasa' teeçxsa ma'wẽ yũuwa'ja's yajkxte', jxukaysa txã'wẽçxaçxáa yũuwa'ja'sçxáatx yaaki'. Maa yuhwa na' adx jĩ' jĩmeetx fxi'ze'. Kĩhwa ji'phuni'sa' jxukaysa ja'daçxaçxáatx jxtxude'. ³³ Jesus jxkaahni-sawe'sxa' jweeíçxáatx ũukhmée pta'sxi' Jesus uuçxawa ki' ĩtxi yuuni's, aça' Dxusa' jxukaysatx wala pu'çxhi'k. ³⁴ Txãawe'sx ksxavxyte kim yuhwa jxpeejsameetx yu'. Txã'wẽ maawa txãawe'sx kiwe vxite' yat txã'wẽsatx txweyçxa vxyu's jxũna pa'jçxa, ³⁵ Jesus jxkaahnisawe'sx kusetetx dukhe', aça' txãawe'sxa' maaçxah jx-peejxtewa txãawe'sxtxi txudeede'tx. ³⁶ Txãan ensu' teeçx piçthẽ'j levxita José yaasesa ũsu'k, Çxipre kiwete upxxa. Aça' Jesus jxkaahni-sawe'sxa' Bernabé yasetx ki'p. Txãa yase yu', Kvxiisxa'jsa jĩni'. ³⁷ Txãa piçthẽ'ja' txajx kiwe's txweyçxa vxyu's jxũna pa'jçxa Jesus jxkaahni-sawe'sxtxi dukhku.

5

Ananiaswe'sx ptam ĩsxiini

¹ Txã'wẽy Ananiaswe'sx ptamwa txãawe'sx kiwe's txweytxi. ² Ananiasa' kiwee txweyni vxyu's pxãhnçxáak jxũna u'jçxa jxuka dukheçthu jĩna Jesus jxkaahnisawe'sx kusete nvxiht. Txã'wẽ ĩsxiiwa'ja's ptamíi puutx

we'weçxatx txã'wẽ yũ. ³ Aça' Pedro' na'wẽk we'we Ananiasa's:

—Eçxthẽ'ja's çkĩjxa'ga iidx ùuste ka'ga'jna ùsu', txã'wẽ kiwee txweyni vxyu's pxãhnçxáa dukheçça jxuka dukheçthu jĩna Dxus Espiritu's ãsxiikahn? ⁴ Kiwe' iidx jĩine' yu', aça' txweyte' vxyuuwa iidx jĩine' yu'. Aça' çkĩjxa'ga tehwed isasaçxá's pta'sxmée ãsxiiya' yajkx? Kwe'sxtxiçxáa ãsxiimée, Dxusnawa ãsxiig jĩk. ⁵ Txã'jĩni's wẽse'jna'wa, Ananiasa' uuniik wete. Aça' txã'wẽ yũuni's nasa maawa jxuka jiyusa' seena' wala ùukhwa'ja's ji'phutx. ⁶ Txajũ' piçtakxwe'sx kũhçxa, txãa uuníi kakwe's yapçxa pedaaya' jxũna u'jtx.

⁷ Txã'wẽ yũuni tekh ora skhẽuuçpkaçxha', Ananias nyu Safxirawa pa'kh, nmi' uuni's jĩimée.

⁸ Aça' Pedro' pẽjxku:

—Mpeeta'sxwe, çi'kwe'sx kiwe's kxaz pa'gateçxáa dxih txweykwe'? jĩna pẽjxte', txãa u'y pasçxa':

—Isa, txã'wẽteçxáa yuh txweythaw jĩnak pas.

⁹ Txajũ' Pedro' na'jĩnak we'we:

—I'kwe'sxa' çkĩjxa'kwe Dxus Espiritu's ãsxiiwa'ja's ptamíi puutx we'we'? I'kwe nmi'a' txã'wẽ ãsxiipa'ga uute', txã'sna pedasáa açxhçxáa kũjuçta', sa' i'kwenawa jxũna u'jwetxna pedaaya' ¹⁰ jĩçpkaçxha', txãa u'ywa Pedro tasxga uuniik wete. Aça' Ananiasna pedasáa piçtakxwe'sx kũhçxa, Safxirawa uuníi ùste uyçxa', jxũna u'jçxa nmi' pukasuy pedaatx. ¹¹ Aça' Dxus yakh fxi'zesawe'sx txã'wẽy vxite nasawa txã'wẽ seena' yũuni's jiyuçxa', wala ùukhwa'j ji'phutx.

Kim yuhwa ājanimeesatx wala kaavxya'ja'jni

¹² Jesus jxkaahnisawe'sxa' kim yuhwa ājānimeesa's kījkiḥwa kaavxya'ja'jnatx ūsu' çxhabte nasaa ksxavxysu. Sa' Dxus yakh fxi'zesawe'sx txāawe'sx pwe'sx yu' dxuus yat pwa'tetx pkhaakhe' Salomon jīi jī'tx kxtee. ¹³ Nawa Dxus yakhmée fxi'zesa yu' kim yuhwa txāawe'sx yakh pkhaakhena utxa'çmeeta', txā'wē seena' yūute ūukhçxa. Nawa txāawe'sxa' ekaju yu' Dxus yakh fxi'zesatx wala ewçxáa we'wena fxi'ze'tx. ¹⁴ Txā'wētewa piçthē'j petx u'y yā'jçxa Kristo's txāawe'sx ūuste jxpa'gasa jweeíçxáatx seena' wala pehnana u'j. ¹⁵ Txājū' āça'satx aadaste kutxi'jçxa Pedro skhēuwa'jsutx khikhe', kxah Pedro psxū'ju'niçxá'swa jxpa'gasa' katxhitxna sūhçxatx txā'wē yū'. ¹⁶ Jerusalen peeku'jsuwe'sxwa nasa seena' wala pa'jtx, txāawe'sx āça'satx pe'jçxa vxite' eçx iiyamunisatxwa pe'jçxa, sa' jxukay nuykatxhinitx neeyū'.

Pedro Juanwe'sxtxi ahçeçxa ikh wēeni

¹⁷ Txajū' sacerdote npiiçthē'ja' kxtee ūssa saduceowe'sx yakh seena' wala ahçeçxa ¹⁸ Jesus jxkaahnisawe'sxtxi' tudçxa karcelte txahxt. ¹⁹ Nawa Dxus angel kus kūhçxa karcel vxitxa's phaadeçxa na'jīçxak eka kutxi'j: ²⁰ —Dxus yatna ki' u'jçxa nasatxi' pta'sxine'kwe Dxus yakh fxi'zewa'ja's jīte', ²¹ wala kusítey Dxus yatna u'jçxa pta'sxya' takhtxi. Naapkaçxha' sacerdote npiiçthē'j vxite' kxtee ūssa judiu nthē'jsawe'sx jxukaysa pkhaakheçxa Jesus jxkaahnisawe'sxtxi' karceluh

kutxi'jya' kaahtx. ²² Aça' policiawe'sxa' karcelte uymeeçxa', pta'sxya' ki' sxawedtxi:

²³ —Karcel vxitxa' wala ew aphni ũsa', aça' kxtee thegsawa vxitxte lajxmeétx ũs yu'. Aça' kwe'sx kũhçxa vxitxa's phaadete', Pedrowe'sxa' meetx yu' jïtx.

²⁴ Txã'jïna pta'sxte', sacerdote npiïçthê'jwe'sx vxite' kxtee dxuus yatte thegsawe'sx npiïçthê'j jxukaysa na'wêtx yaaki': Naa yuwe' ¿ma'wê yũuwa'jsakx? sũjuçpkaçxa', ²⁵ teeçx piçthê'j pta'sxna kũjk:

—Karcelte ktxaja'ji'kwe txãawe'sxa' dxuus yatte yã'j ki' kaapiya'jna ũsta' nasatx jïk.

²⁶ Txajũ' dxuus yatte thegsawe'sx npiïçthê'ja' policia yakh u'jçxa jxũna kũhtx kïhwa ppxumée, Pedrowe'sx ju'gusa nasa' ũusaçxaçxa kwet wãatatahwe'sxte. ²⁷ Sa' judiu nthê'jsawe'sx tasxte jxũna kũhte', sacerdote npiïçthê'ja' na'wêk pëjx:

²⁸ —Kwe'sxa' i'kwe'sxtxi' bagaçxte yuhwa peena yu' pta'sx kaahmeetha'w Jesus kaapiya'jni's. Aça' i'kwe'sxa' ¿kïjkwe yuu? Naa Jerusamente mtee mteewa jxuka i'kwe'sx kaapiya'jni's yuutaçxa kwe'sxtxi yuuwesa vxit ya'wai'kwe Jesus uuni's.

²⁹ Txã'jïte', Pedrowe'sx paçxa':

—Kwe'sxa' nasaa jxkaahni yuutxi' nwêese'jwa'j ji'phmeetha'w, naasáa Dxusçxáana nwêese'jwa'jsatha'w. ³⁰ Kwe'sx yaçgawe'sx txãawe'sx Dxusa' Jesusa's ki' ïtxi vxitku kluuskhê a'kxçxa i'kwe'sx ikhni's. ³¹ Dxusa' txã'wê yũuçxa cielute txajx pukate paçu ju'gte ki'pçxa

Jxkaahwa'jsak vxit, kxah Israelwe'sxa' txãawe'sx pkaltxi nvxihtçxa Dxus tasxte sxawedte, Jesusa' nwe'wena. ³² Txã'wẽ yũuni's kwe'sxa' jũitha'w, aça' Dxusa' txajx Espiritu's ũsku txã'sna nwẽese'jsatx txãa Espirituwa jiaa' jĩte', ³³ judiu nthẽ'jsawe'sx jweeliçxáa ũusaçxaçxa Pedrowe'stxxi ikhya'watx yu'. ³⁴ Nawa kxtee txãawe'sx ksxavxyte teeçx fxariseo Gamaliel yaasesa u'pu'k, Dxus leya's kaapiya'jsa wala jxtuhthesa. Txã' Jesus jxkaahnisawe'stxxi eka dudte kutxi'khaahçxa, ³⁵ judiu nthẽ'jsawe'stxxi na'wẽk we'we yujuçxa:

—Israelwe'sx, naa piçthẽ'jwe'stxxi na'wẽ yũuya'wai'kwe txã'sa' mpa'yajkxwe. ³⁶ I'kwe'sxa' miyajkxwe: teeçx ente' vxyaak teeçx piçthẽ'j Teudas yaasesa wala çxhãçxhasath jĩna, aça' txajx ju'gu u'jsa kuartocientos nasatx yu'. Nawa txãa npiiçthẽ'ja's ikhnik yuu, aça' txajx nasa' jxuka pũsxite', txãa yuwe' pçuuk. ³⁷ Txã'wẽ yũuni e'su, nasatx eçte ãsx ente', teeçx piçthẽ'j txã'wẽy vxyaak, Judas Galileajũwe'sx, aça' txajx ju'gusa nasa wala kuh utxaatx. Nawa txãa Judasa's ikhte', txajx ju'gusawa jxuka pũsxitx. ³⁸ Txãa pa'ga naa piçthẽ'jwe'stxxi' kuçx yuunuwe. Naa yuwe' piçthẽ'jwe'sxçxáa we'weniçxa yu', kĩhwa yũumeetewa pçuuna. ³⁹ Nawa Dxus jĩi wáana aça' txã'sa' i'kwe'sxa' ivxiituya' ãjãmeene'kwe. Dxus yakh puisáa yuuya'mée mpa'yajkxwe jĩte', ⁴⁰ Isa yuh we'wek sũhnatx neeyũu jxukaysa. Txajũ' Jesus jxkaahnisawe'stxxi pa'yaçxa': ãçxha' peena yu' Jesus kaapiya'jni's pta'sxmeene'kwe

jĩna we'weçxa, wala peçxujkweçxaçxáa txhwetetx. ⁴¹ Aça' Jesus jxkaahnisawe'sxa' judiu nthē'jsawe'sx tasxuh wala weçxana kasehtx txã'wē Jesus kaapiya'jni's pta'sxpa'ga pxthaa yuuwa'ja's ji'phutha'w sũhna. ⁴² Maa ente yuhwa sxuuna' fxi'zemée een isa Dxus yuwe's kaapiya'jna txã'wēy Jesukristo ĩtxi yuuni'swa pta'sxna pekũhna nestxi yu' yat-su vxite' dxuus yatte.

6

Dxuus yatte thegwa'jsa siete nasa txhitxhni

¹ Txãa ensu' Kristo's jxpa'gasawe'sx wala pehnate', kxtee griego yuweju we'wesawe'sxa' judiu yuweju we'wesawe'sxtxi ũusçxa we'wewa'j uytxi kwe'sx ji'j vxiuda yuutxi' ew sã'jĩmée ũsta' een isa peesni ũ'a's jĩte', ² Jesus jxkaahnisawe'sx docesa jiyuçxa', Kristo's jxpa'gasawe'sxtxi jxuka pkhakhçxa na'jĩtx:

—Dxus yuwe's pta'sxmée, sã'jĩwa'jçxá's jxthaakwe pa'pçxuya' yu' ãjãme'nja'w kwe'sxa'. ³ Txã'wē yũuya'mée i'kwe'sx yakh ũssa yakhthē'jwe'sx siete piçthē'j mtxhiitxhwe, Dxus dxi'pte ew fxi'zesa, Dxus Espiritu's ũuste jxpa'gasa, ma'wē yũuwa'ja'swa ew jiisatx. Txã'wē yuuçxa txãawe'sxtxi dukhe'nja'w sã'jĩna ũswa'j mjĩia's. ⁴ Aça' kwe'sxa' Dxus yuwe's kaapiya'jwa'jçxá's thegu'nja'w, Dxus yakh pu'vxitumée puutx we'wena jĩte', jxukaysa txã'wē yũuwa'ja's yajkxtxi. ⁵ Sa' Dxus yakh jxpubamée fxi'zesa Estebana'stxi txhitxh Dxus Espiritu's ũuste ji'phsa. Vxite' Fxelipe,

Prókoró, Nikanor, Timón, Parmenas, Nikolas Antiokía çxhabuwe'sx txãawe'sxtxi txhitxhnisa neeyũu. Txãa Nikolasa' judiumeeçxawa judiuwe'sx na'wěy yuuna fxi'zeyá' utxasaak yu'. ⁶ Txãa piçthě'jtx txhitxhçxa', pe'jna u'jtx Jesus jxkaahnisawe'sx tasxte, açá' txãawe'sxa' dxikthesu peekizeçxa Dxus yakh puutx we'wetx txãawe'sx pa'gate.

⁷ Txajũ' Dxus yuwe' walaana u'kh, açá' Kristo's jxpa'gasawa Jerusalente seena' wala pehnak, txãa pa'ga kxtee judiuwe'sx sacerdote yuhwa Jesus kaapiya'jni's jxpa'gatx wala kuhsa.

Estebana's preesu'jni

⁸ Açá' Estebana' Dxus pu'çxte', kim yuhwa ãjanimeesa'swa kaavxya'ja'jnak fxi'ze' txãa çxhabte. ⁹ Txã'wě yũute', judiu vxite kiwejuwe'sx Cirene, Alejadría, Cilicia, Asia txãa kiwesuwe'sxa' Esteban yakh ũusçxa we'wena kasehtx. Txãawe'sxa' karceluh txhweetenisa txãawe'sx pwe'sxçxáa fxiitx pkhaakheni yat ji'phu'. ¹⁰ Nawa txãawe'sxa' pasya' ãja'çmeeta' Estebana' Dxus Espiritu kaaũusuthe'jni's we'wete'. ¹¹ Txajũ' vxitetx vxyu dukhtxi txã'wě Moisesa's açewe'wena Dxusnawa açe'k jĩna ĩsxiina pãatxhĩ'khkahn. ¹² Txã'wě yũuçxatx kaaũusçxa'j nasa ekajuwe'sx vxite' judiu nthě'jsawe'sx vxite' Dxus leya's kaapiya'jsawe'sxtxi. Sa' Estebana's tudçxa jxũna u'jtx judiu nthě'jsawe'sx tasxte. ¹³ Sa' pakwetx na'wě ĩsxiina pta'sxwa'jsa: Naa piçthě'ja' een isa dxuus yata's açewe'wena txã'wěy Dxus leya'swa açewe'wena nesku yu'.

¹⁴ Jesus Nasarethũwe'sxa' naa dxuus yata's ivxiituçxa, Moises kaapiya'jni'swa ivxiituwa'jsa' jĩna kaapiya'jni's kwe'sxa' wẽse'tha'w.

¹⁵ Txã'jĩna ĩsxiite', judiu nthẽ'jsawe'sx vx-ite' kxtee pkhaakheçxa ũssa' Esteban dxi'pte thegçxa' Dxus angel na'wẽtetx uy.

7

Esteban pasni

¹ Txajũ' sacerdote npiiçthẽ'ja' Estebana's pẽjxku:

—¿Na'wẽ pta'sxi'tx txã' jxuka isa yuhna'? jĩte',

² Estebana' pta'sxya' takhku:

—Yakhthẽ'jwe'sx, na's mwẽese'jwe: Kwe'sx Dxus cielutewe'sxa' yaçgathẽ'j Abrahana's vxyaak Harán kiwete u'pxa' u'jmey nee Mesopotamia kiwete ũsiyna. ³ Sa' na'wẽk jxkaah: Iidx kiwe petx iidx nwe'sx jxuka nvxihtçxa me'j kiwe ũsya'wath kxtee. ⁴ Txã'jĩte', Abrahana' Kaldea kiweju kasehçxa Harán kiwetek u'pxa' u'j. Txajũ' Abrahan neya' Harán kiwete uute', Dxusa' Abrahana's pe'jna yuwe'k naa kiwete açxh ũsi'kwe kxtee. ⁵ Nawa Dxusa' Abrahana's naa kiwete nuypa'jçxa', kiwe le'çxkuẽçxáa yuhwa txagaçxhíi yu' ũsme'. Nawa idxa's e'suçxáawa naa kiwe's ũsu'nja, aça' idx uute', iidx luuçx jĩi neeyũuna jĩk. Txãnsu' Abrahana' luuçx ji'phmeetewa txã'wẽk iidx luuçx jĩi jĩna puutx we'we. ⁶ Abrahan ji'j ma'wẽ fxi'zewa'ja'swa Dxusa' pta'sxku: Iidx ji'jwe'sxa' vxite kiwesu pkxuuna jxpe'jni kuartocientos anxu fxi'zetxna. ⁷ Txã'wẽtewa

txãa p̄kxuusawe'sxtxi' kastigaĩ'nja, kxah iidx ji'ja' txajũ kasehçxa naa kiwete adxa's selpiiya' yuwetxna jĩk. ⁸ Dxusa' Abrahan yakh puutx we'weçxa', txãa puutx we'weni's peçxkanaya'mée jĩçxa cirkuncidãy kaakh txajx luuçxtxi'. Txãa pa'gak Abrahana' txajx nçxi'k Isaak upxhni oçxo en ãjaçpkaçxha', cirkuncidãy. Txã'wěy Isaakwa txajx nçxi'k Jakoba's cirkuncidãyku. Aça' Jakobwa txajx nçxi'kwe'sx docesatx txã'wěyçxaçxáak yuu. Txãa Jakob nçxi'kwe'sx txã'wě Israelwe'sx ji'j docesa neywe'sxta'.

⁹ Txãa Jakob nçxi'kwe'sxa' nyakh Jose's ahçeçxa txweytxi, Egipto kiwen jxũna u'khan. Nawa Dxusa' José yakh txuteméek ũsu' nxuste fxi'zeçtewa nwe'wena. ¹⁰ Txãasak Egiptote jxkaahsa Fxaraon dxi'pte ew fxi'zewaja's ũs. Txã'wě yũute', Fxaraona' Jose's Egiptote ne'jwe'sx ki'pçxa jxkaahsa yata's thegwa'jsak nvxiht.

¹¹ Txãn ensu' Egipto kiwete jxuka Kanaan kiwete yã'jçxa wala wěje pa'kh kxũusu'jwa'jsa, aça' kwe'sx yaçgathě'ja' ũ'wa'j uymeeta'. ¹² Nawa Jakoba' Egipto kiwete skuutxh txweywa'j ũsa' jĩni's jiyuçxa', txajx nçxi'k kwe'sx yaçgawe'sxtxi kaakh. Txãa entetx nyafxçxah Egipto kiwen u'j. ¹³ E'su ki' u'the', Jose' pta'sxku: Adxa' i'kwe'sx nyakthi jĩna. Aça' Egipto kiwete jxkaahsa' jiyuk Jose' kiim ji'thewa. ¹⁴ Txajũ' Jose' txajx ney Jakob petx nwe'sx jxukaysatx yuukaakh. Txãawe'sxa' setenta y cinko ähtx yu'. ¹⁵ Txã'wě yũupa'gak Jakoba' Egipto kiwen u'pxa' u'jçxa kxtee uu, aça' kwe'sx ji'j nyafxtewe'sxwa

txãa kiwete uux. ¹⁶ Nawa e'su txaçxte', José dxi'thtxi jxũna yuhçxa Sikem kiwetetx pedáa, Abrahana' Hamor nçxi'kwe'sxtxi kiwe weyku uusaatx pedawa'j jĩçxa kxtee.

¹⁷ Dxusa' Abrahana's kiwe ũswa'j en ājaçte', Israelwe'sx Egiptote ũssa wala pehnatx. ¹⁸ Naapkaçxha' Egipto kiwete jxkaahwa'jsa' Jose's jiimeesak u'ka. ¹⁹ Txãa jxkaahsa' kwe'sx yaçgawe'sxtxi ahçena pkxuuya' takhku, luuçx u'se upxsatx kthegu'jmée uukahn. ²⁰ Naapkaçxha' txãa ensu' Moiseswa upxku Dxus peeygãani wala zhiçxkwesa. Aça' neywe'sxa' yatte tekh a'te jxpe'jtx. ²¹ Nawa jwee yu' jxpe'jya' ājameeçxa', yu'wala pukaga sũthte', jxkaahsa niisa uyçxa', txãak nuywala txajx luuçx na'wē vxitçxa. ²² Txãa pa'gak Moisesa' kĩhtewa jxuka kaapiya'jni yuu Egipto kiwetewe'sx na'wēy, sa' kĩhtewa jxtuhthesak yu'.

²³ Moisesa' kuarenta anxu ji'phuçxa', txajx nwe'sx Israelwe'sx ũsnite thegya' u'jya' yajkxku. ²⁴ Kxtee ũççxa uyku teeçx Egiptotewe'sx txã'wē Israelwe'sx teeçxa's pkxuuna ũste, aça' Moisesa' āhmeekwesa ju'gu yuuçxa Egiptotewe'sxa's ikhku. ²⁵ Israelwe'sxa' Dxusne' kaah kwe'sxtxi nwe'weya' sũjkahnku txã'wē yũu Moisesa', nawa txãawe'sxa' txãa sũhmeeta'. ²⁶ Kuskuskhē' Moisesa' uyku e'z Israelitawe'sx puiina ũste, sa' na'jĩnak nwe'we wēe: I'kwe'sxa' pxakh-sai'kwe, sa' çkĩjxa'kwe pui'? jĩte', ²⁷ vxite's uyisá' Moisesa's çxatççxa na'jĩk: çKinga idxa's npiiçthē'jsa kwe'sxtxi nwe'wewa'jsa na'wē vx-itçxa nvxiht? ²⁸ Jũ'na ma'wēga Egiptotewe'sxa's ikh çtxã'wēy adxnawa ikhe'nja sũjuwá'ga? jĩte',

29 Moisesa' txãa kiweju ũphna u'jçxa Madian kiwenku u'j. Kxteek txajx kiwemeete pa'jçxa u'pu', sa' e'z luuçxku ji'phu.

30 Txãa kiwete Sinai vxiç utxasu nasa u'pnimeete kuarenta anxu fxi'zeçte', çhũçh tasxte ipx behnak vxyaa. Txãa pxãhte Dxus angela'sku uy. 31 Txã'wẽ uyçxa', Moisesa' kuh yajkxna utxaak ew thegya'. Naapkaçxha' Dxus we'weni na'wẽk pthũuse: 32 Adxa' iidx yaçgawe'sx Abraham, Isaak, Jakob txãawe'sx Dxusthu jĩte', Moisesa' ũukhna yayaçxa thegme'. 33 Aça' Dxusa' Moisesa's we'weçxa': Iidx pelgatxi's mpahde, ayte' kĩh pkal yuhwa ji'phmeesa ũsthu naa pa'ga. 34 Sa' Egiptote adx nasa pxthaa yuuni's uythu, sa' pxthaa we'weni'swa wẽse'th. Txãasath yuwé' nwe'weya'. Aça' adx jxkaahni's nwẽese'jçxa Egipto kiwen u'jwene'ga jĩk. 35 Israelwe'sxa' nyafxí' Moisesa's na'jĩnatx ahçe: ¿Kinga idxa's npiiçthẽ'jsa kwe'sxtxi nwe'wewa'jsa na'wẽ vxitçxa nvxiht? Txã'jĩna ahçetewa, Dxusa' çhũçh tasxte ipx ksxavxyuh vxyaaçxa', Moisesa's kaakh npiiçthẽ'jsa na'wẽ nwe'weya'. 36 Moisesku txã'wẽ kwe'sx yaçgawe'sxtxi Egipto kiwejuh kutxi'j txãa kiwete kĩjkĩhwa seena'sa kaavxya'ja'jçxa. Txã'wẽy İkh Wala Behsajuwa kutxi'kh sa' nasa u'pnimeesu kuarenta anxuk txã'wẽ kim yuhwa ãjãnimeesa's kaavxya'ja'jna ũsu'. 37 Txãa Moisesiçxáak Israelwe'sxtxi na'wẽ pta'sx: I'kwe'sx ji'j teeçxsa's kutxi'jçxa Dxusa' kaajxa'wa' txajx yuwe's pta'sxkahn, na'wẽk adxnawa kaah txã'wẽy. Aça' txã'sa'

nwēese'jwa'j ji'phi'kwe jīk Moisesa'. ³⁸ Moisesku txā'wē nasa u'pnimée kiwete ūsu' kwe'sx yaçga Israelwe'sx yakh. Sa' Dxus angel yakhwa Sinaí vxiç walate puutx we'weçxa kwe'sx yaçgawe'sxtxi pta'sxku. Sa' Dxus jxkaahna kwet taplate fxi'jnitxwa jxpa'gak kwe'sxtxi ūsya'.

³⁹ Txā'wē yūutewa, kwe'sx yaçga Israelwe'sxa' Moisesa's nwēese'jmée ahçeçxa, Egipto kiwenii sxawedxa'watx yu'. ⁴⁰ Txajū' Aarona's na'wētx we'we: Kwe'sxtxi pe'jna u'jwa'jsa dxus na'wēsa mpheu'j. Txā'wēme' Moises Egipto kiwejū kwe'sxtxi kutxi'jsa kīhne' yuu nawa vxyaame'.

⁴¹ Txā'jīçxa' txāawe'sx kuseju klaa luuçx na'wē pheu'jçxa txā'snatx wala weçxana tajkx ikhçxa kab. ⁴² Txā'wē yūute', Dxusa' txāawe'sx tasxuh txuteek, ēe walasu estrelxa ūsta' txāaçxáatx neewe'wekahn. Txā'wē yūuwa'ja's Dxus yuwe pta'sxsawe'sx libroute na'wē fxi'jni':

Israelwe'sxa' nasa u'pnimée kiwete kuarenta anxu ūsçxa',
 çadxna weçxaya'kwe tajkx ikhçxa kabna ūsu'á'?

⁴³ Weh yuhwa txā'wē yūumée adxna weçxapkaçxte,

Naasáa dxus itximeesa Molokçáanai'kwe tx-
 aja',

Txā'wēy estrelxa Renfxán yaasesa's i'kwe
 neewe'we' i'kwe'sx kuseju pheu'jnisatx.

Txāa pa'ga i'kwe'sxtxi naa kiwejū kutxi'jçxa Ba-
 bilonia kiwen kaajxa'wath jīna fxi'jni'.

⁴⁴ Kwe'sx yaçgawe'sxa' nasa u'pnimée ki-
 wete ūsçxa', Dxusna weçxana ūsni yat ji'phu'tx,
 Dxusa' ma'wēne' Moisesa's vxitkaah txā'wēy
 vxitçatx ji'phu'. ⁴⁵ Aça' txā'snatx kwe'sx

yaçgawe'sx Joswé yakh yuusa' jxpa'gaçxa jxūna yuwé'. Sa' judiu ji'jmée vxite nasa ũsni kiwete ka'ga'jçxa, Davxid entepkaçxtxi ji'phu'. Txāa kiwe's Dxus pu'çxte vxite nasatx kutxi'jçxa txāawe'sxtxi iiyamu. ⁴⁶ Dxus peeygāanisa Davxida' teeçx dxuus yat txaahwa'j pheu'kh kxtee Jakob ji'jwe'sx Dxus ũswa'j. ⁴⁷ Nawa txāa dxuus yata's Salomonku txah. ⁴⁸ Txā'wētewa, Dxus cielutewe'sxa' piçthē'jwe'sx txaahni yatte yu' ũswa'jsa yu'çme'. Txā'wēçxaík Dxusa' txajx yuwee pta'sxsa's na'wē kwe'we'j:

⁴⁹ Cieluçxáa adx jxkaahna ũswa'ja',

Aça' kiwe' adx çxida txahwa'jçxáa vxitnisa'.

Txā'wēte', ¿ma'wē adx ũswa'j yat txajaki'kwe naa kiwete?

¿Teeçx ahte adx jxkaasewa'j adx vxitnimeesa ũsmanx?

⁵⁰ Nakwe seena' kĭjkĭhwa ũsta' nawa txā' jxuka adx vxitnisaçxaçxáata' jĭ'k Dxusa'.

⁵¹ Txā'wētewa, Dxus yuwe's i'kwe'sx ũuste jxpa'gaya' wa'lçxa thū'wē's aphçxa i'kwe fxi'ze' Dxusa's jiiimée na'wē. Bagaçxtewa Dxus Espiritu's ahçenaçxáa ũsi'kwe i'kwe'sx yaçgawe'sx na'wēy. ⁵² I'kwe'sx yaçgawe'sx ¿maaçxa' Dxus yuwe pta'sxsawe'sxtxi pkxuusamée ũstxmanx? Teeçx yuja' kĭh pkal yuhwa ji'phmeesa jĭna pta'sxsawe'sxtxi ikhtxi. Açxha' i'kwe'sxa' txāa pkal ji'phmeesa's ahçeçxa ikhi'kwe. ⁵³ Dxus angel i'kwe'sxtxi Dxus leya's ũstewa, nwēese'je'çmée i'kwe jĭte', ⁵⁴ txāawe'sxa' wēse'jçxa', ki'thtxi ksuusu'jnatx ũusaçxa Estebana's.

Estebana's ikhni

⁵⁵ Txã'wētewa, Estebana' Dxus Espiritu's ũuste jxukak ji'ph yu', sa' cielute pagayçxa Dxus u'pni seena' zhiçxkwesa's uyku, txã'wēy Jesuswa Dxus pukate yujuçxa ũstek uy. ⁵⁶ Sa' txã'wēsa's uyçxa' na'jĩk:

—Mthegwe, adxa' uyna ũsthu cielutewe'sx Dxus Nçxi'k Nasa Yuusá' Ney pukate ũsa' jĩçpkaçxa', ⁵⁷ txãawe'sxa' thũ'wētx yaaphçxa, sus weyçxa jxukaysa Estebana's āaphtxi ikhya'. ⁵⁸ Sa' çxhabuh kutxi'jçxa Estebana's açesawe'sxa' kwet wāatatahtx, txãawe'sx atxhtxi teeçx piçtakx Saulo yaasesa's kthegu'jçxa. ⁵⁹ Kwet wāatatajaçpkaçxa', Estebana' na'jĩnak Dxus yakh puutx we'we:

—Jesus, adx ũusa's miipa'ga jĩna'wa, ⁶⁰ peejxũkweçxa susku we'we na'jĩna:

—Meen peltunaĩ na'wē yũuçta' txãawe'sxtxi'. Txã'wē we'wena'wa uuk Estebana'.

8*Dxus yakh fxi'zesawe'sxtxi Saulo ahçeçxa pak-wení*

¹ Estebana's ikheçte', Saulo' weçxanak ũsu'.

Isa txãn entetx iiméh seena' ahçeya' takh Dxus yakh fxi'zesa Jerusalentewe'sxtxi. Txã'wē yũute', jxukaysa pũsxitx Judea kiwesu vxite' Samariasu, naasáa Jesus jxkaahnisawe'sxçxaatx neeyũu Jerusالente. ² Estebana's ikhte', pedaaya' jxũna u'jtx Dxus yakh fxi'zesa yakhtē'jwe'sx wala ũ'nena. ³ Naapkaçxa' Saulo' Dxus yakh fxi'zesawe'sxtxi ahçeçxa yat iisak pakwena u'j tx-ajũ juuna' yuuna kutxi'jçxa karcelte ktxaaja'jya'

piçthê'j petx u'y yâ'jçxa. ⁴ Nawa Jerusalem çxhabu ùphna u'jsa yu', Dxus yuwe's mteewa iipta'sxtxi u'jwe'.

Dxus yuwe's Samariate pta'sxni

⁵ Txajũ' Fxelipe' Samaria kiwete teeçx çxhabte pa'jçxa Kristo' kimtewa pta'sxku. ⁶ Aça' kx-tee nasa pkhaakhesa' Fxelipe we'weni's wala jxpa'yajkx wêse'jtx, sa' kim yuhwa âjâniméesa's kaavxya'ja'jni'swa uytxi. ⁷ Txã'wê maazkuêe nasa katxhinitx neeyũ' txã'wê txãawe'sx ùuste eçx ewmeesa sus weyna kasehte. Sa' txã'wêy êseya' âjasamée vxite' çxida puuple u'juya' âjasameewa katxhitx. ⁸ Txã'wê yũute', txãa çxhabte nasa jxukaysa wala weçxana ùsu'tx.

⁹ Txãa çxhabte' teeçx dxijxuusa Simon yaasesa' Samariate nasatx wala kaypuba'jna ùsu'k, adxa' kîhtewa jxuka jiisath jîna. ¹⁰ Aça' txã'snaçxaçxáatx nwêese'jna weçxana ùsu' luuçx ma'k yuu thê'jsa ma'k yuu nawa jxuka na'jîna:

—Naa piçthê'ja's Dxusne' pu'çxhi' jî'tx. ¹¹ Sa' txajx jxkaahni's jxukatx nwêese'je', txã'wê tx-ajx dxijxuuni yakh wala txaçxyâ'j kaypuba'jna ùsu'ne' naa pa'ga. ¹² Nawa Fxelipe' Dxus jxkaahwa'ja's pta'sxna pa'jçxa, Jesukristo' Dxus kaahnisa' jîte' jiyuçxa', piçthê'j petx u'y yâ'jçxa yu'te ya'bautisâytxi. ¹³ Aça' txã'wê txãa dx-ijxuusaawa Fxelipe pta'sxni's jiyuçxa', yu'te ya'bautisâyçxa Fxelipe yakh u'ju'k. Sa' txã'wê kîjkîhwa kaavxya'ja'the' txã'sna uyçxa' kujk ya-jkxna u'ju'.

14 Txajũ' Jesus jxkaahnisa Jerusamente ũssa' txã'wẽ Samariatewe'sxwa Dxus yuwe's txãawe'sx ũuste jxpa'gaçxa ya'bautisãytxi jĩni's jiyuçxa', kaah tx Pedro's Juan yakh. 15 Aça' kxtee txãawe'sx pa'jçxa', Dxus yakh puutx we'wetx Dxus yuwe's jxpa'gasa Samariatewe'sx pa'gate, Dxus Espiritu's jxpa'gakahn. 16 Txã'wẽme', nyafxíi yu' Dxus Espiritu's ji'phmeetx yu', naasáa Jesusa'sçxáatx jxpa'gaçxa yu'te ya'bautisãysa yu'. 17 Txajũ' Pedrowe'sxa' txãawe'sx dxikthesu peekizeçxa Dxus yakh puutx we'wete', Dxus Espiritu's jxpa'gatx.

18 Aça' txã'wẽ yũuteçxáa Dxus Espiritu kĩaçte uyçxa', txãa dxijxuusáa Simona' vxyu ũs wëek 19 na'jĩna:

—I'kwe'sx txã'wẽ ãjani's adxnawa mahwe, kxah adxwa dxikthesu peekizeteçxáa maawa Dxus Espiritu's jxpa'gatxna jĩte', 20 Pedro pasçxa':

—Iidx vxyu' idx yakh ja'da vxituna, Dxus peesni's vxyu yakhgu wey wẽje' naa pa'ga. 21 Idxa' kwe'sx na'wëy yuwa'j yu'sa' le'çxkwe yuhwa jxpa'gawa'j ji'phmeeg, Dxus dxi'pte ewmeeg yaaki' naa pa'ga. 22 Txã'wẽ ewmëe yũuwa'jçxá's yaakxni's nvxihtçxa, Dxusa's mneewe'we. Txã'wẽ yũute', peltunaĩwáana. 23 Txã'wẽme' iidx ũuste iwejçx iwejçx yaakxwa'jçxáana uta ji'phgu, aça' txã'wẽ yaakxnisa' jxuka idxa's tudçxa ji'pha' jĩte', 24 Simon pasçxa':

—I'kwe'sxa' adx pa'gate Dxus yakh meen

puutx we'wewe. Txã'wēme', Dxusa' pel-tunãywe'sxmeeta' adxa's jĭk.

²⁵ Txajũ' Jesus jxkaahnisawe'sxa' Dxus yuwe's pta'sxçxa txajũ kasehtx Samaria kiwesu vxite' çxhabkuēsu Dxus yuwe's pta'sxya'. Sa' txã'wē yũuçxatx Jerusalenna ki' sxawed.

Fxelipe' Etiopiajuwe'sx yakh puutx we'weni

²⁶ Txãa e'su' Dxus angela' Fxelipe's na'jĭnak jxkaah:

—Ayjxu kasehçxa me'j Jerusalenu Gasa çxhabna u'jni dxi'jsu.

Txãa dxi'ja' nasa u'pnimeesuk skhēwna ũsu'.
²⁷ Txã'jĭte', Fxelipe' txãa dxi'the u'jweççxa' teeçx piçthē'j eunuko Etiopía kiwejuwe'sx u'jweçtek uy. Txãa piçthē'ja' Etiopía kiwete reina Kadace tasxte vxyuu jxaawsak yu'. Sa' Dxusa's weçxaya' pa'jsak yu' Jerusalente. ²⁸ Txãasak txajx kiweni' sxawedna txajx u'jni kaçxetilxate kaçxçxa Dxus yuwe pta'sxsa Isaias libru's lēeyna u'jweç yu'. ²⁹ Txajũ' Dxus Espiritu' Fxelipe's we'wek: Kaçxetilxate u'jsa's kpajkxya' me'j jĭte',
³⁰ Fxelipe utxaana sēhçxa' Isaias librute na'jĭna lēeyni's wēse'jçxa' pějku:

—¿Jiyu'gá' iidx lēeyni's? jĭte', ³¹ txãa piçthē'ja' na'jĭk:

—¿Ma'wē yũuçxa jiyuki'th? kimwa pta'sxmeete' jĭçxa', Fxelipe's kaçxetilxate tejkaçxa pukate kaçxkaakh. ³² Sa' Dxus librute na'wē fxi'jni'sku lēeyna u'jweç yu':

Piisxakuē na'wēk ikhya' jxūna u'jni yuu.

Piisxakuēwa ma'wēga khas wakaçte' pebe'çmée, txã'wēy txãawa pebeeme'.

33 Āhmeeekwesa na'wě yuupa'ga, nwe'wenimeek uu,

Aça' txajx luuçx j̄nisa kim yuhwa neeyũumeeta'.

Txã' naa kiwete txaçx fxi'zemeyna ikhnik yuu naa pa'ga.

34 Txajũ' txãa piçthê'j lëeyna u'jsa' pějxku Fxelipe's:

—Adxa's meen peeta'sx, Dxus yuwe pta'sxsa ayte we'we'k txã' ¿kimnaga we'we'? ¿Peekx uuwa'ja's wá' we'we'? meeçxa' ¿vxitesa uuwa'ja's wá' pta'sxi'? j̄ite', 35 Fxelipe' txãa lëeyni's pta'sxku: Na' Jesus uuwa'ja'sku we'we' j̄ina. 36 Txajũ' teeçx ahte yu'te pa'jçxa', txãa piçthê'j Etiopiajuwe'sxa' na'j̄ik:

—Ayte yu' u'pa' aça' adxa' ãçxhíi ya'bautisây wëewaça', ¿ãjãma'th? j̄ite', Fxelipe' na'j̄ik:

37 —Iidx ũusuh jxuka txã'wě Jesusa' Dxus Nçxi'kne' yu' sũhçxa yu', ya'bautisâyya' ãjane'ga j̄ina pta'sxte', txãa piçthê'j pasçxa':

—Jesukristo' Dxus Nçxi'k yuh yu'ne' sũju'th adxa' j̄ik.

38 Txajũ' kaçxetilxa's kxuuju'jçxa, e'zîi yu'te kîhçxa Fxelipe' bautisâyku txãa Etiopiajuwe'sxa's. 39 Txãa yu'ju kasejeçpkaçha', Dxus Espiritu' Fxelipe's jxũna u'kh, aça' txãa Etiopiajuwe'sxa' peena yu' uymeeçxawa txajx dxi'the wala wëtwët weçxana u'kh. 40 Txajũ' Fxelipe' Azoto çxhabte pa'jçxa', çxhab iisak Dxus yuwe's pta'sxna u'j, Cesarea çxhabte pa'phkaçx.

9

Saulo' Dxus yakh fxi'zey'a' utxani
(Hch 22.6-16; 26.12-18)

¹ Naapkaçxa' Saulo yu' ikhwēena nesku yu' Jesusa's nwēese'jsawe'sxtxi. Txãasak sacerdote npiiçthē'j tasxna u'j, ² karta pějxya' Damasko çxhabna u'jçxa judiuwe'sx pkhaakheni yat-su Jesusa's nwēese'jsatx pakweçxa' piçthē'j petx u'y tudçxa Jerusalenna preesu jxūna u'jya'.

³ Damaskote pa'jya' utxaana u'jweçpkaçxa', tx-ajx dxi'pte uymeenusku cieluju eena'sa kweeth.

⁴ Aça' Saulo' weteçxa' wēse'kh na'wē we'weni's:

—Saulo, Saulo, ¿kīh yūupa'gaga adxa's ahçeçxa pkxuuya' pakwé'? jīte', Saulo' pějxku:

⁵ —Idxa' ¿kimga? jīna. Sa' na'wē we'weni'sku wēse'j:

—Adxii Jesusthu, idx na'wē ahçeçxa pkxuuya' pakwe'g txãath. Idxa' peekiçxáa ya'kpā'yuuwa'ja's pakwena ũsgu jīte', ⁶ Saulo' ũukhnite yayana na'jīk:

—Idxa' ¿kīhga yūu jxthāasu' adxa's? jīte', na'wēk pas Jesusa':

—Kiiteçxa me'j çxhabna. Kxtee pa'the ya'pta'sxina kīh yūuwa'ja'swa jīk.

⁷ Txã'wē yūute', Saulo yakh u'jsa' wala ũukhtxi, txã'wē puutx we'wetewa kimnawa uymeeçxa. ⁸ Txajū' Saulo' kiiteçxawa uyya' ājame'.

Aça' pu'kiççxa jxūna u'jtx Damaskon. ⁹ Kxte' tekx en uyya' ājamée, txã'wēy kīhwa ũ'meek u'pu'.

¹⁰ Damaskote' Jesusna nwēese'jsa Ananias yaasesak u'pu'. Txã'sa' Jesus vxyaaçxa na'wêk we'we:

—Ananias jīna pa'yate', Ananias pasçxa':

—¿Kĩh kaajxa'waga? jīte', ¹¹ Jesus we'weçxa':

—Teeçx klxiikhun Ku'le yaasesate me'j. Kxtee pa'jçxa Judas yatte pēyine'ga: Teeçx piçthē'j Tarsojuwe'sx Saulo yaasesa's peejxthu jīna. Txãa piçthē'ja' Dxus yakh puutx we'wena u'pa'. ¹² Sa' teeçx piçthē'j Ananias yaasesa pa'jçxa ki' uyya' ājakahn txajx kakwete peekizeeçtek ksxa'w.

¹³ Txã'jīna we'weni's wēse'jçxa' Ananiasa' na'jīk:

—Adxa's maawa wala iipta'sxta' Jerusamente idx yakh fxi'zesawe'sxtxi txã'wē wala pkxuusa' txãa piçthē'ja' jī'tx. ¹⁴ Sa' āçxwa naa çxhabte yuja' sacerdote npiçthē'jwe'sxtxi karta pējxçxa idxna yaakxsawe'sxtxi preesu jxūna u'jya' jīte', ¹⁵ Jesus pasçxa':

—Idxa' me'jçxáa. Txãa piçthē'ja' adx tx-hitxhnisa' adx yuwe's pta'sxwa'jsa nasa vx-ite kiwejuwe'sxtxi, jxkaahsawe'sxtxi, sa' Israelwe'sxtxiwa pta'sxwa'jsa'. ¹⁶ Adxa' txãa piçthē'ja's pta'sxi'nja adxna selpiina u'jupa'ga makwe pkxuuni yuuwa'ja'swa jīte', ¹⁷ Ananiasa' Saulo u'pni yatna u'jçxa', txajx kakwete peekizeçxa na'jīk:

—Yakhthē'j Saulo, dxi'the idx yuhte Jesus vxyaane' txãak adxa's kaah idx ki' uyya' ājaçxa Dxus Espiritu's ūuste jxuka jxpa'gakahn jīçpkaçxa', ¹⁸ yafxte apha ubute', ki' uyya' ājaçxa', kiiteçxa ya'bautisāyku. ¹⁹ Txajū'

ũ'wa'ja's ki' jxpa'gaçxa çxhãçxhak, sa' Damasko-tee ũsu'k maz enwa Jesusa's nwēese'jsawe'sx yakh.

Saulo' Damaskote Dxus yuwe's pta'sxni

²⁰ Txajũ' Saulo' Dxus yuwe's pta'sxya' takhku judiuwe'sx pkhaakheni yat-su Jesusa' Dxus Nçxi'ka' jĩna. ²¹ Aça' wēse'jsa jxukay kuh yajkxna na'wētx we'we':

—¿Naa piçthē'jii txã'wē Jerusamente Jesusa's neewe'wesatx ikh wēena fxi'zesameená'? Sa' ¿txã'wēy aytewe'sxtxiwa preesu jxũna u'jçxa sacerdote npiičthē'jwe'sx kusete dukhya' sũhçxa yuusa yu'çmeená'? jĩ'tx.

²² Txã'jĩçtewa Saulo yu' jwee'içxáak çxhãçxha pta'sxi' Jesusa' Dxus tasxu yuusa Kristo yuh yu'k jĩna, sa' kxtee Damaskote judiuwe'sxtxi ma'wē paswa'ja's yuhwa ji'phmeek nvxiitu'.

Judiuwe'sx ikhya'watewa Saulo iyuni

²³ Txãa e'su txaçxte', judiuwe'sxa' Saulo's ikhya' puutx we'weçxa ²⁴ çxhabu kasehni vxitxte en kuswa yupna nestxi yuu. Aça' txã'wē yũuni's Saulo' jiyuk. ²⁵ Aça' Saulo's pi'kxna u'jusawe'sxa' kusçxáa Saulo's kanasta walate akhçxa çxhab peeku'j uphnikhētx ekaju spajkx açesa kusejũ nwe'weya'.

Jerusalente Saulo pa'jni

²⁶ Txãa e'su' Saulo' Jerusamente pa'jçxa', Jesusa's nwēese'jsawe'sx yakh pkhaakhe wēek. Nawa kxteewe'sx jxukaysa ũukhtxi Jesusa's nwēese'jsameewána sũhçxa. ²⁷ Txã'wētewa

Bernabé yu' pe'jna u'jçxa Jesus jxkaahnisawe'sx tasxte nuypa'jçxa na'wêk pta'sx:

—Saulo's Jesus vxyaak Damasko dxi'the u'jweçte, sa' txâa yakh puutx we'wek. Aça' Saulo' Damaskote pa'jçxa Jesus kaapiya'jniçxaçxá'sku pta'sxna ũsu' jïna pta'sxte', Saulo's ũukhmée jxpa'gatx. ²⁸ Aça' Jerusalente ũsu'k txâawe'sx yakh pkhaakhena. ²⁹ Sa' judiuwe'sx griego yuweju we'wesa yakh ũukhmeek puutx we'we' Jesus kaapiya'jni's pta'sxna. Nawa txâawe'sx yu' ahçeçxa ikhya'watx yu'. ³⁰ Aça' txâ'wê yũuni's yakthê'jwe'sx jiyuçxa', Saulo's pe'jna u'jtx Cesarea çxhabna. Txajũ Tarso çxhabnatx kaah.

³¹ Txajũ' Dxus yakh fxi'zesa Judea, Galilea, Samariasuwe'sxa' kim yuhnawa ũukhmée jweeíçxáatx çxhâçxhana u'j Dxusçxáana nwēese'jna. Aça' Dxus Espiritu pu'çxte', jweeíçxáatx pehnana u'j.

Eneas katxhini

³² Txajũ' Pedro' yakthê'jwe'sxtxi Dxus yuwe's pta'sxya' kasehçxa', Lida çxhabte Jesusa's nwēese'jsawe'sxtxiwa thegya' u'kh. ³³ Kxte' teeçx piçthê'j Eneas yaasesa oçxo anxuk âça'na ũsu' ēseyá' âjameeçxa. ³⁴ Aça' Pedro' na'jïk:

—Eneas, idxa's Jesukristo nuykatxhina. Aça' kiiteçxa iidx deeni's mkiis jïçpkaçxha', txâa piçthê'ja' naa dudtey kiitek. ³⁵ Aça' kxtee Lida çxhabte vxite' Sarón kiwete ũssa jxukaysa uyçxa', Jesusa's nwēese'jya' utxaatx.

Dorkas ki' itxi yuuni

³⁶ Txãn ensu' Jope çxhabte Jesusa's nwêese'jsa teeçx u'pu'k Tabita yaasesa. Txã' griego yuwete' Dorkasku yaase yu'. Txãa u'ya' wala pu'çxna fxi'ze'k maawa peejsatxi'. ³⁷ Txãa ensu' Dorkasa' âça'çxa uuk. Aça' uunîi kakwe's kpêeu'jçxa êe yatgatx khikh. ³⁸ Pedro ũsni Lida çxhaba' Jope çxhab yakh utxak yu'. Aça' Jope çxhabte Jesusa's nwêese'jsawe'sxa' Pedro' Lida çxhabte ũsa' jîni's jiyuçxa', e'z piçthê'j kahtx Pedro's na'wê pta'sxya':

—Jxthêyuumée Jope çxhabna myuh jîte', ³⁹ Pedro txãawe'sx yakh u'jçxa kxte pa'the', pe'jna u'jtx uusáa ũsniga. Aça' vxiudawe'sx jxukaysa ũ'nena pkhaakheçxa pta'sxtxi Dorkas nee îtxiy kmiisa umçxa peesnitx. ⁴⁰ Txajũ' Pedro' jxukaysatx eka kutxi'jna'wa, peejxũkweçxa Dxus yakh puutx we'wena'wa uusá's thegçxa na'jînak we'we:

—Tabita, mkiitewe jîçpkaçxa', txãa uusá' thegçxa Pedro's uyna'wa kiiteçxa kaçxku. ⁴¹ Txajũ' Pedro' pu'kisçxa kxuuju'jna'wa, Dxus yakh fxi'zesawe'sx vxite' vxiudawe'sxtxi pa'yaçxa, îtxik dukh. ⁴² Txã'wê yũuni's Jope çxhabtewe'sx jxukaysa jiyuçxa', wala kuhsa Jesusa's nwêese'jya' utxaatx. ⁴³ Txajũ' Pedro' Jope çxhabte kuh enku ũsu' kha'tx weysáa Simon yatte.

10

Pedro Kornelio yatte pa'jni

¹ Cesarea çxhabte teeçx soldau kpiitan Kornelio yaasesa u'pu'k. Txã' Italiajuwe'sx soldautx

jxkaahsak yu'. ² Txãa piçthê'ja' Dxusna weçxana fxi'zesak yu', txajx yattewe'sx jxukaysa yã'jçxa. Sa' Dxus yakh pu'vxituméek puutx we'wena fxi'ze', txã'wëy vxyuuwa wala pu'çxhi'k judi-uwe'sxtxi. ³ Teeçx ente kusuçte las treste' Dxus angel txajx tasxte u'kaçxa na'jïna we'weçtek uy:

—¡Kornelio! jïna pa'yate', ⁴ txãa piçthê'ja' wala ùukhna Dxus angela's thegçxa' na'wëk pas:

—¿Kĩh pëjxga? jïte', Dxus angel we'weçxa':

—Idxa' txã'wë peejisaatx pu'çxna Dxus yakh pu'vxituméee puutx we'wena fxi'zeni's Dxusa' wëse'kh. ⁵ Aça' idxa' Pedro's pe'jya' mkaah Jope çxhabna. ⁶ Txãa Pedro' kha'tx weysáa Simon yatte paadehna ùsa' ìkh wala pukate. Aça' Pedro pa'jçxa pta'sxina idx ma'wë yūuwa'ja'swa jïte', ⁷ txãa angel u'jweçpkaçxha' Kornelio' e'z selpisáa vxite' teeçx soldau Dxus dxi'pte ew fxi'zesa txãawe'sxtxi pa'yaçxa, ⁸ jxuka pta'sxna'wa Jope çxhabna kaakh.

⁹ Txãawe'sxa' kuskuskhê Jope çxhabte utx-aana pa'jaçpkaçxha', êepxãh yuuçte' Pedro' tejkak êe yat pwa'te Dxus yakh puutx we'weya'.

¹⁰ Sa' Pedro' wala wëek, aça' txajx ù'wa'j pheu'juçtxi yu'. ¹¹ Naapkaçxha' Pedro' uyku cielukhê tela wala na'wësa puutx vxiçte tudçxa nuykãjaçte. ¹² Kxte yu' niimal yu'kh eçx, ul, vxiçxakwe kazxsatx jxuka ãsxnisak ji'phu'.

¹³ Txajũ' na'wë we'weni'sku wëse'j:

—Pedro, kiiteçxa naa niimaltxi' ikhçxa mē' jïte', ¹⁴ Pedro pasçxa':

—Adxa' bagaçxte yuhwa na'wë niimal kazxsa yuutxi' ù'wa'jsameeth jïk.

¹⁵ Aça' ki' we'weni wēse'kh:

—Dxus yaatenisatxi' idxa' kazxsata' jīwa'j ji'phmeeg āçxa'.

¹⁶ Txā'wē tekh uswa vxyaaçxak, txāa tela wala na'wēsa' ki' cieluní pu'kisni yuu. ¹⁷ ¿Kĩh yũukahnki'k txā'wē vxyaa? sũhna Pedro u'ppkaçxa', Kornelio kaahnisa' pa'jtx Simon yata's paapējxna. ¹⁸ Sa' sustxi pa'yana kũh:

—¿Naa yatte paadeesa Simon Pedro yaasesa ũsmeená'? jīna.

¹⁹ Pedro' txā'wē uyni's ũus yajkxna u'piyna, Dxus Espiritu' we'wek:

—Tekh piçthē'j idxa's paapējxna ũsta'. ²⁰ Aça' kiiteçxa txāawe'sx yakh me'j kuh yajkxmée. Txā'wēme', txāawe'sxa' adx kaahni yuhta' jīte', ²¹ Pedro sa'jçxa Kornelio kaahnisawe'sxtxi pējxku:

—¿Ma'jīya'kwe yuwé'? I'kwe'sx pakwenisa' adxthu jīte', ²² txāawe'sxa' pta'sxtxi:

—Soldau kpiitan Kornelio kaahni yuhtha'w. Txāa piçthē'ja' wala ew zhiçxkwe fxi'ze'k Dxusna nwēese'jna, aça' txā'sa' judiuwe'sx jxukaysa wala wedxi'tx. Sa' teeçx ente' Dxus angel vxyaaçxa' idxa's pa'yakahn yuwe nvxihtga. Kxah Kornelio' jiyuna kĩh pta'sxwa'j ji'phne'ga txā'sna.

²³ Txā'jīte', Pedro' txajx deenite ka'ga'jçxa, kxte dehçxa kuskuskhē' Pedro' u'kh txāawe'sx yakh, aça' kxte Jope çxhabte yakthē'jwe'sxwa u'jtx pi'kxna.

²⁴ Kuskuskhē' Cesarea çxhabte pa'jtx, aça' kxte' Kornelio' ũyhasnak ũsu' txajx nwe'sx vxite' txajx namiku yakh pkhaakheçxa. ²⁵ Pedro

pa'jaçpkaçxa', Kornelio' jxpa'gaya' kasehçxa Pedro tasxte peejxũkwek weçxana. ²⁶ Nawa Pedro' pu'kisçxa na'wëk we'we:

—Adxa's peejxũkwenu. Adxa' idx na'wëysa iïçxáath jïçxa', ²⁷ Kornelio yakh puutx we'wena dxiite u'kaççxa', kxte yu' wala kuh pkhaakheçxa ũstek uyna kũh. ²⁸ Sa' Pedro' na'jïk:

—I'kwe'sxa' jiine'kwe, judiuwe'sxa' pkhaakhena puutx we'wewa'jsameeta' vxite nasa judiumeesa yakha'. Nawa Dxusa' adxa's pta'sxçxa', kim yuhnawa açekaahme'. ²⁹ Txãa pa'gath pa'yaçpkaçxa', wa'lmée yuwé'. Açxha' adxa's mpeeta'sxwe kïya'kwe yuukaah jïte', ³⁰ Kornelio' pta'sxku:

—Açxha' pahz en yuuça' naapkaçxha' naa oratey las treste naa yattey kïhwa ũ'mée Dxus yakhçxáa puutx we'wena u'pu'th. Naapkaçxha' teeçx piçthē'j athni ropa kwentetesa jï'phsa vxyaak. ³¹ Sa' na'wëk we'we: Kornelio, idxa' txã'wē peejisaatx pu'çxna Dxus yakh puutx we'wena fxi'zeni's Dxusa' wëse'kh. ³² Aça' Jope çxhabna mkaah, Simon Pedro yaasesa's pe'jya'. Txãa Pedro' kha'tx weysáa Simon yatte paadehna ũsa' ïkh wala pukate. Aça' txã' ayte pa'jçxa puutx we'wena idx yakh jïnak we'we. ³³ Txã'wē jxkaah yã'the', jxthēeyuumée pak-weya' kaath. Aça' weçx yuwe'ne'ga. Açxha' ayte Dxus dxi'pte jxukaysa pkhaakheçxa ũstha'w, sa' wëse'jya'watha'w ma'wëne' Dxus we'wekaah txã'sna.

Kornelio yatte Dxus yuwe's Pedro pta'sxni

³⁴ Txajũ' Pedro' pta'sxku:

—Ăçxha' jiyuth Dxusa' kim yuhnawa ahçemée, ³⁵ maa kiwejuwe'sxçxawa txã'sna nwēese'jna ew yūuna fxi'zesa yuutxi' jxpa'ga'çxáak. ³⁶ Dxusa' Israelwe'sx ji'jtx yuwe kaakh Dxus yakh fxi'zewa'ja's Jesukristo yuuçxáa ũsuna sa' txãáiçxáa naa kiwetewe'sx jxukaysatx jxkaajana jīna. ³⁷ I'kwe'sxa' jiine'kwe na'wēk yuu: Galileajū takhçxa judiwe'sx kiwete jxuka tuuthe'jnik yuu, Juan Dxus yuwe's pta'sxçxa yu'te bautisāynijū. ³⁸ Dxusa' Nasarethuwe'sx Jesusa's txajx Espiritu's ũste', Jesusa' kīhtewa nuykatxhinak fxi'ze eçxthē'j kusete ũssatx. Dxusa' txāa yakhku ũsu' naa pa'gak txā'wē yūu. ³⁹ Jesusa' txā'wē Judea kiwesu vxite' Jerusalente kīhtewa ew yūuna fxi'zeni's kwe'sxa' jxuka uysaatha'w. Txā'sa' kluuskhē a'kxçxa ikhtxi. ⁴⁰ Nawa Dxusa' tekh ente ki' ĩtxi vxitçxa kaavxya'ja'kh kwe'sxçxáatx, nasa jxukaysatx yu' mée. ⁴¹ Dxusa' maaçxahtxne' kwe'sxtxi txhitxh txāaçxáatxku vxyaa. Aça' kwe'sxa' txāa yakh pkhaakhena ũ'na fxi'zesatha'w uuçxa ki' ĩtxi yuunijū. ⁴² Txajū' txā' kwe'sxtxi kaakh txajx yuwe's nasatx na'wē pta'sxkahn: Dxusa' txāa Jesusa's txāaçxaçxáa kastigāywa'jsak vxitçxa ki'p naa kiwete ĩtxisa ma'tx yuu uusáa ma'tx yuu nawa jxukaysatx. ⁴³ Txā'wēy Dxus yuwe pta'sxsawe'sxwa yaçkhēy we'wetx Jesusa' na'wē yūuwa'jsa' jīna: Maawa jxukay txā's nwēese'jsa' txāawe'sx pkaltxi peltunāyni yuutxna jīnatx we'we.

Judiu ji'jmeeçxawa Dxus Espiritu's jxpa'gani

44 Pedro' txã'wẽ pta'sxna ũsiyna, kxte wẽse'jna ũssawe'sx kakwete Dxus Espiritu kĩhte', jxukaysa jxpa'gatx. 45 Aça' Jesusna nwẽese'jsawe'sx judiu Pedro yakh yuusá' wala kuh yajxna neeyũutx txã'wẽ judiwe'sxmée vxite nasawa Dxus Espiritu's jxpa'gaçxa, 46 txã'wẽ vxite yuweju we'wena Dxusa's tuuthe'jna ũste.

47 Txajũ' Pedro' na'jĩk:

—Naa nasawa kwe'sx na'wẽy Dxus Espiritu's jxpa'ga yã'the', yu'te bautisãywa'ja's ¿kimçxá' yupxa' ajama'k? jĩçxa', 48 ya'bautisãy kaakh Jesukristo yasete. Txajũ' Pedro's neevxisxatx txãawe'sx yakh maz en kxtee ũskahn.

11

Dxus ma'wẽ yũuni'swa Jerusalente pa'jçxa Pedro pta'sxni

1 Jesus jxkaahnisa vxite' yakthẽ'jwe'sx Dxus yakh fxi'zesa Judea kiwete ũssa' jiyutx txã'wẽ judiu jĩ'jmée vxite nasawa Dxus yuwe's jxpa'gatx jĩni's. 2 Sa' Pedro Jerusalen çxhabte sxawedna pa'the', kxte judiu cirkuncidãynisawe'sxa' ũusçxawe'wetx Pedro's na'jĩna:

3 —¿Kĩjxa'ga judiumée vxite nasa tasxsu u'jçxa txãawe'sx yakh pkhaakheçxa ũ'we'?

4 Txajũ' Pedro' pta'sxku ma'wẽ yũuni'swa jxuka:

5 —Adxa' Jope çxhabte Dxus yakh puutx we'wena u'pçxa uythu tela wala na'wẽsa puutx pahz vxiçte tudçxa ãe walakhẽ kaahni kĩjk adx tasxte pa'j. 6 Aça' ew thegte',

dxiite yu' niimal yu'kh eçx, ul, vxiçxakwe kazxsak ji'ph yu'. ⁷ Txajũ' najĩni'sthuwẽse'j: Pedro, kiiteçxa ikhçxa mẽ' jĩte', ⁸ na'wẽth pas: Adxa' багаçxte yuhwa na'wẽ niimal kazxsa yuutxi' ũ'wa'jsameeth. ⁹ Txajũ' ki' pthũusek cieluju we'weni: Dxus yaatenisatxi' idxa' kazxsata' jĩwa'j ji'phmeeg jĩk. ¹⁰ Txã'wẽ tekh uswa vxyaaçxak êe walate ki' pu'kisni yuu. ¹¹ Naapkaçxha' Cesareaju kaahnisa tekh piçthẽ'j pa'jtx adxa's pakwena. ¹² Aça' Dxus Espiritu' adxa's u'khaakh txãawe'sx yakh wa'lmée. Txajũ' Jope çxhabtewe'sx seis yakthẽ'jwe'sx yakh u'jçxa' jxukaysa Kornelio yatte u'katha'w. ¹³ Aça' txãa piçthẽ'ja' pta'sxku Dxus angel vxyaaçxa na'wẽ we'weni's: Jope çxhabna Simon Pedro yaasesa's pa'yaya' mkaah. ¹⁴ Aça' txãa pa'jçxa pta'sxina iidx yatte jxukaysawe'sx Dxus yakh fxi'zewa'ja's. ¹⁵ Txã'wẽ pta'sxte', adx we'weçpkaçxha', Dxus Espiritu' txãawe'sx kakwete kĩjk, kwe'sx kakwetewa ma'wẽga nyafxii kĩh txã'wẽy. ¹⁶ Txajũ' yajkxthu kwe'sxtxi jxpe'jsa Jesukristo na'wẽ we'weni's: Juana' yu'teçxáak akhna bautisaĩ'. Nawa i'kwe'sxa' Dxus Espiritute yuu bautisãyni yuune'kwe jĩni's. ¹⁷ Kwe'sxa' Jesukristo's nwẽese'pha'ga Dxusa' ma'wẽga txajx Espiritu's ũs, txã'wẽyku txãawe'sxtxiwa ũs. Aça' adxa' çma'wẽ yũuçxa Dxus wedxni's wa'lna ũsuki'th?

¹⁸ Txajũ' Jerusalente ũssa yakthẽ'jwe'sxa' wẽse'jçxa', peena yu' pasmée Dxusçxáanatx na'wẽ tuuthe'j:

—Judiuwe'sxmée vxite nasatxwa Dxusa' ũsne' pkaltxi nvxihtçxa Dxus tasxte pçuwa'jmée

fxi'zewa'ja's jĩnatx weçxá'.

Antiokía çxhabte Dxus yakh fxi'zesawe'sx

¹⁹ Æçxha' nyafxíi na'wě Estebana's ikhçxa vxite neeyũusáa yuutxi' ahçeçxa pkxuute', txãawe'sxa' ũphna u'jçxa' maaíi yu' Fxenice kiwen, vxite' Çxipre kiwesu, vxite' Antiokía çxhabsu kxsũ pa'jçxa vxite nasa yuutxi' pta'sxmée judiu jí'j pwe'sx yuuçxáatx pta'sxi' Dxus yuwe u'sesa's. ²⁰ Nawa Dxus yakh fxi'zesa Çxipre vxite' Cirene kiwejuwe'sx maaíi yu' Antiokía çxhabte pa'jçxa', judiuwe'sxmeetxwa pta'sxtxi Jesus kaapiya'jni ewte fxi'zewa'ja's. ²¹ Aça' Dxus pu'çxte', txãawe'sxa' nyafxíi jxpubana fxi'zeni's nvxihtçxa Jesus kaapiya'jni's nwěese'jtx.

²² Txã'wětx Dxusa's nwěese'j jĩni's Jerusalente pkhaakhena ũssa' jiyuçxa', Bernabea's kaahtx Antiokía çxhabna. ²³ Aça' Bernabea' kxte pa'jçxa' wala weçxak Dxus txã'wě pu'çxni's uyçxa. Sa' jxukaytxi yu'kxpejk jxpubamée ew Dxus yakh fxi'zekahn. ²⁴ Txãa pa'gatey Bernabea' Dxus Espiritu's txajx ũuste jxuka jxpa'gaçxa Dxus yakh yuuçxáa fxi'zesak yu'. Txajũ' nasatx wala ya'knayku Dxus jĩi.

²⁵ Txã'wě yũuçxa', Bernabea' Tarso çxhabna Saulo's pe'jya' u'jçxa', Antiokía çxhabte nuypa'kh. ²⁶ Sa' kxte teeçx anxutx pkhaakhena ũsu' nasa ma'wěsatxwa jxuka kaapiya'jna. Antiokíatetx nyafxçxah kristiano jĩna kxsusnisa yuu Kristo's nwěese'jsawe'sxtxi.

²⁷ Txãn ensu' Dxus yuwe pta'sxsawe'sx Jerusalenu yuusa pa'jtx Antiokíate. ²⁸ Teeçxsa

Agabo yaasesa' Dxus Espiritu kaajiyu'the', yakhthē'jwe'sx ksxavxyte yujuçxa: Judiuwe'sx kiwete jxuka wēje en pa'jana jīnak pta'sx. (Txā'wē pta'sxni' kxtey yuuk jxkaahsa Klaudio ente.) ²⁹ Txā'wē wēje en pa'jana jīni's wēse'jçxa', Dxus yakh fxi'zesa Antiokíatewe'sxa' txāawe'sx ji'phuni yakh pu'çxya' yajkxtxi yakhthē'jwe'sx Judea kiwetewe'sxtxi. ³⁰ Txajū' peeswa'ja's pkhakhçxa kahtx Bernabé Saulo yakh Judeate ancianowe'sxtxi dukhkahn.

12

Jakobo's ikhçxa Pedro's karcelte txaahni

¹ Txān ensu' jxkaahsa Herodesa' pkxuuya' yajkxku Dxus yakh fxi'zesatx. ² Sa' kçxilxuh kiikhe'kh Juan nyakh Jakobo's. ³ Txā'wē yūute' Jakobowe'sxtxi açesa judiuwe'sxa' weçxatx jxkaahsa Herodesa's, aça' Pedronawa preesu'khaakh kiikhe'jya'. Pan lewadura ji'phmée ũ'wa'j fxiesta entek txā'wē yūu. ⁴ Herodesa' Pedro's preesu tudçxa' karcelte ktxaaja'kh. Kuste pahz us yu'pthehna pe'tewa'jsa soldau txajk, yu'ptheh iisa pahz pahz yujukahn. Paskua fxiesta en skhēwte nasaa ksxavxyte kutxi'jya' sūhçxak txā'wē yūu. ⁵ Aça' Pedro' karcelte wala ew yupni ũsu'k, nawa Dxus yakh fxi'zesawe'sx yu' Dxus yakh pu'vxituméetx puutx we'wena ũsu' Pedro pa'gate.

Dxusa' Pedro's karceluh kutxi'jni

⁶ Herodesa' Pedro's nasaa ksxavxyte kutxi'jwa'j en ājaçte', txāa kuste Pedro' dejk e'z soldau pxāhte, e'z kadenaju tudni. Naapkaçxha' vxite

e'z soldau yu' karcel vxitxtetx yupna ũsu'. ⁷ Txãa dudte Dxus angel vxyaaçxáa yuute', karcelte jxuka eena'k kweeth. Txajũ' angela' na'jĩnak tu'kakana Pedro's fxĩtx:

—Dud yuh mkiite jĩçpkaçxha', çam kadena' çxukwetetx Pedro kuseju. ⁸ Aça' ki' we'wek txãa angela':

—Iidx jxtudni's ya'jytudçxa, pelgatxi's mpaath jĩte', Pedro' txã'wěy yũuk. Txajũ' txãa angela' ki' we'wek:

—Atxha's jxkaaççxa myuh adx e'stey jĩte', ⁹ Pedro' angel e'stey kasejk, isa angela' eka kutxi'jiçtewa ksxa'wnawáa ũsne'tka sũhnaçxáa yajkxna. ¹⁰ Nawa nyafx vxitxte soldau yupna ũsnite skhěwçxa', e'ste vxitxte soldau yupna ũsnitewa skhěwtxi. Sa' eka kasehwa'j çam vxitxte sějeçpkaçxha', txãa vxitxa' peekçxáa phaatek. Aça' kasehçxa u'jtx klxiikhunsu. Txajũ' angela' Pedroçxáana nvxihtçxa u'kh. ¹¹ Txajũ' Pedro' naasũjk: Ksxa'wnimeega yu', isa Dxusne' txajx angela's kaah Herodes kuseju adxa's nwe'weya', vxite' judiuwe'sxwa nakwe wala ewmée yũuya' ũythasu'tx txãaju nwe'wekahn sũhnaçxáa yajkx.

¹² Pedro' txã'wě ew jiyuçxa' u'kh Juan Markos njĩ'j Maria yatna. Kxte' wala kuh pkhaakheçxa Pedro pa'gate Dxusa's neewe'wenatx ũsu'. ¹³ Kxte kũhçxa vxitxte uka'kate', teeçx luuçx u'y Rode yaasesak thegya' kaseh. ¹⁴ Nawa Pedro we'weni's jiyuçxa', vxitxa's phaademée weçxana ki' sxawedku dxiigay wuwuuçxáa:

—Pedro' vxitxte ũsa' jĩna pta'sxya'.

¹⁵ Aça' na'jĩnatx we'we:

—Luuku we'wena ũsi'çxa jītewa:

—Īsxiija'çmeeth, isa yuja' jīte':

—Pedromée, txãa yakh pi'kxna u'jusa angelçxáana jīt̃x.

¹⁶ Txã'wētewa, Pedro yu' vxitxte uka'kana nesku yu'. Aça' vxitxa's phaadeya' u'jçxa', Pedro's uyçxa wala kuh yajkxtxi. ¹⁷ Nawa sxuuna' yuukahn Pedro' kuseju pta'sxçxa', Dxus ma'wē karceluh nwe'weni's jxuka pta'sxku. Sa':

—Jakobo vxite' kwe'sx yakhthē'jwe'sxtxi mpeeta'sxwe txã'jīna'wa, txãa yu' kasehna u'kh vxite ahte.

¹⁸ Kuskuuskhē khikhynite', wala kuh yajkxna ũukhtxi soldauwe'sxa' txã'wē Pedro ma'wē yūutewa jiyumeeçxa. ¹⁹ Txajū' jxkaahsa Herodesa' pakweya' kaakh, nawa uymeete' kxte karcelte thegsa soldautxku ikh kaah. Txãa e'suçxáa Herodesa' Judea kiweju kasehçxa Cesarea kiwetek u'pxa' u'j.

Herodes uuní

²⁰ Herodesa' wala puina ũsu'k Tiro Sidón kiwete nasa yakh. Txãa pa'gatx txãa nasa' Herodes tasxte mjīisa Blasto yaasesa's vxyu dukhçxa txãa yakh u'j jxkaahsa tasxte utxaaçxa puimée fxi'zewa'ja's puutx we'weya'. Txã'wē yūumeete', txãa nasa' jxkaahsa kiwejuçxáatx ũ'a's jxpa'gana fxi'zesa yu'. ²¹ Aça' jxkaahsa Herodesa' pta'sxku kīh ente txajx tasxte utxaawa'ja'swa. Sa' txãa en āhte', Herodesa' jxkaahsa athni ropatx athçxa txajx u'pnite kaçxçxa we'wek. ²² Txajū' nasa' na'jīnatx weçxana sus we'we:

—Na'wě we'wesa' naa kiwete nasamée, Dxusa' jĩçpkaçha', ²³ txãa dudtey Dxus angela' akasa ũsku Herodesa's, açã' jxuka wes ũ'te' uuk, txã'wě nasaa weçxani's weçxana yaakxpa'ga.

²⁴ Nawa Dxus yuwe yu' jweeíçxáak walaana u'j mtee mteewa pta'sxni.

²⁵ Txajũ' Bernabé Saulowe'sxa' mjĩa's jxã'jçxa Jerusalenuh ki' sxawedtxi Juan Markosa's pe'jçxa.

13

Bernabé Saulo yakh Dxus yuwe's pta'sxya' nyafçxah kasehni

¹ Antiokía çxhabte pkhaakhena ũssa yakh ũsu'tx Dxus yuwe pta'sxsa vxite' Dxus leya's jĩisawa: Bernabé, vxite' khũçx Simon jĩnisa, vxite' Lucio Cirene çxhabuwe'sx, vxite' Manaén Galileate jxkaahsa Herodes yakh ih walaasáa, vxite' Saulo'. ² Txãawe'sxa' teeçx ente' Dxusna selpiina yũunaana ũste', Dxus Espiritu' na'wěk we'we:

—Saulo Bernabé yakh mkaahwe adxa's selpikahn, txãawe'sxa' adx pa'yanisata' mjĩwa'jsa jĩk.

³ Txajũ' yũunaana jxã'jçxa', txãawe'sx dxik-thesu peekizeçxa Dxusna neewe'wena' kahtx.

Bernabewe'sxa' Çxipre kiwete Dxus yuwe's pta'sxni

⁴ Dxus Espiritu kaathe', Bernabé Saulowe'sxa' Seleucia çxhabna u'jçxa txajũ' barkote khêeçxa ìkh pxãhte Çxipre kiwentxi u'j. ⁵ Txãa kiwete Salamina çxhabte pa'jçxa', judiuwe'sx

pkhaakheni yat-su Dxus yuwe's pta'sxya' takhtxi. Sa' Juan Markosnawa iipe'jtx yu' pu'çxwa'jsa. ⁶ Çxipre kiwe's pekühna jxã'jaççxa', Pafxos çxhabetx pa'j. Sa' kxte' teeçx judiu dxijxuusáa Barjesus yaasesa'stxi uy. Txãa piçthê'ja' wala îsxiisa yu'k Dxus yuwe pta'sxsath jîna îsxiina. ⁷ Txãa dxijxuusá' kxte ne'jwe'sx wala jiisa Sergio Paulo tasxte mjîisak yu'. Txãa ne'jwe'sxa' Dxus yuwe's wêse'j wêeçxa Bernabewe'sxtxi pa'yak. ⁸ Nawa txãa dxijxuusáa Elimasa' Bernabewe'sxtxi' kwe'we'j wêeme', ne'jwe'sxa' Dxus yuwe's jiyukahmen. ⁹ Txã'wê yũute', Dxus Espiritu's ũuste jxuka ji'phsa Saulo Pablo yaasesa' dxijxuusáa dxi'pte ũusçxa thegçxa', na'jîk:

¹⁰ —Îsxiina fxi'zesa, ewmeesa, eçxthê'j luuçx, ewsa yu'sa' jxuka ahçena fxi'zesa çmjîitega Dxus yuwe ewsa's yupmêe fxi'ze'çmêe? ¹¹ Txãa pa'ga Dxusa' idxa's açxhîi kastigaîna, aça' uyya' âjamêe fxi'zene'ga naa ensu' jîçpkaçxha', txãa dudtey uyya' âjameeçxa' maaçxáatxwa pakwek pu'kisçxa pe'jna u'khan. ¹² Txajũ' kxte ne'jwe'sxa' txã'wê yũuni's uyçxa', Jesus kaapiya'jni's isa yuhna sũhna ũuste jxpa'gak.

Pablowe'sx Pisidia kiwesu pekühni

¹³ Pablo vxite' txãa yakh pi'kxna u'jusa yã'jçxa barkote khêeçxa Pafxos çxhabu kasehtx Panfxilia kiwete Perge çxhabte pa'jya'. Nawa Juan Markos yu' Perge çxhabte pa'jçxaçxáa ki' sxawedku Jerusalennay. ¹⁴ Pablowe'sxa' Perge çxhabu kasehçxa Pisidia kiwete Antiokía çxhabnatx u'j. Kxte pa'jçxa', jxkaase ensu' judiuwe'sx pkhaakheni yatte u'katx. ¹⁵ Açá'

pkhaakheni yatte npiiçthē'ja' Dxus ley vxite' Dxus yuwe pta'sxsa fxi'jni's lēeyna jxā'jçxa', na'wētx we'we:

—Yakhthē'jwe'sx, kīh we'wewa'j ji'phçxa', myu'kxpehwe nasatx āçxhii jīte', ¹⁶ Pablo' ki- itena'wa kuseju sxuuna' yuuwa'ja's pta'sxna'wa we'wek:

—Israel ji'jwe'sx, vxite nasawa Dxusna nwēese'jsa, jxpa'yakx mwēese'jwe: ¹⁷ Israelwe'sx Dxusa' kwe'sx yaçgawe'sxtxi txhitxhçxa wala kpeena'kh Egipto kiwete nee ũsiyna, sa' txāa kiwejū kutxi'kh kīhwa seena'sa kaavxya'ja'jçxa. ¹⁸ Dxusa' nasa u'pnimée kiwete kuarenta anxu wantäyku nasa ähmée yūuna fxi'ze'çtewa. ¹⁹ Sa' Kanaan kiwete nasatx jxuka ivxiituk txāa kiwe's kwe'sx yaçgawe'sxtxi ũsya'. ²⁰ Txajū' kuartocientos cinkwenta anxu ähpkaçx jxkaahwa'jsa ji'phmée kwe'sxtxi thegwa'jsa khuēsçxáak nvxiht, Dxus yuwe pta'sxsa Samwel entepkaçx. ²¹ Txajūtx txāawe'sxii pējx teeçx jxkaahwa'jsa, aça' Dxusa' ũsku kuarenta anxu jxkaahwa'jsa Cis nçxi'k Saul yaasesa's. Txāa piçthē'ja' Benjamin ji'kh yu'. ²² Txāa e'su' Dxusii Saula's jxkaahnijū kutxi'jçxa, Davxida'sku jxkaahwa'jsa ki'p. Sa' na'wēk we'we: Isaí nçxi'k Davxid yuuçxáa adx jxkaahni's kxtey yuuwa'jsa uythu txā' adx wedxnisa' jīk. ²³ Jesusa' Davxid ji'thewe'sxku yu', aça' txā'snak Dxusa' nvxiht Israelwe'sxtxi nwe'wewa'jsa, nyafxiitey Dxusa' ma'wēne' ũsya' neeyūu txā'sa' kxtey yuuk. ²⁴ Jesus pa'jmeyna Juana' Israel nasa jxukaysatx pta'sxku: I'kwe'sx pkaltxi jxuka nvxihtçxa Dxus tasxte misxawedwe yu'te ya'bautisāyina jīna.

²⁵ Sa' Juana' txajx uu en utxaaçte', na'wêk we'we: Adxa' i'kwe'sx ũythasu'i'kwe txãameeth. Adx e'ste teeçx yuja' txajx pelgatxi wesçxáa yuhnawa adxa' khihbxa' selpimeesath jîk.

²⁶ Yakhthê'jwe'sx Abrahan ji'j, vxite nasawa Dxusna nwêese'jsa i'kwe'sx ewte neeyũuwa'ja's pta'sxnik yuu. ²⁷ Nawa Jerusalente ũssa vxite' txãawe'sx npiičthê'jsawa jiyumeeta' Jesusa' kimtewa. Sa' Dxus yuwe pta'sxsa fxi'jni'swa jiyumeeta' pkhaakheni yat-su jxkaase een isa lēeyçxawa. Sa' txãawe'sxiçxáa Jesusa's ewmeete nvxihtçxa', Dxus yuwe pta'sxsa fxi'jni txãawe'sx lēeyni's kxtey yuutx. ²⁸ Txã'wê Jesus ewmée yũuni's uymeeçxawa Pilato's yuwe ũstxi Jesusa's kiikhe'khan. ²⁹ Txajũ' Dxus librute ma'wêne' fxi'jni ũsu' txã'sa' jxuka kxtey yuuçxa', Jesusa's kluusu spajkxçxa pedaatx. ³⁰ Nawa Dxusa' uuniijũ ki' itxi vxitku. ³¹ Aça' Jesusa' wala kuh en vxyaak Galileajuwe'sx Jerusalenna pi'kxna yuusatx. Txãasa txãawe'sxa' Jesus kimtewa pta'sxsata'.

³² Txãa pa'ga kwe'sxwa i'kwe'sxtxi pta'sxiçtha'w nyafxiitey kwe'sx yaçgawe'sxtxi Dxusa' ũsya' neeyũuk txã'sna. ³³ Kwe'sxa' yaçgawe'sx ji'tha'w, txãa pa'gak Dxusa' txajx ũsya' neeyũuni's kwe'sx yakh kxtey yuuçxa, Jesusa's uuniijũwa itxi vxit, salmo doste na'wê fxi'jni ũsa' txã'wêy: Idxa' adx nçxi'kgu. Aça' idxa's uuniijũwa itxi vxitthu açxha' jîk. ³⁴ Uute' txãa kakwe' suweekahmen itxi yuuwa'ja's Dxusa' pta'sxku txajx librute na'jîna: I'kwe'sxtxi peeygãawa'ja's Davxid

yakh puutx we'weth txã'sa' kxtey yu'nja jĭk.
³⁵ Txãasak salmo vxite ajkhēwa na'jĭ': Idxna
 selpisáa peeygāanisa kakwe's nvxihtmeene'ga
 suweewe'sxte jĭ'k. ³⁶ Txã'wē we'weni' isa kxtey
 yuuyujk. Txajĭik Davxida' txān ensu' Dxus
 jxkaahni's kxtey yuuçxa e'su' uuk, açá' txajx
 kakwe's yaçgawe'sx pedaniitey pedaate', txajx
 kakwe' kxtee jxuka pçuuk. ³⁷ Nawa Dxusa'
 Jesusa's uuniijūwa ĭtxi vxitku, açá' txāa kakwe'
 pçuume'. ³⁸ Āçxha' yakhtĥē'jwe'sx i'kwe'sxa'
 mjiyuwe: I'kwe'sx pkaltxi peltunāywa'ja's
 pta'sxi'tha'w, nawa peltunāywa'jsa' Jesus
 yuuçxá'. ³⁹ Nyafxĭi Moises leya's nwēese'jçxawa,
 perdona's uymeei'kwe. Nawa Jesusna yajkçxa
 nwēese'jçxa', perdona's uyuune'kwe maawa.
⁴⁰ Mpa'yajkxwe, txã'wēme', nyafxĭi Dxus yuwe
 pta'sxsa na'wē we'wetx txã' kxtey yuuwe'sxta':
⁴¹ Weeçxsawe'sx, mpa'yajkxwe. I'kwe'sx vxi-
 tuwa'ja's mūukhwe.

Txã'wēme', adxĭi Dxusthu na',
 Txã'wē yūuwa'j en āhte', kĭhwa seena'çxáa
 yu'nja.

Txã'wē yūuwa'ja's pta'sxtewa, i'kwe'sxa'
 jxpa'gameene'kwe jĭnatx we'we jĭk Pablo'.

⁴² Txajū' Pablo' txã'wē pta'sxçxa', txāa yakh
 pi'kxna u'jusa yakh judiuwe'sx pkhaakheni
 yatu kasejeçte', kxte ũssa judiu ji'jmeeçxawa
 Pablowe'sxtxi ki' pi'kxtxi vxite jxkaase ente
 txã'wēy pta'sxya' yuukahn. ⁴³ Kxte pkhaakheni
 pçuute', judiuwe'sx wala kuhsa vxite'
 judiu ji'jmeeçxawa judiuwe'sx kaapiya'jni's
 jxpa'gasa Dxus yuwe's wala ew nwēese'jçxa',

Pablowe'sx kaapiya'jni's nwēese'jsatx yuu. Aça' Pablowe'sxa' wala yu'kxpehtx Dxus peeygānite wa'lmée fxi'zekahn.

⁴⁴ Vxite ki'su jxkaase ente', çxhabte nasa jxukay pkhaakhetx Dxus yuwe's wēse'jya'.

⁴⁵ Nawa txã'wē nasa wala pkhaakhete', kxte judiuwe'sxa' wala ũusaçxaçxa Pablowe'sxtxi açewe'wena wēesxutx. ⁴⁶ Txã'wētewa, Pablowe'sxa' ũukhmeetx na'jīna we'we:

—Dxus yuwe's nyafxte i'kwe'sx judiu ji'j khuē'ytxi pta'sxwa'kh yu', kxahta'w pta'sx. Nawa jxpa'gameeyã'ji'kwe pçumée ĩtxi fxi'zewa'ja's, aça' āçxha' u'jweçtha'w judiumée vxite nasatx pta'sxya'. ⁴⁷ Dxusa' kwe'sxtxi na'wēk we'wena kaah:

Nasa ksxavxysu eena' kweethwa'jsath nvxiht i'kwe'sxtxi',

Sa' txã'wēy maa kiwetewa ewsa's pta'sxwa'jsa jīk.

⁴⁸ Aça' judiu ji'jmée vxite nasa txã'jīni's wēse'jçxa', Dxus yuwe' wala ewsa yu'ga jīna weçxaçxa maaçxahne'ta bagaçxte yuhwa pçumée ĩtxi fxi'zewa'jsa yu' txãa yu' jxukay Dxus yuwe's jxpa'gatx. ⁴⁹ Txã'wēk Dxus yuwe's pta'sxni yuu txãa kiwete jxuka. ⁵⁰ Nawa txãa çxhabte judiuwe'sxa' nasa jxtuhtesa petx u'y yã'jçxa kxteeçxah puutx we'weçxa,

Pablowe'sxtxi pkxuuya' yajkxtxi txãa kiwejū kutxi'phkaçx. ⁵¹ Txã'wē yūute', Pablowe'sxa' txãawe'sx çxidate kiwe tuhda's sakweekweçxa u'jtx Ikonio çxhabna. ⁵² Nawa kxte nasa Dxus yuwe's nwēese'jsa yu', wala weçxana neeyūutx, Dxus Espiritu's ũuste jxpa'gaçxa.

14

Ikonio çxhabte Pablowe'sx pa'jni

¹ Pablowe'sxa' Ikonio çxhabte pa'jçxa', judiuwe'sx pkhaakheni yatte u'kaçxa, Dxus yuwe zhiçkwesa's pta'sxte', wala jxpa'gatx judiuwe'sx vxite' judiuwe'sxmeesawa. ² Nawa judiuwe'sx Jesus kaapiya'jni's açesa yu' judiu jil'mée vxite nasatx ewmée yu'txwe'weçxa yakhthē'jwe'sxtxi açeyaakxwa'ja's vxittxi. ³ Txã'wē açepa'gaiçxáatx Pablowe'sxa' jweeíçxáa kxte txaçx ũsu', Dxusa' pu'çxhina sũhna ũukhmée pta'sxna. Aça' Pablowe'sx txã'wē Dxus peeygãani's pta'sxte', Dxusa' kxte nasa wēse'jsa yuutxi' ewku kaajiyu'j Pablowe'sxtxi kîhwa seena'sa's kaavxya'ja'jya' ãjawa'ja's ũsçxa. ⁴ Aça' txãa çxhabtewe'sxa' txuteetx, vxite' judiu açesawe'sx ju'gu, vxite' Pablowe'sx ju'gu. ⁵ Txajũ' judiuwe'sx vxite' judiuwe'sxmeesawa khuēswe'sx yakh puutx we'wetx Pablowe'sxtxi wēesxuna kwet wãatatahçxa ikhya'. ⁶ Nawa Pablowe'sx jiyuçxa', ũphna u'jtx Likaonia kiwete Listra Derbe çxhabna kxsũ jxuka pekũhçxa ⁷ Dxus yuwe ewte nvxiitwa'jsa's pta'sxya'.

Listra çxhabte Pablo's kwet wãatatahçxa ikh wēeni

⁸ Sa' Listra çxhabte pa'the', kxte' teeçx piçthē'j çxida aç'a'sak u'pu'. Txã' upxhíi txã'wē yã'kh yu', sa' bagaçxte yuhwa u'juya' ãjasameek yu'. ⁹ Txãa piçthē'ja' Pablo pta'sxni'sku wēse'jna u'pu'. Aça' Pablo' txajx dxi'pte thegçxa' jiyuk nuykatxhina sũhni's. ¹⁰ Sa' susku we'we:

—Ku'le myuju jīna. Naapkaçxha' txāa piçthē'ja' ūphçxa yujuna'wa ew yā'kh u'juya' āja. ¹¹ Pablo txā'wē yūuni's nasa uyçxa', na'wēt̄x Likaonia yuweju weyna we'we:

—¡Nasa na'wē yuuçxa dxuswe'sx kwe'sx tasxte kīhtx! jīçxa', ¹² Bernabea's Jupiter jīnatx kxsusu', sa' Pablo's Merkurio jīnatx we'we', wejx thaakwe we'wesa yuupa'ga. ¹³ Txāawe'sx dxus Jupiter jī'tx txā'sna neewe'wena ūsni yata' çxhab peeku'thek ūsu', aça' kxte selpisáa sacerdote' kla jxūna pa'kh kite zhiçxkwesa khyū'jū'jçxa. Aça' nasa' Pablowe'sxtxi weçxana peejxūkweçxa neewe'weya'watx yu' txāa klatx ikhna. ¹⁴ Nawa Pablowe'sx jiyuçxa' txā'wē yūute nxusçxa peekx athni ropatx sudena'wa nasaa ksxavxyte kūhçxa na'jīnatx sus we'we:

¹⁵ —I'kwe'sxa' çkījxa'kwe txā'wē yū'? Kwe'sxa' nasa i'kwe'sx na'wēysa íçxáatha'w. Sa' txā'wē yūuna fxi'zenisa' seelpimeesa' naa pa'ga nvxihtçxa Dxus ítxīsa cielu's pheu'kh, kiwe, íkh wala kxte kīhçxah ūstxna txāatx jxuka txā'snaçxáa selpiina neewe'wewa'ja' jīna pta'sxya' yuusaçxáatha'w. ¹⁶ Txāa Dxusa' nyafxíi ensu' nasatxi' nvxihtku ma'wēwa yūuna fxi'zekahn. ¹⁷ Nawa Dxus ūsyuhna sūjkahn kaajiyu'jna nesku yu', nus kaapa'ja'jna, uuthasxtxi ew kçxhãaçxha'jna, ū'wa'ja's peejxmée peesna, wēt̄ fxi'zewa'ja'swa ūsna jīnak pta'sx. ¹⁸ Txā'wē pta'sxçxak wala thēyçxáawa pejka nasatx knay, txāawe'sxtxi weçxana kla ikhna peejxūkwekahmen.

¹⁹ Txāa e'su' judiuwe'sx Antiokía Ikonio

çxhabuwe'sx pa'jçxa kxte nasatx ewmée yu'txwe'weçxa kwet wāatatahtx Pablo's. Txã'wē yūuçxa', uuyā'jne' sūhçxa wezxna u'jçxa çxhab ekahtx wāatāh. ²⁰ Nawa kxteewe'sx Dxus yuwe's nwēese'jsa yu', Pablo's thegya' u'the', Pablo' ki' ūus ji'phuçxa kiiteçxa ki' çxhabtey u'kak. Sa' vxite kuskuskhē' Bernabé yakh Derbe çxhabnatx u'j.

²¹ Derbe çxhabte pa'jçxa', Dxus yuwe ewte nvxiitwa'jsa's pta'sxçxa nasatx wala knaytxi Dxus jii. Txã'wē yūuçxatx sxawed Listra, Ikonio, Antiokía çxhabsu iipa'j. ²² Txãa çxhabsu pa'jçxa', Dxus yuwe's nwēese'jsatx wala yu'kxpehtx Dxus jxkaahna ūsnite u'ka wēeçxa' Dxus yakh txutemée fxi'zewa'ja', makwe pxthaa nxuswa'j en pa'thewa jīna. ²³ Sa' kxsū pkhaakhena ūsnisu jxkaahwa'jsa ancianowa pakweçxa ki'ptxi. Txã'wē yūuçxatx yūunaaçxa Dxus kusete neewe'weçxa nvxiht.

Pablowe'sx Antiokía çxhabnay ki' sxawedni

²⁴ Txajū u'jçxa', Pisidia kiwesu skhēwçxa Panfxilia kiwetetx pa'j. ²⁵ Txãa kiwete Perge çxhabte Dxus yuwe's pta'sxçxa Atalia çxhabnatx u'j. ²⁶ Txajū' barkote khēeçxa u'jtx Antiokía çxhabna, majūne'ta Dxus kusete neewe'weçxa mjīya' kaahnisa yuu txãa çxhabnay. ²⁷ Antiokía çxhabte pa'jçxa', kxte pkhaakhena ūssa yakhthē'jwe'sxtxi pta'sxtxi Dxus ma'wēne' txāawe'sxtxi pu'çxçxa judiu ji'jmée vxite nasatxwa Dxus yuwe's kaajiyu'j txã'sna. ²⁸ Sa' Pablowe'sxa' kxte wala txaçx ūsu'tx Dxus yuwe's nwēese'jsawe'sx yakh.

15

Pablo Jerusalentewe'sxtxi paapějxya' u'jni

¹ Txãa e'su' Judeajuwe'sx judiu Antiokía çxhabte pa'jçxa kxteewe'sxtxi na'wêtx kaapiya'jna ũsu': Ya'cirkuncidâywa'j ji'phi'kwe Moises jxkaahni's kxtey yuuna. Txã'wê yũumeeçxa', ewte neeyũuya' ãjameene'kwe jĩna. ² Aça' txã'wê kaapiya'the', Pablowe'sxa' wala juuna' puutx we'wetx txã'wê pta'sxsa yakh. Txajũ' kxte pkhaakhena ũssa yakthê'jwe'sxa' Pablowe'sxtxi vxite kaapi'ki'jçxa Jerusalenna kaahntx Jesus jxkaahnisawe'sx vxite' anciano kxteewe'sx yakh txãa yuwe's paapějxna puutx we'wekahn.

³ Antiokía çxhabte pkhaakhesa yakthê'jwe'sx kaathe', Fxenicia Samaria kiwesu skhêwnatx u'j, judiu ji'jmée vxite nasawa Dxus yuwe's jxpa'gaçxa nyafxí jxpubana fxi'zeni's nvxihttxi jĩna pta'sxna. Aça' kxsũ yakthê'jwe'sxa' wala weçxatx txã'wê jiyuçxa'.

⁴ Pablowe'sx Jerusalente pa'the', kxte pkhaakhena ũssa vxite' Jesus jxkaahnisawe'sx ancianowe'sx yã'jçxa jxpa'gatx. Aça' Pablowe'sxa' jxuka pta'sxtxi txã'wê judiu ji'jmée vxite nasatxwa Dxusa' ewte neeyũuwa'ja's ũsku jĩna. ⁵ Nawa maaí yu' kxte ũssa fxariseowe'sx Jesus kaapiya'jni's jxpa'gasaçxawa na'wêtx we'we yujuçxa: Judiu ji'jmée vxite nasa ãçxh u'se Dxus yuwe's jxpa'gasawe'sxtxi' cirkuncidâyçxa, Moises jxkaahni leya's jxuka nwêese'khan jxkaathe yuuna jĩtx.

⁶ Txajũ' Jesus jxkaahnisa vxite' ancianowe'sx yakh pkhaakheçxa txãa yuwe's pheu'jya' puutx we'wetx. ⁷ Txã'wẽ wala txaçx txãa yuwe's puutx we'wenijũ', Pedro' kiiteçxa na'wẽk we'we:

—Yakhthẽ'jwe'sx, i'kwe'sxa' jii i'kwe Dxusa' adxa's txhitxhku txajx yuwe ewte nvxiitwa'jsa's pta'sxkahn judiu ji'jmée vxite nasatxwa, kxah txãawe'sxwa jiyukahn. ⁸ Dxusa' jiia' maaçxah nwēese'jwa'jsatewa, txãasa íik vxite nasawa txã'sna nwēese'jwa'jsa yuutxi's txajx Espiritu's ũs, kwe'sxtxiwa ma'wēga txajx Espiritu's ũs txã'wēy. ⁹ Dxusa' maa yuhtxwa nasa fxiisata' sũju'çme' kwe'sx yakh vxite nasa yakh. Txãasaíçxáak vxite nasaçxawa Jesusa's yaakxsa yuutxi's txãawe'sx pkaltxi' peltunây. ¹⁰ Dxus txã'wẽ yũuçxa nwe'wenisatxi's çkĩjxa'kwe i'kwe'sxa' jweeíçxáa thēysa's yuutxana jxkaah wēje'? Txãa thēysa's kwe'sx yaçgawe'sx yuhwa kxtey yuuya' ajameeta', aça' kwe'sx yu' wejxtha'w ajámée. ¹¹ Txã'wẽ kwe'sxa' txãa thēysa's kxtey yũuya' ajāmeetewa, Jesusa' peeygãhçxa yuuçxáane' kwe'sxtxi' nwe'we sũju'tha'w. Txãasane' vxite nasatxwa txã'wēyçxáa nwe'we.

¹² Pedro txã'wẽ we'wete', jxukaysa sxu-una'tx yuu, Pablowe'sx pta'sxni's wēse'jya'. Aça' txãawe'sxa' pta'sxtxi Dxusa' txã'wẽk kim yuhwa ajānimeesa's kaavxya'ja'jya' ajāwa'ja's kwe'sxtxi ũsçxa judiu ji'jmée vxite nasatxwa jxuka pu'çx jĩna. ¹³ Txãawe'sx pta'sxna jxã'the', Jakobok we'we:

—Yakhthẽ'jwe'sx, mwēese'jwe. ¹⁴ Simon Pedro na'wẽk pta'sx judiu ji'jmée vxite nasatxwa

Dxusa' nyafxçxah peeygâhçxa txãawe'sxtxi tx-hitxhku txajx luuçx yuuwa'jsa. ¹⁵ Txã'wê yu-uwa'ja's Dxus yuwe pta'sxsawe'sx fxi'jtx txã' kxtey yuuk. Txãa fxi'jni' na'jî'k:

¹⁶ Txã'wê yūunijū sxawedçxa, ki' txaja'nja Davxid txaahni yat wetenisa's.

Txãa wetenisa's pheu'jçxa u'se vxitçxa nvxi-itu'nja.

¹⁷ Kxah maawa jxuka Dxusa's pakweya' âjatxna, Maa kiwejuwe'sxwa adxa's jiyusa yu' jxuka.

¹⁸ Txã'wê yūuwa'ja's Dxusa' nyafxii enteyku txã'wê we'wena kaajiyu'j.

¹⁹ Txãa pa'gath adxa' naasūju': Judiu jii'meeçxawa Dxusna nwēese'jya' pakwesaatxi' kuçx kwe'sx leytxi nwēese'jwa'ja's jxkaahmée, ²⁰ naasáa na'wê pta'sxna fxi'theçxáa ewna: Naa kiwega dxus itximeesa's weçxaya' tajkx ikhni çxiçxa's ũ'wa'jme'. Sa' ptammeesa pkal yuuna fxi'zewa'jme'. Txã'wēy tajkxnawa thukçxa ikhnisa çxiçxa's ũ'wa'jme', eenawa ũ'wa'jme'.

²¹ Txã'wê yūumeete', Moises leya's nyafxii enteytxi txãasu we'wena pta'sxna yuhna ũsu' çxhab iisa judiuwe'sx pkhaakheni yat-su jxkaase ensu jîk Jakobo'.

²² Txajū' Jesus jxkaahnisawe'sx vxite' ancianowe'sx kxtee ũssa jxukaysa puutx we'wetx Pablowe'sx yakh Antiokía çxhabna kaajxa'. Sa' txhitxhtxi Judas Barsabás yaasesa's vxite' Silas txãawe'sx wala jxtuhthesatx. ²³ Txãawe'sx yakh karta na'jîna fxi'jçxa kaahtx:

Jesus jxkaahnisawe'sx vxite' ancianowe'sx weçxana yuwe kajaçtha'w ayte ũssa

yakhthê'jwe'sx jxukaysa yã'jçxa judiu jì'jmée vxite nasa Antiokíate ũssa i'kwe'sxtxi, vxite' Siria Cilicia kiwetewe'sxtxiwa. ²⁴ Kwe'sxa' jiyutha'w kwe'sx yakh ũssa judiu maafi yu' kwe'sx jxkaahmeetewa u'jçxa txãawe'sx kaapiya'jni yakh i'kwe'sxtxi kaypuba'jna ũsu'ne'ta Moises leya's nwēese'jçxa ya'cirkuncidaïne'kwe jīna. ²⁵ Txã'wē yūupa'ga kwe'sx jxukaysa na'wē yūuya' puutx we'weçxa kwe'sx yakh ũssatx txhitxhçxa i'kwe'sxtxi thegya' kajaçtha'w kwe'sx yakhthê'j Pablowe'sx ²⁶ na'wē nxus knaytxi kwe'sxtxi jxpe'jsa Jesukristo kaapiya'jni's pta'sxpa'ga txãawe'sx yakh. ²⁷ Aça' kwe'sx kaahni Judas vxite' Silas txãawe'sx pa'jçxa i'kwe'sxtxi pta'sxitxna ma'wē yūuwa'ja'swa ew äate. ²⁸ I'kwe'sxtxi' jwee yu' thaakwe jxkaahmée na'wēçxáa yūuwa'ja'sku Dxus Espiritu' kwe'sxtxi kaaūusuthe'j: ²⁹ Naa kiwega dxus itxīmeesa's weçxaya' tajkx ikhni çxiçxa's ũ'wa'jme', eenawa ũ'wa'jme', tajkxnawa thukçxa ikhnisa çxiçxa's ũ'wa'jme'. Ptammeesa pkal yuuna fxi'zewa'jme'. Na'wē neewe'we'tha'w txāatx kxtey yuuteçxáa ewna. Dxus yakh txutemée mfxi'zewe.

³⁰ Txã'wē kaathe', Silaswe'sxa' Antiokíate pa'jçxa kxteewe'sx yakh pkhaakheçxa karta's dukhte', ³¹ txāa karta's lēeyçxa wala weçxatx txã'wē zhiçxkwe yu'kxpehna fxi'jni's uyçxa. ³² Txāa Silaswe'sxa' Dxus kīh yūuya'watewa dxiikhēy pta'sxya' ājasatx yu', txāasa kxte yakhthê'jwe'sxtxi yu'kxpehna wala kçxhãaçxa'jtx. ³³ Txãawe'sxa' kxte maz en ũsçxa ki' sxaweduuçte', kxte yakhthê'jwe'sxa'

yuwe wala weçxaa kaahna kaahtx kimne'ta kaah txãawe'sx tasxnay. ³⁴ Nawa Silas yu' kxte neeyũuya'k yajkx. ³⁵ Txajũ' Pablowe'sxa' Antiokíate Dxus yuwe's kaapiya'jna nestxi yuu vxite yakhthê'jwe'sx yakh.

Pablo' Bernabé yakh txuteeçxa Dxus yuwe's pta'sxya' ki' kasehni

³⁶ Txãa e'su' Pablo' Bernabea's na'jĩk:

—Yakhthê'jwe'sxtxi ki' thegya' u'jwega maa çxhabsuçxah ne'tka'w Dxus yuwe's pta'sx kxsũ jxuka, ma'wẽ ũstewa uyya' jĩte', ³⁷ Bernabea' Juan Markosna pe'jçxak u'j wẽe. ³⁸ Nawa Pablo yu' pe'jna u'jya' wa'ľku, txã'wẽ mjĩi pu'çxna jxã'jmée Panfxiliajũçxáa sxawedsa' sũhçxa. ³⁹ Txajũ' puutx ũusçxa we'weçxa txuteetx. Bernabea' Juan Markosna pe'jçxa Çxipre kiwenku u'j, ⁴⁰ naapkaçxha' Pablo' Silasnak txhitxh, txãa yakh u'juwa'jsa. Aça' kxte yakhthê'jwe'sxa' txãawe'sxtxi Dxus kusete neewe'wena jxã'jaçpkaçxha', kasehtx. ⁴¹ Sa' u'jçxa Siria Cilicia kiwesu yakhthê'jwe'sxtxi kçxhãaçxha'jtx Dxus yuwe's pta'sxna.

16

Pablowe'sx yakh Timoteo u'jni

¹ Pablo Silas yakh Derbe Listra çxhabsu pa'jçxa kxte puutx uytxi Jesukristo's jxpa'gasa Timoteo yaasesa yakh. Txajx njĩ'ja' Jesukristo's jxpa'gasa judiu ji'thewa, Timoteo ney yu' judiu ji'jmée griegok yu'. ² Listra Ikonio çxhabsu u'psa yakhthê'jwe'sx maawa jxukatx txãa Timoteo's wala tuuthe'je'. ³ Txajũ' Pablo' txãa

Timoteo's pe'jçxa u'jya'k yajkx, sa' kaacirkuncidaĩ'kh txã'wẽ griego nçxi'ka' jĩna kxsũ judi-
uwe'sx açewe'wekahmén. ⁴ Sa' Jerusalente
Jesus jxkaahnisa vxite' ancianowe'sx fxi'jni
karta's jxukatx pta'sxna u'jwe' maa çxhabsuwa
yakhthẽ'jwe'sxtxi. ⁵ Txã'wẽ jiyuçxa', kxsũ
pkhaakhesawe'sxa' jweeíçxáatx çxhãçxha Dxus
yakh fxi'ze', aç'a' nasa yu' een isatx pehnana
u'jwe' Jesus kaapiya'jni's nwēese'jna.

*Pablo ksxa'wte teeçx piçthẽ'j Macedo-
niajũwe'sx pi'kxni*

⁶ Txajũ' Pablowe'sxa' Fxrigia Galaciasutx kte-
jkana u'j, Dxus Espiritu' Asia kiwesu jwee yu'
Dxus yuwe's kaapta'sxi'jme' naa pa'ga. ⁷ Sa' Misia
kiwete utxa kũhçxa', Bitinia kiwen u'jwe'nja'w
sũhtewa, Espiritu' u'khaahme'. ⁸ Txã'wẽ
yũuyã'the', Misia kiwen teehwed u'jçxa, Troas
çxhabtetx pa'j ìkh wala pukate. ⁹ Kxte üsçxak
Pablo' teeçx kuste ksxa'w teeçx piçthẽ'j Macedo-
niatewe'sx na'wẽ pxthaa we'wena üste: Mace-
doniate ktejkaçxa, kwe'sxtxi myuh pu'çxya' jĩna.
¹⁰ Pablo ksxa'wte txã'wẽ pa'ya yã'the', Mace-
donia kiwen u'jya' pheu'tha'w, kwe'sxtxi' Dxus
txã'wẽ kajaçna Macedoniatewe'sxtxi txajx yuwe
ewte nvxiitwa'jsa's pta'sxya' sũhçxa.

Pablo Silas yakh Fxilipos çxhabte kxuuphni

¹¹ Troas çxhabuh barkote khēeçxa u'tha'w
ìkh pxãhte Samotracia kiwen. Sa' vxite
kuskuskhẽ' Neapolis çxhabte pa'tha'w. ¹² Txajũ
ki' u'jçxa', Fxilipos çxhabte pa'jçxa maz en
ũsu'tha'w. Txãa çxhaba' romanowe'sx iiyamu-
nisa wala jxtuhthesa yu'k Macedonia kiwete.

13 Teeçx jxkaase ente' çxhab eka kasehtha'w yu'wala pukate Dxus yakh puutx we'weya' pkhaakhenite, sa' Dxus yuwe's pta'sxtha'w kxte u'y pkhaakhesatx. 14 Aça' kxte pkhaakhesa teeçxsa' Lidiak yaase yu', Tiatira çxhabuwe'sx, tela zhiçxkwesatx txweysáa. Txãa u'ya' Dxusna nwēese'jsak txã'wē Pablo pta'sxni's wēse'jna u'pu'. Aça' Dxusa' txajx ũuste kaajiyu'kh Pablo pta'sxni's. 15 Txajū' txajx yattewe'sx yã'jçxa jxuka yu'te ya'bautisãyçxa', na'jīnak kwe'sxtxi pthaa we'wena pi'kx:

—Ū'kwe' Dxus yakh fxi'zewa'jsate i'kwe'sxa' ew jiiçxa', ũ'kwe yatte myuhwe dejxa' jīçxa āadxijimeeçxa pe'jna u'kh.

16 Teeçx ente nyafxii ũsnitey u'jweççxa', puutx uytha'w teeçx kna'sa's eçxthē'j txajx ũuste kaajiyu'the pta'sxna u'jusa yakh. Txãa kna'sa' patron jxpe'jnisa ku'ga yu', sa' patronwe'sxtxi wala vxyu kaaknayu'ju'ku'ga txã'wē kīhnawa ũuste jiyuçxa nasatx pta'sxna. 17 Txãa kna'sa' kwe'sx e'stey yuwe'k Pablo's na'wē sus we'wena:

—Naa piçthē'jwe'sxa' cielute Dxusna selpisaata', txāasatx i'kwe'sxtxi' pta'sxi' ewte u'jwa'j dxi'ja's jīna.

18 Maz enwa txã'wē yūute', nmehte' Pablo' kuçxçxa na'wēk we'we txãa kna'sa ũuste u'psa eçxthē'ja's:

—Jesukristo jxkaahni's nwēese'jçxa, txãa kna'sa ũusuh mkaaseh jīçpkaçxha', eçxthē'ja' kasejk.

19 Nawa patronwe'sxa' txãa kna'sa pa'gaçxáa vxyu knayna fxi'zeni's ivxiituyã'jçxa',

Pablowe'sxtxi uweçxa çxhab pxãhte jxũna u'jçxa
²⁰ kxte khuẽswe'sxtxi na'jĩnatx pãatxhĩ'kh:

—Naa piçthẽ'j judiuwe'sxa' wala kuçx yuuna
 ũsta' kwe'sx çxhabte. ²¹ Kĩhwa kwe'sxtxi
 selpiwa'jmeesaçxáanatx kaapiya'ja', aça'
 txã'sa' kxtey yuuya' ãjãme'nja'w, kwe'sxa'
 romano nasatha'w naa pa'ga jĩte', ²² nasa'
 wala ũusaçxana ahçetx. Aça' khuẽswe'sxa'
 Pablowe'sxtxi ksũupi'jçxa peçxuukwe kaahtx.
²³ Txã'wẽ wala pkxuuçxa', karcelte ktxaaja'jçxa
 kxte thegna ũssa's wala jxpa'yakx theg kaathe',
²⁴ kxte thegsa' karcel dxiite jwee dxiiju pe'jna
 u'jçxa telte çxidatx se'wçxak ki'p.

²⁵ Nawa Pablowe'sx kuspãh Dxus yakh
 puutx we'wena memna u'pte', vxite preesu'
 wẽse'jna u'ppkaçxha', ²⁶ ehd seena' çxhãçxha
 u'the', karcel vxitxa' jxuka phaattetx, aça' preesu
 tudni kadenawa çxuktetetx. ²⁷ Txajũ' karcelte
 thegsa yajkxçxa', karcel vxitx jxuka phaateçxa
 ũste uyçxa', kçxilxa's kutxi'jçxa peekiçxáa
 ya'ikhya'wak yu', preesu' jxuka kasehçxa u'jne'ta
 sũhna ũukhçxa. ²⁸ Aça' Pablo' na'wẽk we'we:

—Txã'wẽ yũunu. Jxuka ũstha'w ayte jĩte',
²⁹ karcelte thegsa' bela pki'taçxa ũukhna
 wuwuuçxáa kũhçxa, Pablowe'sx tasxte
 peejxũkwek. ³⁰ Txajũ' Pablowe'sxtxi kutxi'jçxa
 na'wẽk pẽjx:

—I'kwe'sxa' mpeeta'sxwe, ¿ma'wẽ yũuçxa
 Dxusa's uyuuki'th? jĩte', ³¹ Pablowe'sxa' na'wẽtx
 pta'sx:

—Kwe'sxtxi jxpe'jsa Jesukristo's jxpa'gaçxa
 yuuçxáa Dxus yakh fxi'zewa'ja's uyuune'ga petx

iidx yattewe'sx yã'jçxa jxuka.

³² Txajũ' Dxus yuwe's pta'sxtxi txajx yattewe'sx jxukaysatx. ³³ Sa' karcelte thegsa' txãa kustey Pablowe'sx kpã'tx pkhi'kxna'wa txajx yattewe'sx yã'jçxa jxukaysa ya'bautisãytxi. ³⁴ Txajũ' txajx yatna pe'jna u'jçxa puuçku, sa' wala weçxana üsu'k Dxus yakh fxi'zewa'ja's ji'phutha'w jxukaysa jïna.

³⁵ Txajũ' khuẽswe'sxa' kusii policia kaahtx karcelte thegsa tasxna Pablowe'sxtxi' txhweetekahn pta'sxya'. ³⁶ Aça' karcelte thegsa' pta'sxku Pablo's:

—Khuẽswe'sxa' txhweetekaahtx i'kwe'sxtxi'. Aça' kasehçxa üukhmée me'jwe jïte', ³⁷ Pablo' na'wêk we'we policiawe'sxtxi:

—Kwe'sxa' romano nasatewa ahçeçxa nasa jxuka uyna üste pkxuuçxa karcelte kxuuphtxi, kïh yũupa'ga yuuwetewa txã'sa' jiyumey. Sa' âçxha' paaçte kim yuhwa jiyunimeete txhweete'nja'w ¿sũjuwá'nta? Txã'wẽ yũuya' yu' ajameetxna. Kwe'sxtxi kutxi'jya' txãawe'sx yuu yuwetxna jïte', ³⁸ policiawe'sxa' u'jçxa khuẽswe'sxtxi txã'wẽy pta'sxte', txãawe'sxa' wala üukhtxi, Pablowe'sxa' romano nasatewa jiyuçxa'. ³⁹ Txajũ' khuẽswe'sxa' Pablowe'sx tasxna u'jçxa jxpubane'tka'w jïna pxthaa we'weçxa karceluh kutxi'jçxa çxhabuh kaseh kaahtx. ⁴⁰ Aça' Pablowe'sxa' karceluh kasehçxa', kxte çxhabte Lidia yatnatx u'j. Sa' üukhmée meswe jïna yakhthe'jwe'sxtxi kvxiisxa'jçxatx txajũ kaseh.

17

Tesalonikate nasa ũusçxani

¹ Pablo Silas yakh Anfxípolis Apolonia çxhabsu ktejkana u'jçxa, Tesalónika çxhabetx pa'j judiuwe'sx pkhaakheni yatte. ² Pablo' jxkaase ensu' tekx ki'supkaçxku Dxus libru ma'wēne' we'we' txã'sna kaapiya'jna ũsu' judiuwe'sx pkhaakheni yatte. ³ Sa' āatek pta'sx:

—Dxus tasxuh yuusa' wala pxthaa yuuçxa uuçxawa ki' ĩtxi yuuwa'jsak yu', aça' adx i'kwe'sxtxi pta'sxi'th Jesus jīna txãáik Dxus tasxuh yuusa Kristo yu'.

⁴ Txajũ' judiuwe'sx maai' yu' txã'wē Je-susa' Dxus tasxuh yuusa Kristo yuh yu'ne' sũhçxa Pablowe'sx ju'gutx yuu. Txã'wēy wala kuh griego Dxusna nwēese'jsawa utxaatx, vx-ite' u'ywa wala kuh utxaatx jxtuhthesawe'sx.

⁵ Txã'wē yũute', vxite judiuwe'sx Pablo pta'sxni's açesa yu' wala ũusaçxaçxa nasa ewmeesatx pkhakhçxa çxhabte wala seena' ksuusu'tx kuçx yuuna. Sa' Jasón yatte Pablowe'sxtxi pakweya' u'jtx txajũ kutxi'jçxa nasaa ksxavxyte dukhya'.

⁶ Nawa txãawe'sxtxi uymeeçxa', Jasón vx-ite' yakthē'jwe'sx kxte ũssaçxáatxwa wezxna u'jçxa çxhabte khuēs tasxte kuutxa'jçxa na'wētx wēesxu:

—Txãa nasa naa kiwe's jxuka kay-puba'jsawe'sx aytewa pa'tha, ⁷ aça' Jasona' txajx yattega jxpa'ga. Txãawe'sxa' jxukaysa açe'tx Romate jxkaahsa leya's, txã'wē vxite jxkaahsa Jesus yaasesa ũsa' jĩçxa.

⁸ Txã'jĩna we'wete', khuẽswe'sx nasa jxukaysa wala seena' sustxi. ⁹ Nawa Jasón vxite' txãa yakh ùssawe'sxtxi vxyu kusa'jçxaçxáa txhweetetx.

Pablo Silas yakh Bereate pa'jni

¹⁰ Kxte yakhthẽ'jwe'sxa' txãa kustey wala dud kaahtx Pablowe'sxtxi' Berea çxhabna. Kxte pa'jna'wa u'jtx judiuwe'sx pkhaakheni yatna. ¹¹ Kxte judiuwe'sxa' wala ew yu'tx Tesalonikatewe'sx na'wēmée. Dxus yuwe's wala weçxana jxpa'gaçxa, een isatx Dxus librute pakwé' Pablowe'sx pta'sxni isa dxihtawa jiyuya'. ¹² Txã'wẽ kxteewe'sx wala kuhsa jiyutx Pablo pta'sxni' isa yuh yu'ga sũhna, vxite' u'y griego jxtuhthesa petx piçthẽ'j yã'jçxa. ¹³ Nawa judiu Tesalonikatewe'sxa' txã'wẽ Pablo' Dxus yuwe's pta'sxna ùsa' Bereate jĩni's jiyuçxa', Berea çxhabna u'jçxa kxte nasatx wala seena' kaaũusçxa'jtx. ¹⁴ Aça' kxte yakhthẽ'jwe'sxa' jwee yu' kaajxthẽeyu'jmée Pablo's kaahtx Atenas dxi'j. Naasáa Silas Timoteo txãawe'sxçxáatx neeyũ Bereate. ¹⁵ Pablo yakh pi'kxna u'jsawe'sxa' Atenas çxhabna pa'jtx u'j. Sa' ki' Bereate sxawedna pa'jçxa', Pablo' i'kwe'sxtxi wala dud yuukaakh txãa yakh ùsya' jĩnatx pta'sx Silaswe'sxtxi'.

Atenas çxhabte Pablo pa'jni

¹⁶ Pablo' Atenas çxhabte Silas Timoteo txãawe'sxtxi ùythasna ùsçxa', wala kuh yajkxna fxi'ze'k txãa çxhaba' naa kiwete dxus ìtximeesaçxaçxáatxku txakwe wala ji'ph yu' naa pa'ga. ¹⁷ Txãasak judiuwe'sx pkhaakheni yatte

judiuwe'sx yakh vxite' judiumeeçxawa Dxusa's yaakxsawe'sx yakh puutx we'we', sa' çxhab pxãhsuwa een isak we'we' Dxus itximeesatx neewe'wesawe'sx yakh. ¹⁸ Txajũ' kxte epikúreo kaapiya'jni's piyana ũssawe'sx vxite' estóiko kaapiya'jni's piyana ũssawe'sx piçthē'ja' Pablo yakh puutx we'wetx, naapkaçxha' maaii yu' na'jĩnatx we'we' txãawe'sx pwe'sx:

—Naa thē'ja' çkĩki'k txakwe wala we'we'? jĩ'tx. Naapkaçxha' vxite we'weçxa':

—Dxus jiyunimeesatx kxsusnak pta'sxi' jĩ'tx.

Pablo' Jesus uuçxa ki' itxĩ yuuni's pta'sxpa'gatx txã'jĩna we'we'.

¹⁹ Txajũ' Pablo's teeçx ahte Areópago yaas- esate pe'jna u'jçxa paapējxtxi:

—Kwe'sxtxi meen peeta'sx na'wē yuwe u'sesa pta'sxi'g txã'sa' jiyu wēetha'w. ²⁰ Na'wē kĩhwa fxiysa pta'sxi'g txã'sa' ew āate mkaajiyu'j jĩna.

²¹ Txã'wē Atenastewe'sxa' jxukaysa pkhaakheçxa kĩhwa u'se kaapiya'jni's wēse'jna puutx paapējxnaçxáa fxi'zesatx yu', aça' vxite kiwejuwe'sx Atenaste u'p-ya' pa'jsawa txã'wēytxi yu'.

²² Txajũ' Pablo' Areópagote txãawe'sx ksx- avxyte yujuçxa we'wek:

—Atenastewe'sx i'kwe'sxa' dxusa's wala yaakxsane'kwe sũju'th. ²³ Msuuwa i'kwe'sx dxusa's neewe'wenisu thegna u'juçxa', uythu teeçx altalte na'wē fxi'jnisa: Jiyunimeesa Dxusa' jĩnisa. I'kwe'sx na'wē jiyunimeesa dxus jĩna neewe'wene'kwe txãa Dxus jiyunimeesa'sthu adxa' āate kaajiyu'ju'. ²⁴ Txãa Dxusku naa kiwe's vxitçxa kxte kĩjkĩhçxah ũstxna txãatxwa

jxuka vxit. Txãa pa'ga txãaíi namu' naa kiwe, cielu yã'jçxa. Txã' piçthê'jwe'sx txaahni yatsu ũsu'çme'. ²⁵ Txã' naa kiwete nasa pu'çxni fxi'zewa'jsame'. Txãaíik kwe'sx jxukaysa ítxi fxi'zewa'ja's ũs, kĭjkĭhnawa jxuka. ²⁶ Sa' nasa maazkuēesawa teeçx piçthê'j ji'jçxaçxáa yuwa'ja's vxitçxa, msuuçxah u'pwa'jsatewa pta'sxna ena'swa txuhdek nus pa'jn ki' sekna yuwa'ja's. ²⁷ Dxusa' ũsna sũhçxa pakweçxa' thëymée uykahnku txã'wē yũu. Aça' Dxusa's pakwete yu' kwe'sx yakh jxu'jmeete ũsa'. ²⁸ Kwe'sxa' Dxus ũste íçxáatha'w ítxi ēse'sena fxi'zeya' āja'. Dxus ũste ítix i'kwe'sx ji'j wala fxi'jya' jiisawe'sx na'wē we'we: Dxus taki'nitha'w jĭna. ²⁹ Txã'wē Dxus taki'niyã'jçxa', piçthê'jwe'sx ũs yajkçxna nasa na'wē piisani ũsta' vxyuu beh, vxyuu çxihme, kwet txã'wēsa' kwe'sxtxi taki'satxna sũhwa'j ji'phmeetha'w. ³⁰ Dxusa' nyafxii ensuy yu' ma'jĭme' nasa' jiimeeçxa ma'wēwa yũutewa. Nawa āçxha' jxukaytxi jxkaaja'k pkaltxi nvxihtçxa Dxusa'sçxáa pakwekahn. ³¹ Txã'wēme', Dxusa' teeçx ente naa kiwete yuuwesatx kastigãywa'jsa txhitxhku. Aça' txãa txhitxhnisa' kxtey yuuyujuna. Txã'wē yuuya' íçxáak uuçxawa ki' ítxi yuu.

³² Txã'wē uuçxawa ki' ítxi yuuk jĭni's wēse'jçxa', maaíi yu' weeçxtxi, naapkaçxha' vxite we'weçxa':

—Vxite enkhē ki' pta'sxine'ga, txagaçx ki' wēse'je'nja'w jĭ'tx.

³³ Txã'jĭyã'the', Pablo' u'kh. ³⁴ Nawa maaíi

yu' Pablo pta'sxni isa yuhna sũhçxa txãa yakh utxaatx. Kxte utxaasaawe'sx teeçxsa' Dionisio Areópagote pkhaakhesatewe'sxku yu', sa' teeçx u'y Dámaris yaasesawa utxaak, vxite yã'jçxa.

18

Korinto çxhabte Pablo pa'jni

¹ Txãa e'su', Pablo' Atenasuh kasehçxa Korinto çxhabnak u'j. ² Kxte' teeçx judiu Akila yaasesa yakhku puutx uy, Ponto kiwejuwe'sx. Akila txajx nyu Priscila yã'jçxa u'seçxáa Italiaju pa'jçxatx kxte ũsu', Romate jxkaahsa Klaudio' judiuwe'sxtxi txajũ jxuka kutxi'pha'ga. Aça' Pablo' txãawe'sx yatna u'jçxa Akilawe'sx yattek yuju. ³ Txãawe'sx na'wëy tultu kaççxak txweyna fxi'zesa yu', txãasak kxte neeyũu txãawe'sx yakh mjĩina. ⁴ Sa' jxkaase ensu' judiuwe'sx pkhaakheni yatna u'jçxa, kxte judiuwe'sx vxite' judiumeesatxwa Dxus yuwe's pta'sxi'k Dxus jĩ knayya'.

⁵ Silas Timoteo yakh Macedonia kiweju pa'the', Pablo' vxite mjĩia's nvxihtçxa, Dxus yuwe pta'sxwa'the yuuçxáak yuju een isa, Jesusa' Dxus tasxuh yuusa Kristo yuh yu'k jĩna judiuwe'sxtxi kaajiyu'jna. ⁶ Nawa txãawe'sxa' txã'wë pta'sxni's jxpeejxmeetha'w jĩçxa ahçena weeçxwa'ja's uytxi. Aça' Pablo':

—Adxa' yuuwemeeth, i'kwe'sxtxi pta'sx yã'th. Aça' yuuwesa' i'kwe'sxi'kwe peekx uuwa'ja's pakwena ũspa'ga jĩna txajx athni ropa's ya'tatak. Sa' txã'wë yũupa'ga ãçxha' u'jweçthu judiu ji'jmée vxite nasatx pta'sxya' jĩk.

⁷ Txã'jĩna'wa judiuwe'sx pkhaakheni yatuh kasehna'wa, teeçx piçthê'j Justo yaasesa yatnak u'j, judiuwe'sx pkhaakheni yat pukateyçxáa. Txãa piçthê'ja' Dxusna neewe'wena fxi'zesak yu'. ⁸ Txajũ' judiuwe'sx pkhaakheni yat-tewe'sx npiiçthê'jsa Krispo' txajx ũuste Jesusa's nwēese'jya' yajkxku petx txajx yattewe'sx yã'jçxa jxuka. Txã'wēy Korintotewe'sxwa wala kuhsa Kristo's jiyuçxa ũuste jxpa'gatx yu'te ya'bautisãyna.

⁹ Txãa e'su' Jesusa' teeçx kuste najĩnak vxyaaçxa we'we Pablo's:

—Weh yuhwa ũukhmée Dxus yuwe's mpeeta'sx. Txã'wēme', naa çxhabte adxna nwēese'jwa'jsa wala ũs íiçxáata'. ¹⁰ Txãa pa'ga adxa' idx yakh pi'kxna ũsthu, aça' kim yuhwa idxa's ikhya' yu' ãjameetxna.

¹¹ Txã'jĩyã'the', Pablo' Korinto çxhabte txãawe'sx ksxavxyte Dxus yuwe's kaapiya'jna ũsu'k anxu y medio ãhpkaçx.

¹² Nawa Akaya kiwete ne'jwe'sx Galión ensu' judiuwe'sxa' Pablo's ahçeçxa khuēs tasxte jxũna u'jtx. ¹³ Sa' najĩnatx pta'sx ne'jwe'sxa's:

—Dxusa's nwēese'jwa'ja's ley jxkaaja'k txãa jxkaahnijũ kasehçxa Dxusa's fxiiy nwēese'jwa'ja'sku kaapiya'ja' naa piçthê'ja' jĩte', ¹⁴ Pablo pasya'wagaçxha', ne'jwe'sx Galión khuē'y judiuwe'sxtxi we'wek:

—Yuwe ewmeesa's adxa's pãatxhĩ'kheçwaça', pu'çxhiwá'nja i'kwe'sx pãatxhĩ'khni's. ¹⁵ Nawa i'kwe'sx pwe'sx fxi'zeni leyçxá' aça' txã'sa' i'kwe'sx pwe'sx mpheu'jwe. Adxa' txãasu' thegu

ji'phmeeth jĭçxa, ¹⁶ txajũ eka kutxi'kh. ¹⁷ Aça' judiuwe'sx pkhaakheni yatte npiiçthē'jsa Sostenesa's uweçxa, pāpatx griegowe'sx jxukaysa ne'jwe'sx dxi'pte. Nawa Galiona' kuçx ma'jĭme'.

Pablo Dzus yuwe's pta'sxya' ki' kasejk naa yakha' tekh us

¹⁸ Txã'wētewa, Pablo' wala kuh en ũsu'k kxte. Txãa e'suk kxte yakhthē'jwe'sxçxáatx nvxihtçxa, Siria kiwen u'jwa'j ji'phu barkote khēeçxa Priscila Akila yã'jçxa. Txãa dxi'j u'jweççxa', Cenorea çxhabte pa'jçxa barkote khēmey txajx dxkhasa's jxuka ktxiidxi'k. Dzus yakh yuuçxáa fxi'zewa'ja's Dzus yakh puutx we'wenak txã'wē yũ. ¹⁹ Txajũ' Efxeso çxhabte pa'jçxa', Pablo' Priscila Akilawe'sxtxi nvxihtna'wa, judiuwe'sx pkhaakheni yatna u'kh, kxte judiuwe'sxtxi Dzus yuwe's kaajiyu'jya'. ²⁰ Aça' txãawe'sxa' wala pxthaa we'wetx kuh en ũskahn. Nawa Pablo' kxtey yuumée, ²¹ txajũ ki' kasejk na'jĭçxa:

—Jerusalente fxiesta u'puya'wa' kxte ũswa'j ji'pthu. Nawa ki' sxawedu'nja i'kwe'sxtxi thegya', Dzus ma'wē jxthãaste' jĭna we'weçxa, Efxeso çxhabuh barkote khēeçxa u'kh. ²² Sa' Cesarea çxhabte pa'jçxa', Jerusalennak u'j kxte pkhaakhesawe'sxtxi weçxaya'. Txajũ' Antiokía çxhabnak u'j. ²³ Kxte maz en ũsçxaçxáa, txajũ ki' kasejk Galacia Fxrigia kiwesu nyafxii pta'sxnisu jxuka pekũjxa', Dzus yakh fxi'zesawe'sxtxi kçxhãaçxha'jna.

Efxeso çxhabte Apolos Dzus yuwe's pta'sxni

²⁴ Txãa ensu' teeçx judiu Apolos yaasesa Alejadría çxhabuwe'sx pa'kh Efxeso çxhabte,

Dxus libru Moises fxi'jni's ew jiisa kaapiya'jya' sxiigmeesa. ²⁵ Sa' Jesukristo kimtewa pta'sxni jiik yu', txãasak Juan yu'te bautisãyniçxáana jiiçxawa txajx jiyuni yu'sa' jxpubamée kaapiya'ja'. ²⁶ Apolosa' judiuwe'sx pkhaakheni yatte u'kaçxa sxiigmeek pta'sxi'. Aça' Priscila Akilawe'sx jiyuçxa', txãa Apolos txã'sçxáa fxii pe'jna u'jçxa, jweeíçxáatx ew pta'sx Jesukristo yakh fxi'zewa'ja's jxuka. ²⁷ Aça' Apolosa' Akaya kiwen u'jweçte', yakhtê'jwe'sxa' u'jwa'ja's pu'çxçxa teeçx karta fxi'jtx Akayate yakhtê'jwe'sx wa'lmée jxpa'gakahn. Txã'wê Akayate pa'jçxa', wala pu'çxku Dxus peeygãhçxa nwe'wenisatx na'wê yūuna: ²⁸ Jesusa' Dxus tasxuh yuusa Kristo yuh yu'k, i'kwe'sx ūyhasni txã'sna i'kwe judiuwe'sx jxpuba jĩnak pta'sxi', Dxus librute ma'wê fxi'jni ūsna txãa yakh kaaja'da'jna.

19

Efxeso çxhabte Pablo pa'jni

¹ Apolosa' Korinto çxhabte ūspkaçxha', Pablo' yaçkhēy pekūhni kiwesu pa'jna u'jçxa Efxeso çxhabtek pa'j. Kxtea' Jesukristo's iiwēse'jsa yakh puutx uyçxa', ² na'wêk pējx:

—I'kwe'sxa' Jesukristo's jiyunijū' ¿Dxus Espiritu's jxpa'gakwe'? jĩte', na'wêtx pas:

—Dxus Espiritu's naa kiwete kaahnik yuu jiniçxáa yuhnawa iiwēse'jmeetha'w kwe'sxa'.

³ Txajū' Pablo' pējxku:

—I'kwe'sxa' ¿kĩh yūuya' sūhçxakwe ya'bautisãy? jĩte', txãawe'sx pasçxa':

—Juan pta'sxçxa': Ya'bautisâywa'ja' jïk aççxáatha'w ya'bautisây jïtx.

⁴ Txajü' Pablo' na'wêk pta'sx:

—Juana' yu'te bautisâyku pkaltxi nvxihtçxa peena yu' pkalte fxi'zemeene'kwe, Dxus tasxuh yuusa Kristo adx e'ste yuja' txã'sna jxpa'gaya' jïçxa bautisâysak yu' jïte', ⁵ txãawe'sxa' ya'bautisâytxi Jesusa's nwêese'jya' sũhçxa. ⁶ Txajü' Pablo' txãawe'sx dxikthesu peekizeçxa Dxusa's neewe'wete', Dxus Espiritu' txãawe'sx ũuste khêek. Aça' vxite yuweju we'weya' âjawa'ja's jxpa'gatx, sa' Dxus kïh yũuya'watewa dxiikhëy pta'sxya' âjatx. ⁷ Txã'wê yũusa' doce piçthê'jtx yu'.

⁸ Pablo' kxte ũsçxa' judiuwe'sx pkhaakheni yatna u'jna nesku yu' tekh a'tepkaçx. Sa' nasatx ewku kaajiyu'ju' Dxus jxkaahwa'j ena's. ⁹ Nawa vxite yu' txã'wê pta'sxni's wêse'j wêemeeçxa, açewe'wetx nasaa ksxavxyte. Aça' Pablo' txãawe'sx tasxuh txuteeçxa Jesukristo's jxpa'gasawe'sxtxi pe'jna u'kh Tiranno kaapiya'jni yatna, sa' kxte' een isak pta'sxi' e'z anxupkaçx. ¹⁰ Aça' Asia kiwesu u'psa jxukaysa jiyutx judiu vxite' judiumeesawa Jesus kaapiya'jni's. ¹¹ Txajü' Dxus pu'çxte', Pablo' nuykatxhi'k kïh weete âça'satxwa jxuka. ¹² Txã'wê yũuyã'the', Pablo ropa meeçxa' panxwelo kïhçxáanawa jxüna u'jwe'tx âça'sawe'sx jxa'dxkahn. Aça' txã's jxa'dxçxaçxáa kïh weejuwa katxhi'tx, txã'wêy eçxwa txãawe'sx ũusuh kaseje'tx.

¹³ Txã'wê yũute', judiuwe'sx dxijxuuçxa eçxtxi

nasaa ũusuh kutxi'jsawe'sxwa Jesus yase's kx-susçxa eçtxti kutxi'jya' na'wêtx we'we':

—Pablo kxsusnisa Jesus yasete jxkaajaçthu kasejkahn jīnatx we'we'. ¹⁴ Txã'wē yūusa' sacer-dote npiiçthē'j Escewa nçxi'k sietesatx txã'wē yu'. ¹⁵ Makwe txã'wē we'wetewa, eçxa' na'wēk pas:

—Jesusa's jiith kimtewa, sa' Pablo'swa iiuythu. Nawa i'kwe'sx yuutxi' jiimeeth kimtewa. ¹⁶ Txã'jīna'wa txāa eçx iiyamunisa nasa' jxkaahna we'wesawe'sx kakwete āaphçxa, txāawe'sx athni ropatx sudena kpā'vxitna yūute', txāawe'sxa' ũphna u'jtx sūpçxçāa. ¹⁷ Txã'wē yūuni's Efxeso çxhabte ũssa judiuwe'sx vxite' judiimeesawa jiyuçxa' Jesus yase's kxsusya' wala ũukhtxi, sa' Jesusa's weçxanaçxáatx fxi'ze'.

¹⁸ Txajū' Pablo pta'sxni' ewsa yuhna sūhçxa maazkuēesawa utxaatx txāawe'sx ewmée yūuna fxi'zeni's āate pta'sxna. ¹⁹ Aça' txã'wēy dxijxuuna fxi'zesawa jxukay txāawe'sx libru ewmeesatx jxūna pa'jçxa', jxukaysa dxi'pte kabtxi. Txāa libru' jxukaçxah yu' cinkwenta mil peso āhtx pa'gasa yu'. ²⁰ Txã'wē yūute', Dxus yuwe' jwee'çxçāak çxhãçxha walaana u'j.

²¹ Txāa e'su', Pablo' Jerusalenna u'jweççxa', Macedonia Akaya kiwesu pa'jna u'jya'k yajkx. Sa' Jerusalenuh Roma çxhabnawa u'jwe'nja sūhnak yajkx. ²² Txajū' Macedonia kiwen kaakh txã'sna pu'çxna u'jusa Timoteo vxite' Erasto txāawe'sx e'zsatx. Nawa txāa yu' nee Asia kiwete ũsu'k maz en.

Efxeso çxhabte nasa ũusçxani

²³ Txãn ensu' wala seena' sustxi Dvus yuwe's ahçeçxaçxáa. ²⁴ Txãa yuwe kiissa yu' Demetrio vxyuu çxihme's dxus Diana ũsni yat na'wẽ pheu'jçxa txãa yakh mjĩisatx wala vxyu kaak-nayu'jsak txã'wẽ yũ. ²⁵ Sa' txãa yakh mjĩisa vx-ite' txãa na'wẽy pheu'jsatxwa jxuka pkhakhçxa na'jĩk:

—I'kwe'sxa' jii i'kwe na'wẽ mjĩiçxa' kĩh yuhwa peejxmeetha'w vxyu uyu'. ²⁶ Nawa i'kwe'sxa' iiwẽse'jne'kwe Pablo jĩnisa' naa çxhab Efx-esoteçxáamée, Asia kiwete msuuwa nasatxi' jxuka txajx ju'gu tuphiça', txã'wẽ piçthẽ'jwe'sx pheu'jni dxusa' itximeesata' jĩçxa. ²⁷ Na'sa' mpa'yajkxwe. Txã'wẽ yũumeete', kwe'sx mjĩiniçxáa vxitumée, dxus Diana ũsni yat tx-akwe wala jxtuhthesa yuu vxituna. Aça' Asia kiwetewe'sx jwee vxite kiwetewe'sxwa dxus Diana txakwe zhiçxkwesa's jwee yu' nwẽese'jmeetxna.

²⁸ Txã'jĩna we'wete', wala ũusaçxaçxa na'jĩnatx sus we'we:

—jEfxeso çxhabte dxus Diana yuuçxáa maatewa jxthaakwe jxtuhthesa! jĩnatx sus. ²⁹ Aça' txãa çxhabtewe'sx jxuka ũusaçxaçxa e'z piçthẽ'j Macedoniajũwe'sx Pablo's pi'kxna yuusa Gayo Aristarko txãawe'sxçxáatx uweçxa wezxna u'jtx çxhabte txãawe'sx ũsnite. ³⁰ Pablo' kxte u'ka wëek nasatx we'weya'. Nawa kxte yakhthẽ'jwe'sxa' ka'ga'jmeeta'. ³¹ Txã'wẽy Pablo namiku khuẽswe'sx jxtuhthesawa Pablo's kuçx kxte u'kakaahmeeta'. ³² Naapkaçxha' pkhaakhesa yu' kĩjkĩhwa ũusçxa we'wena

seena'tx susna ũsu'. Nawa kxte pkhaakhe pu'çxsa jwee kuhsa yu' jiimeetx yu' kīh yūupa'ga txã'wē pkhaaketewa. ³³ Nawa kxte ũssa maaíi yu' kīh yūupa'ga ũusaçxana ũstewa jiisa', teeçx piçthē'j Alejandro yaasesa's pta'sxçxa nasaa ksxavxyte ukapajkxna nuykūhtx we'wewa'jsa. Aça' txãa piçthē'ja' sxuuna' yuuwa'ja's kuseju pta'sxçxa judiuwe'sxa' yuuwemeetha'w jīna we'we wēek. ³⁴ Nawa judiu içxáatewa jiyuçxa', jxukaysa ki' sus we'wetx e'z ora āhpkaçx na'jīna:

—¡Efxeso çxhabte dxus Diana yuuçxáa maatewa jxthaakwe jxtuhthesa'! jīna.

³⁵ Txajū' çxhabte sekretario' pejka sxuuna' vxitçxa' na'jīk:

—Efxesotewe'sx mwēese'jwe. Naa çxhabte nasa' dxus Diana ũsni yata's wala jxpa'yakx thegna vxite' Diana's piisanisa cieluju kījk txã'snawa txã'wēy ew jxpe'jwa'jsatewa jxuka jiita' maa kiwetewe'sxwa. ³⁶ Aça' ¿ma'wē yūuçxa txã'sa' thegmée nvxiht-ya' ājatxki? Txã'wē yu' yuumeetxna. Txãa pa'ga wejx kuh yajkxmée sxuuna' myuuwe. ³⁷ Txãa pa'gatey e'z piçthē'j i'kwe'sx jxūna kūji'kwe txāawe'sxa' i'kwe'sx dxus Diana's suwwameeta' sa' açewe'wenawa ũsmeeta'. ³⁸ Meeçxa' Demetrio vxite' txãa yakh mjīisawe'sxçxáa maa yakh iipuiisaçxawa, pāatxhī'khwa'j ji'phta', txãa pa'gatey khuēswe'sx ũsta', aça' txāawe'sx tasxte pāatxhī'khya' u'jwetxna, kxah kaapdxipu'jçxa yuwe's pheu'jutxna kīhteçxah yuuwesatewa. ³⁹ I'kwe'sxa' khuēs tasxtemée i'kwe'sx pwe'sxçxáa puutx we'wewa'j ji'phçxawa, zhiçxkwe mpuutxwe'wewe

txã'wẽ susmée. ⁴⁰ Na'wẽ ãçxh susni yuwe's
gobierno' paapëyiwáana açã' seena' ewmeete
neeyũuwa'the ũstha'w, kĩhwa yuuwemeete
suspa'ga.

⁴¹ Txã'wẽ we'weçxa', kaapçu'juk txãa susni's.

20

Macedonia vxite' Grecia kiwen Pablo u'jni

¹ Yuwe susni pçuute', Pablo' Dxus yakh
fxi'zesawe'stxxi pa'yaçxa wala ew yu'kxpehçxak
txãawe'stxxi weçxaçxa Macedonia kiwen u'j.

² Txãa kiwesu jxuka pekũjk yakhthẽ'jwe'sx
ũukhwe'sxte kçxhãaçxha'jna. Sa' txajũ' Gre-
cia kiwenwa u'kh. ³ Kxte tekh a'te ũçxa',

barkote khêeçxa Siria kiwen u'jya'wak yu'.
Nawa judiuwe'sx ikhya'wata' txãa dxi'the jĩni's
jiyuçxaçxáa, barkote u'jmée çxidaçxáa maa
dxi'june' pa'j txã'wẽyku sxawedxa' yajkx, Mace-
donia kiwejuy uykhẽwna. ⁴ Txãa yakh pi'kxna
u'jtx Sópater Bereajuwe'sx, Aristarko vxite'
Segudo Tesalonikajuwe'sx vxite' Gayo Derbe-
juwe'sx vxite' Timoteo vxite' Tíkiko Trófximo
txãawe'sxa' Asia kiwetewe'stxxi yu'. ⁵ Txãa
yakhthẽ'jwe'sxa' dxi'j pxãjũ yaçte u'jçxa Troas
çxhabtetx kwe'stxxi ũythas. ⁶ Pan lewadura
ji'phmée ũ'ni fxiesta skhẽwniitetha'w kwe'sxa'

kaseh, Fxilipos çxhabuh barkote khêeçxa, sa'
tahç ente' kpajkxtha'w Troas çxhabte. Kxte siete
entha'w ũsu'.

Troas çxhabte Pablo weçxaya' pa'jni

⁷ Ki'sen ente', Dxus yakh fxi'zesawe'sx yakh
pkhaakhetha'w kxteçxah pkhaakheçxa ũ'ya'.

Naapkaçxha' Pablo' Dxus yuwe's kaapiya'kh. Txã'wê kuskuskhê' u'jwe ji'phçxa', txaçx kus-pxâhnpkaçxku pta'sxna ũsu', ⁸ teeçx piesate êete wala kuh lampara pki'tanisa ũsu'tx kx-tee. ⁹ Aça' kxte teeçx piçtakx Eutiko yaasesak wentanate kaçxçxa u'pu'. Txã'wê Pablo' wala jxu'j we'wete', txãa piçtakxa' dee wêeçxa dehna u'píi saapajkxku yat êe walaju, aça' uuniisa'stxi kiis. ¹⁰ Txã'wê yũute', Pablo' sa'jçxa, txãa uusa's psxa'dçxa na'wêk we'we:

—Yakhthê'jwe'sx, nxusnuwe, ki' îtxi yuuk jĩnak pta'sx. ¹¹ Txajũ' Pablo' ki' êe yatte tejkaçxa Santa Cena's puuçku. Txã'wê yũuçxa khikhyna sêhpkçaçx pta'sxçxak u'j. ¹² Txãa piçtakxa' ki' îtxi yuute', pe'jna u'jçxa jxukaysa wala weçxana neeyũutx.

Troas çxhabu Mileto çxhabna u'jni

¹³ Kwe'sxa' barkote khêeçxa yaçte u'tha'w Asón çxhabna, Pablo's kxte ũythasya'. Naapkaçxha' txã' çxidajk u'j. ¹⁴ Asón çxhabujk kwe'sx yakh barkote khêe, aça' txajũtha'w Mitilene çxhabna u'j. ¹⁵ Txajũ ki' kasehçxa vxite enkhê' Kío kiwe pukasutha'w skhêw. Sa' vxite enkhê' Samos kiwetek barko' dudte utxaa. Txajũ ki' u'jçxa', teeçx ahte Trogilio yaasesate pa'jçxatha'w jxkaase. Txajũ' vxite enkhê' ki' u'jçxa' Mileto çxhabte pa'tha'w. ¹⁶ Pablo' Asia kiwete jxthêeyuuya'mée, Êfxeso çxhabte u'kame', Jerusalente dud pa'jçxa Pentekostes fxiestate ũsya' sũhçxa.

Mileto çxhabu Efxesotewe'stxxi pa'yani

17 Sa' Mileto çxhabte pa'jçxa', Efxeso çxhabte ancianowe'sxtxi pa'yak na'wě we'weya':

18 —Adxa' Asia kiwete nyafxçxah pa'jii kīhtka yūuna fxi'ze āçxpkaçx txā'sa' i'kwe'sxa' jii i'kwe. 19 Judiuwe'sx açepa'ga txakwe wala nxuswa'j en pa'thewa, Jesukristo's een isa selpiina bagaçxtewa i'kwe'sxtxi ũ'ne petx khakh pu'çxna nesthu yu' kim yuhnawa iiwejçx we'wemée. 20 I'kwe'sxtxi selpiwa'jsa Dxus yuwe's pta'sxmée yu' yuumée, nasaa ksxavxysu yat-suwa kaapiya'jna nesthu yu'.

21 Txā'wěy judiuwe'sx vxite' judiu ji'jmée txāawe'sxtxiwa jxukaysatx pta'sxthu: Dxus tasxte sxawedxa' pkaltxi nvxihtçxa kwe'sxtxi jxpe'jsa Jesukristo'swa ũuste miipa'gawe jīna.

22 Āçxha' u'jweçthu Jerusalenna Espiritu kaahni. Nawa jiiimée u'jweçthu kxte jwee kīhçxa yuune'thewa. 23 Naasáa na'wě yuuçxáa jiith: maa çxhabte u'thewa Dxus Espiritu' pta'sxna nesku yu' karcelte kxuuphni wala nxuswa'j ji'phgu jīna. 24 Nawa txā'sa' yaaki'çmeeth, sa' adx uuwa'ja's yuhwa ũukhu'çmeeth. Jesukristo neewe'wek Dxus peeygāani's txā'sna uu entepkaçx weçxana pta'sxna fxi'zewaççxáa, txā'wěena sūju'th.

25 Ayte i'kwe'sx yakh ũsçxa' Dxus jxkaahwa'j ena's pta'sxthu txā's wěse'jsa aytewe'sxa' adxa's āçxhuyā'ja' peena yu' uymeene'kwe sūju'th.

26 Nawa adxa' i'kwe'sxtxi kaapiya'jyā'th na' yuuwemeeth, 27 txāa pa'gatey Dxus jxthāasni's paaçte nvxihtmée jxuka āateçxaçxáath pta'sx naa pa'ga. 28 Aça' āçxha' peekii

ya'mpa'yajkxwe, txã'wëy Jesukristo ee pkawçxa weynisa Dxus luuçtxxiwa ew jxpe'jna, Dxus Espiritu' i'kwe'sxtxik thegwa'jsa nvxiht naa pa'ga. ²⁹ Jiith adx u'the', vxite pa'jatxna Dxus yakh fxi'zesawe'sxtxi ivxiitu wëena, sxĩ'j weesweewa ma'wëta piisxaatx ivxiitu' txã'wëy yũuya'. ³⁰ Jxpa'yakxmeeçxa', i'kwe'sx pwe'sxiiwa kasejene'kwe isasa's pta'sxipkaçxte kaypuba'jwa'jçxá's pta'sxna Dxus yakh fxi'zesatx kaypuba'jna. ³¹ I'kwe'sxa' miiyajkxwe, adxa' tekx anxuth teeçxsa na'wëçxah yu'kxpehna ũsu' en petx kus yã'jçxa ũ'ne petx khakh.

³² Āçxha' yakthë'jwe'sxtxi Dxusa's neewe'weçxa txajx kusete nvxiituçthtu txajx kaapiya'jni's peçxkanamée fxi'zekahn, txãa pa'gatey txajx yuwe' kçxhãaçxha'jna weçxana kaafx'i'ze'jçxa cielute txajx nwe'wenisa jxukaysa yakh ũswa'ja'swa ũsya' ājawa'jsa'. ³³ Adxa' i'kwe'sx yakh ũsçxa', vxyu, ropa, txã'wësa pees jxthãasna fxi'zemeeth kim yuhnawa. ³⁴ I'kwe'sxa' ew jii i'kwe txã'wë yũumée, adx kuseju mjiiçxath kĩh peejini'swa uyu', vxite' adx yakh u'jusawe'sx jiiwa txã'wëy. ³⁵ Txã'wë vxite jxpeejsatx pu'çxwa'ja's kaapiya'jnath fxi'ze bagaçxtewa. Txã'wë yũukahniik Jesukristowa na'jĩ': Peessa yakh wejx weçxa yuja' jxpa'gasate jxthaakwe jĩ'k.

³⁶ Pablo' we'wena jxã'jçxa', jxukaysa yakh peejxūkweçxa Dxus yakh puutx we'wek. ³⁷ Txajũ' jxukaysa ũ'nena psxa'dçxa Pablo's weçxatx. ³⁸ Txã'wë peena yu' uymeene'kwe jĩte', wala nxusna ũsu'tx, sa' pi'kxna u'jtx barkote

khêepkaçx.

21

Jerusalenna Pablo u'jni

¹ Yakhthê'jwe'stxxi nvxihtçxa, barkote khêena'wa tehwed u'tha'w teeçx ahte Kos yaasesate. Sa' vxite enkhê' Rodas kiwete pa'tha'w. Txãajũ Pátara çxhabnatha'w u'j. ² Pátara çxhabte pa'jçxa, teeçx barko uytha'w Fxenicia kiwen u'jsa, txãatetha'w khêeçxa u'j. ³ Çxipre kiwe's uynatha'w skhêw, txã' jebu ju'guk neeyũu. Txã'wê u'jçxatha'w Siria kiwete pa'j. Sa' Tiro çxhabte u'katha'w barko' kxte karga spãasxa'kh ji'phu' naa pa'ga. ⁴ Kxte' Kristo's nwêese'jsawe'stxxitha'w uy, sa' siete entha'w ũsu' txãawe'sx yakh. Aça' txãawe'stxxi Dxus Espiritu kaajiyu'the', Pablo's pta'stxxi Jerusalenna u'jmeene'ga jïna. ⁵ Txã'wêtewa, siete en skhêuuçpkaçxha', kasehtha'w. Aça' Kristo's nwêese'jsawe'sx jxukaysa nyuuwe'sx petx luuçx yã'jçxa pi'kxna yuwe'tx çxhab ekaju kasehpkaçx. Sa' kxte ìkh pukate peejxũkweçxa Dxus yakh puutx we'weçxa, ⁶ psxa'dna weçxana'wa barkote khêetha'w. Naapkaçxha' txãawe'sxa' sxawedtxi yatna. ⁷ Kwe'sxa' Tiro çxhabuh barkote u'jçxa, Tolemada çxhabtetha'w pa'j. Kxte teeçx entha'w ũsu' yakhthê'jwe'stxxi weçxana. ⁸ Vxite kuskuskhê' Pablo vxite' txãa yakh u'jusa yã'jçxa kasehtha'w Cesarea çxhabna u'jya'. Kxte pa'jçxa', Fxeliye yatna u'jçxa kxtetha'w deh. Txãa yu' Pedro txhitxhku siete diákono

txãatewe'sxku yu' Jesukristo kaapiya'jni's jxpa'gaçxa pta'sxna pekũhsa. ⁹ Txãa Fxelipe' pahz niisa kna'sasak ji'phu', Dxus we'weni's pta'sxsa. ¹⁰ Kxte maz en ũspkaçxa', teeçx piçthê'j pa'kh, Agabo yaasesa Judea kiwejuwe'sx, Dxus kîh yũuya'watewa dxiikhêy pta'sxsa. ¹¹ Txã' kwe'sxtxi puutx uyçxa', Pablo jxtudni's pējxçxa peekiçxáa çxida petx kuse yakh ya'jytudçxa na'wêk we'we:

—Dxus Espiritu' pta'sxi'k, Jerusalente judi-
uwe'sxa' naa jxtudni namu's na'wê tudçxa vxite
nasatx dukhetxna jîk.

¹² Txã'jîni's wêse'jçxa', kwe'sx vxite'
Cesareatewe'sx yã'jçxa wala neevxisxatha'w
Pablo's Jerusalenna u'khamen. ¹³ Nawa Pablo'
na'wêk pas:

—¿Kîjxa'kwe txakwe nxusna ũ'ne', adxna
khaawâsxi'j wêeçxa? Adxa' Jesukristo's selpi-
ipa'ga tudniçxáa yuumée, Jerusalente uuwa'j
ma'k yuu nawa txã'sa' ũukhu'çmeeth jîk.

¹⁴ Neevxisxaya' ãjameeyã'jçxa', Dxus ma'wê
jxthãaste' kxtey yuuna jînaçxáatha'w we'we.

¹⁵ Txãa e'su', pheu'jna'wa Jerusalenna u'tha'w.
¹⁶ Aça' Cesareate yakhthê'jwe'sx pi'kxna
yuwe'tx, vxite' txãawe'sx yakh teeçx piçthê'j
Çxipre kiwejuwe'sx, wala txaçxyã'j Dxus yakh
fxi'zesa Mnasón yaasesawa yuwe'k. Aça'
kwe'sxa' txajx yatte dejxa'tha'w puutx we'we.

Pablo Jerusalente pa'jçxa Jakobo tasxna u'jni

¹⁷ Jerusalente pa'the', kxte yakhthê'jwe'sxa'
wala weçxana jxpa'gatx. ¹⁸ Vxite enkhê' Pablo'
kwe'sx yakh u'kh Jakobo yatna pa'jya', aça' kxtea'

ancianowe'sx jxukaysatx ũsu'. ¹⁹ Pablo' weçxana jxã'jçxa', pta'sxku judiu ji'jmée vxite nasa ksx-avxysuwa Dxus yuwe's pta'sxte', txãawe'sxtxi Dxus ma'wē yūuni'swa jxuka. ²⁰ Aça' wēse'jçxa', Dxusa's wala weçxaçxa na'wētx pta'sx Pablo's:

—Yakhthē'j, idxa' jiiyã'jne'ga judiu ji'jwe'sx wala kuhsa Jesus kaapiya'jni's jxpa'gasa ũsta', sa' txãawe'sxa' Moises leya's nvxihtmeete ewna jī'tx. ²¹ Txãawe'sxa' na'jīni'sta jiyu:

Idxa' judiuwe'sx jxukaysatx vxite kiwejuwe'sxtxi kaapiya'jçxa Moises jxkaahni's nwēese'jmeene'kwe, sa' i'kwe'sx luuçxtxiwa cirkuncidāimeene'kwe, kīh yuhnawa kxtey yuuwa'jme', txã'jīnak pta'sxi' jīni's jīita'.

²² Sa' iidx pa'jni's jiyuçxa', txãawe'sxa' idxa's wēse'jya' pkhaakhetxna, aça' ¿kīh yūukxtha'w?

²³ Wejxwa na'wē yūune'ga: Ayte pahz piçthē'j ũsta'. Txãawe'sxa' Dxus yatte u'kaya' ājawa'ja's Moises ley jxkaaja'k txã'sa' kxtey yuuya' ũsta'.

²⁴ Aça' idxa' txãawe'sxtxi dxuus yatna pe'jna u'jçxa ley jxkaahni ki'swa'ja's kxtey kxu'ju'june'ga petx idx yã'jçxa. Sa' kxte dukhwa'ja'swa idxçxaçxáa deweene'ga. Txajū' txãawe'sxa' dxkhasa's ktxiidxi'jītxna idxwa txã'wēy. Txã'wē leya's kxtey yuute', maawa jiyutxna txã'wē Pablo' leya's nvxiitwa'ja' jīnak jxkaaja' jīçxa' īsxīja'ne'ta sūhna.

²⁵ Nawa judiu ji'jmée vxite nasaçxawa Jesus kaapiya'jni's jxpa'gasawe'sx yu' ley jxkaahni's kxtey yuuwa'j ji'phmeeta'. Txãawe'sxtxi' kwe'sxa' pta'sxna fxi'jyã'tha'w na'wē yūuwa'ja's: Dxus ītximeesatx weçxaya' tajkx ikhni çxiçxa's ũ'wa'jme', eenawa ũ'wa'jme', tajkxa's thukçxa

ikhnisa çxiçxa'swa ù'wa'jme', sa' ptammeesa' pkal yūuna fxi'zewa'jme' jīna pta'sxnisaçxá's kxtey yuuwa'jsata' jītx.

Dxuus yatte Pablo's tudni

²⁶ Txajū' Pablo' txāa pahz piçthē'jtx pe'jna u'jçxa', kuskus enkhē' ley jxkaahni's jxuka kxtey yuuçxak dxuus yat dxiite u'ka kīh entepkaçx ki'sya'waçxawa txāatx pta'sxya'.

²⁷ Sa' siete en ki'swa'jtx jxuka jxā'jaçpkaçxha', Asia kiwejuwe'sx judiuwe'sx pa'jçxa Pablo's dxuus yatte uyçxa', nasa jxukaysatx kaaūusçxa'jna'wa Pablo's tudçxa ²⁸ na'wētx sus we'we:

—Israelwe'sx, mpu'çxwe. Naa piçthē'jīik msuuwa jxuka nasa jxukaysatx kaapiya'jna pekūju' kwe'sx jī'jtx açewe'wena, Moises ley-nawa txā'wēy. Sa' dxuus yatnawa açewe'we'k. Sa' txā'wēçxāa yūumée, āçxha' judiu jī'jmée griegowe'sxtxiwa dxuus yat dxiite ka'gak kazx vxitna jī'tx.

²⁹ Efxeso çxhabuwe'sx Trófximo yakh Pablo' Jerusalente ūste ne'ta uy, txāasatx dxuus yat dxiite ka'ga'jne' sūhçxa txā'jīna we'we'.

³⁰ Txā'jīna pta'sxni seena' suste', nasa' wala dud kūhçxa Pablo's tudçxa dxuus yat ekaju wezxa kutxi'jiçpkaçxha', vxitxa's aphtxi.

³¹ Ikhya'watx yu', nawa komadante' jiyuk Jerusalen çxhabetewe'sx seena' susna ūsta' jīni's. ³² Txajū' komadante' soldau vxite' txāawe'sx pwe'sx jxtuhthesatx pkhakhçxa wuuuçxáatx kūh nasa susna ūsnite. Aça' komadante vxite' soldauwe'sxtxi uyçxa', Pablo's

ikhmeeta'. ³³ Txajũ' komadante kũhçxa Pablo's e'z kadenajuk tudkaah. Txã'wẽ yũuçxak pẽjx çkimna sa' kĩnga yũu? jĩna. ³⁴ Nawa nasa txã'wẽ jxukaysa sus we'wena ũste', komadante jiyuya' ãjameeçxa', kuartel yatna jxũna u'khaakh. ³⁵ Kuartel yat vxitxte kũhnaçxáa soldauwe'sxa' Pablo's yakhçxatx u'j, txã'wẽ nasa' ikh wẽesa e'ste neeuna:

³⁶ —Naa piçthẽ'ja's ikhwa'ja' jĩna sus we'wena yuupa'ga.

Pablo kuartel vxitxuh we'weni

³⁷ Pablo's kuartel yatte ka'ga'jaçte', txã' na'wẽk we'we griego yuweju komadante's:

—¿Maz yuweçxáawa kwe'we'jmeema'g? jĩte', komadante pasçxa':

—Idxa' çgriegowá'ga? ³⁸ Txã'wẽçxa' çnyafxíi entey teeçx Egiptujuwe'sx na'wẽ nasa ikhsaçxaçxáatx kuarto mil ãh nasa u'pnimeete pkhakhçxa puii kiisku txãameene'ga? jĩte',

³⁹ Pablo' na'jĩk:

—Adxa' judiuth. Cilicia kiwete Tarso çxhab jxtuhthesatewe'sxthu. Aça' naa nasatx we'wewa'ja's ũsune'ga jĩte', ⁴⁰ komadante' ũythasku. Naapkaçxha' Pablo' kuartel vxitxte yujuna'wa kuseju sxuuna' yuwa'ja's pta'sxte', jxuka sxuuna' yuutx, aça' na'wẽk we'we hebreo yuweju:

22

¹ —Yakhthẽ'j vxite' thẽ'jsawe'sx, mwẽese'jwe adx we'weni's jĩte', ² hebreo yuweju we'weni's wẽese'jçxa', wejxtxi sxuuna' yuu. Txajũ' Pablo' na'jĩk:

³ —Adxa' judiuth, Cilicia kiwete Tarso çxhabte upxsa. Nawa ayte Jerusalente Gamaliel kaapiya'jni walasaath, kwe'sx yaçgawe'sx leya's wala ew nwēese'jna. Bagaçxtewa Dxusa's ūusuh jxukath selpiina fxi'ze', naa ente i'kwe'sx ma'wēkwe selpi' txā'wēy. ⁴ Adxa' nyafxí' Jesus kaapiya'jni's nwēese'jsatx ahçeçxa kiikhe'jna vxitetxi' tudçxa jxūna u'th piçthē'j petx u'y yā'jçxa karcelte txajxa'. ⁵ Sacerdote npiçthē'j vxite' judiu nthē'jsawe'sx jxukaysa jiita' txā'wē Jesukristo yakh fxi'zesatx tudwa'ja's Damaskote yakhthē'j judiuwe'sxtxi pta'sxna karta pēyni's. Txā'wē yūuçxath u'j tudçxa ay Jerusalente nuypa'jçxa kastigāyya'.

*Pablo' Dxus yakh fxi'zeyā' utxaaççxa txāa ma'wēne' yūu txā'sna pta'sxni
(Hch 9.1-19; 26.12-18)*

⁶ Nawa adxa' ēepxāh Damasko çxhabte utx-aana pa'jaçpkaçxha', naa dudte ēe walaju eenak kweeth adx dxi'pte uymeenus. ⁷ Aça' kiwega we-teeçpkaçxha', na'wēk we'weni pthūuse: Saulo, Saulo, çkīh yūupa'gaga adxa's ahçeçxa pkxuuya' pakwé'? jīte', ⁸ pējxthu: Idxa' çkimga? Txajū' na'wēk pta'sx: Idx na'wē ahçeçxa pkxuuya' pakwe'g txāath Jesus Nasarethuwe'sx jīk. ⁹ Aça' adx yakh u'jsa' txā'wē eena' kweethni's uyçxa wala ūukhtxi. Nawa adxa's we'weni yu'sa' jiyumeeta'. ¹⁰ Txajū' adxa' na'jīnath we'we: çKīhga yūu jxthāasu'? jīte', Kiiteçxa Damaskon me'j, kxte ya'pta'sxina kīh yūuwa'ja'swa jīnak jxkaah. ¹¹ Txā'wē eena' kweethnijūçxāa uyya'

ājāmeete', adx yakh pi'kxna u'jsawe'sxa' adxa's pu'kisçxa u'jtx Damaskote pa'j.

¹² Kxtea' teeçx piçthē'j u'pu'k Ananias yaasesa, Moises leya's jxuka nwēese'jsa. Txā'wē nwēese'pha'gatx kxte judiuwe'sxa' txāa Ananiasa's wala jxtuhthesa' jīna we'we'.

¹³ Txāa Ananiasa' adxa's thegya' pa'jçxa', na'wēk we'we: Yakhthē'j Saulo, idxa' uyya' ājawa'ja's ki' mpa'ga jīçpkaçxha', thegçxa' uyya' ājath.

¹⁴ Txajū' na'wēk pta'sx: Kwe'sx yaçgawe'sxtxi jxpe'jsa Dxusa' idxa's nyafxiiiteyku txhitx txā'sna nwēese'jwa'jsa, sa' kīh pkal yuhwa jī'phmeesa's yafxju uyçxa txajx yuweju we'weni'swa wēse'jwa'jsa.

¹⁵ Āçxha' idxa' naa kiwete jxukaysa dxi'pte Dxus yuwe's pta'sxya' u'jwene'ga sa' ma'wēçxahne'ga uyna wēse'jna yuu txā'snawa pta'sxya'.

¹⁶ Sa' ¿kījxa'çxāa txakwe wala jxthēeyuuki'g? Āçxhīi kiitena'wa yu'te ya'bautisāyçxa Jesukristo's ūusuh jxuka miijajkx iidx pkal peltunāyni yuukahn jīnak jxkaah.

Judiu jījmée vxite nasatx Dxus yuwe's pta'sxya' kaahni's Pablo pta'sxni

¹⁷ Txāa e'su' Jerusalenna ki' sxawedçxa dxuus yatna Dxus yakh puutx we'weya' u'the', Jesusa' adxa's kxte vxyaaçxa, ¹⁸ na'wēk we'we: Jerusalenuh dudçxāa mkaaseh. Txā'wēme', idxa' makwe pta'sxtewa nwēese'jmeetxna jīte',

¹⁹ na'wēth pas: Adx txā'wē judiuwe'sx pkhaakheni yat-su u'jçxa kxsū idxna neewe'wesatx karcelte txahna vxitetxi' kxuuphsath. ²⁰ Sa' idxna neewe'wena selpisāa

Esteban eea's pkawuuctewa uynath ũsu', txã'wẽ yũuni ewna sũhna. Sa' ikhsawe'sx atxhtxi thegsath yu' jĩtewa, ²¹ Jesusa' na'jĩnak jxkaah: Me'jçxáa, adxa' jxu'j kaajxa'wath judiu ji'jmée vxite nasatx pta'sxya' jĩk.

Pablo's komadante nwe'weni

²² Txã'wẽ judiu ji'jmée vxite nasatx pta'sxya' jĩni's wese'jçxatx, ki' ũusaçxana na'jĩna sus we'we:

—Txãa piçthẽ'ja's ikhteçxáa ewna. Peena yu' ítxi fxi'zemeena jĩ'tx.

²³ Txã'wẽ sus we'wena, txãawe'sx atxhtxi ěete wãatahna kiwe's paçxçxa txã'wẽy yu-uteçxáa, ²⁴ komadante' Pablo's kuartel yatte ka'ga'khaahçxa peçxuukwekaakh, txã'wẽ yũuna khaawãsxijçxak pẽjxya'wa yu' kĩh yũupa'ga nasa' txã'wẽ wala ũusaçxana ahçetewa jiyuya'. ²⁵ Nawa tuduçpkaçxha', Pablo' na'wẽk we'we kpiitana's:

—I'kwe'sxa' romano nasa's peçxujkwete ¿ewmanx? kĩh yuuwetewa jiyumey.

²⁶ Txã'wẽ we'wete', kpiitana' na'wẽk pta'sxya' u'j komadante's:

—Na'wẽ yũuni's mpa'yajkx. Txã'wẽme', naa piçthẽ'ja' romano nasa' jĩte', ²⁷ komadante' Pablo tasxte utxaaçxa pẽjxku:

—Isa idxa' ¿romano nasa dxihgá'? jĩna. Aça' Pablo pasçxa':

—Txã'wẽ íith jĩk.

²⁸ Txajũ' komadante we'weçxa':

—Adxa' wala vxyu dukhçxaçxáa romano nasa yuuna pa'th jĩte', Pablo pasçxa':

—Adxa' upxhíi txãa yã'th yu' jĩk.

²⁹ Txajũ' Pablo's peçxuukwewa'jsa' kuçx yu-umée nvxihttxi. Aça' komadante yuhwa txã'wẽ romano nasatewa jiyuçxa', wala ũukhku txã'wẽ tudpa'ga.

Judiu nthẽ'jsawe'sx tasxte Pablo's txaahni we'wekahn

³⁰ Judiuwe'sxa' kĩh yũupa'gane'ta Pablo's açe' nawa txã'sna jiyu wẽeçxa, kuskuskhẽ' komadante' jxkaakh sacerdote npiiçthẽ'jwe'sx vxite' judiu nthẽ'jsawe'sx jxukaysatx pkhaakhekahn. Txã'wẽ yũuçxak kadenatx khibçxa txãawe'sx tasxte txah Pablo's.

23

¹ Pablo' sacerdote npiiçthẽ'jwe'sx vxite' judiu nthẽ'jsawe'sx pkhaakhesatx thegçxa', na'wẽk we'we:

—Yakhthẽ'jwe'sx, adxa' açxpkaçx Dvus dxi'pte jxpubath sũhwa'j yu'sa' ji'phmeeth jĩte',
² sacerdote npiiçthẽ'j Ananiasa' Pablo yuwega petxa kaakh pukate ih ũssatx. ³ Aça' Pablo' na'wẽk we'we:

—Åateçxáa ew we'weçxa' ũuste yu' ewmée yaakxpaga idxa's Dvus kastigaína. Idxa' ley jxkaahniçxá's kxtey yuusath ¿sũju'gá'? Txã'wẽçxa' ¿kĩjxa'ga adxa's petxakaja'? Leya' txã'wẽ jxkaaja'çme' jĩte', ⁴ kxte ũssa' na'wẽtx we'we:

—Dvusna selpisáa sacerdote npiiçthẽ'ja's txã'wẽ wẽesxuwa'j ji'phmeeg jĩte', ⁵ Pablo' pasçxa':

—Dxusna selpisáa sacerdote npiiçthē'jna sūju'çme'ntka. Jiiwaça', txã'wē paswa'jmeene'tka yu'. Txã'wē yuukahmeniik Dxus librutewa na'wē pta'sxi': Iidx çxhabte jxkaahsa's juuna' we'wenu jĩ'k naa pa'ga.

⁶ Txajū' kxte pkhaakhesawe'sxa' saduceo vxite' fxariseowe'sx txãawe'sxtewa jiyuçxa', Pablo' na'wēk sus we'we:

—Yakhthē'jwe'sx, adxa' fxariseo ji'j, fxariseo iñçxáath. Uusaawe'sxa' ki' itxĩ yuuwa'jsa yuhta' sūhna yaakxsath. Txãa pa'ga yuuçxáa adxa's ewmeesa' jĩna ũsta'.

⁷ Txã'wē we'wete', fxariseo vxite' saduceowe'sx yakh txãawe'sx pwe'sx juuna' we'weçxa puutx txuteetx. ⁸ (Saduceowe'sxa' uusaawe'sxa' ki' itxi yuutxna sūju'çmeeta', sa' uute' nasaa ũus vxite' angeleswe'sx txã'wēsa ũstxna sūju'çwameeta', naapkaçxha' fxariseowe'sxa' txã'wēsa jxuka ũstxna sūju'tx, txãasatx puutx txutee.) ⁹ Txã'wē yūuçxa txãawe'sx pwe'sx wala sustxi ũusçxa we'wena. Aça' fxariseowe'sx ju'gusa ley kaapiya'jsawe'sx maaii yu' kiiteçxa na'wētx we'we:

—Naa piçthē'ja' ewmée yūusame'. Meeçxa' Dxus angel wá' yu', meeçxa' uusáa ũus wá' txã'wē vxyaa, nawa jiiimeeçxa' kuçx we'wemeeyuga. Txã'wēme', jiiimeeçxa' Dxusa's wáa açewe'wesa yu'nja'w jĩ'tx.

¹⁰ Seena' ũusaçxana suste', komadante' Pablo's ikhewáatxna sūhna ũukhçxa soldautx yuukaahçxa, Pablo's kutxi'khaakh pkhaakhesa ksxavxyu kuartel yatnay jxūna u'khan.

¹¹ Txãa kuste', Jesukristo' Pablo's vxyaaçxa na'wêk we'we:

—Pablo, ùukhnu. Ay Jerusالente na'wêg we'we adxna pta'sxna, txã'wêy we'wewa'j ji'phgu Romatewa jĩk.

Pablo's ikhya' puutx we'weni

¹² Kuskuskhê' judiuwe'sx maaíi yu' Pablo's ikh wêesa na'wêtx puutx we'we: Pablo's ikhmeeçxa yu' kĩh yuhwa ù'me'nja'w jĩna. ¹³ Txã'wê Pablo's ikhmeeçxa yu' kĩh yuhwa ù'ya'mée puutx we'wesa' kuarenta piçthê'j jxthaakwetx yu'. ¹⁴ Txã'wê yũuwa'ja's puutx we'weçxatx u'j sacerdote npiiçthê'j vxite' judiu nthê'jsawe'sx tasxna na'jĩna pta'sxya':

—Kwe'sxa' Pablo's ikhmeeçxa yu' kĩh yuhwa ù'me'nja'w jĩnatha'w puutx we'we Dxus dxi'pte. ¹⁵ Aça' açxha' i'kwe'sx nthê'jsawe'sx jxuka pkhaakheçxa mpêjxwe komadante's: Kuskusa' Pablo's mkaah kwe'sx tasxte, txajx yuwe's jwee ew paapêjx ya'watha'w jĩna. Naapkaçxha' kwe'sxa' ayte pa'jmeyna ikhya' dxi'the yupu'nja'w jĩ'tx.

¹⁶ Txã'wê puutx we'weçte Pablo npe'sx nçxi'k jiyuçxa', Pablo's pta'sxya' u'kh kuartel yatna. ¹⁷ Aça' Pablo' jiyuçxa', teeçx kpiitana's pa'yaçxa na'wêk we'we:

—Naa luuçxa's meen pe'jna me'j komadante tasxna, txãa yakh puutx we'wewa'j ji'pha' jĩte', ¹⁸ kpiitana' luuçxa's pe'jçxa komadante tasxte kũhçxa pta'sxku:

—Karcelte ùssa Pablo' adxa's pa'yaçxa naa luuçxa's pe'jna kaakh, ayte idx yakh puutx

we'wewa'j ji'pha' jīte', ¹⁹ komadante' luuçxa's kusete pu'kisna u'jçxa paaçte pějxku:

—¿Kĩnga we'we wēje'? jīte', ²⁰ luuçxa' pta'sxku:

—Judiuwe'sxa' na'wētx puutx we'we: Kuskusa' idxa's pēyi'nja'w Pablo's kaakhan, judiu nthē'jsawe'sx tasxna yuuwe's jwee ew pějxya'watha'w jīçxa. ²¹ Nawa txā'wē dxihna sūhçxa Pablo's kaahmeene'ga. Txā'wēme', piçthē'j kuarenta jxthaakwesa Pablo's ikhmeeçxa yu' kīh yuhwa ũ'me'nja'w jīna Dvus dxi'pte puutx we'weçxa dxi'the yupna ũsta'. Sa' idx ma'jītewa txā'sçxáan ũyhasna ũsta' jīte', ²² komadante' luuçxa's na'jīna we'weçxak kaah:

—Komadante's pta'sxthu jīna kim yuhnawa pta'sxmeene'ga jīçxa.

Ne'jwe'sx Fxelix tasxte Pablo's kaahni

²³ Txajū' komadante' e'z kpiitantxi pa'yaçxa Cesarea çxhabna u'jya' pheu'khaakh. Doscientos soldau çxidaçxáa u'jwetxna, jibatewe'sx setenta, vxite' lansa ji'phsa doscientos, sa' ayjxu kase-jetxna kus las nwewete. ²⁴ Sa' txā'wēy Pablo a'jwa'j jibawa pheu'khaakh, ne'jwe'sx Fxelix tasxte ikhmée ew dukhahn. ²⁵ Txāawe'sx yakh karta kaakh na'wē fxi'jçxa:

²⁶ Klaudio Lisias fxi'jaçthu ne'jwe'sx Fxelixa's weçxana. ²⁷ Naa piçthē'ja's judiuwe'sxa' karcelte txahçxa ikhya'watx yu'. Nawa romano nasatewa jiyuçxa', adxa' soldau yakh u'jçxa nwe'weth. ²⁸ ¿Kĩh yūupa'gaki'tx txā'wē açe'? sūhçxa jxūna u'th judiuwe'sx nthē'jsawe'sx tasxna. ²⁹ Aça' txāawe'sx ley pa'gaçxáata txā'wē açe', nawa

ikhya' yu' âjawa'jmeek yu' sa' karcelte txa-
jxa'wa âjawa'jme'. ³⁰ Nawa Pablo's ikhya'
yuuçxáa jîna puutx we'weçxa yupna ũsta' jîni's
jiyuth. Txâasa iidx tasxte kajaçthu. Pablo's
açesatxwa we'weth kîh yûupa'gane'kwe açe'
nawa ne'jwe'sx tasxte u'jçxa puutx we'wene'kwe
jîth. Txã'wëçxáath idxa's pta'sxi' jînak fxi'j.

³¹ Txajû' soldauwe'sxtxi txã'wë jxkaajxã'the',
Pablo's pe'jna'wa kusçxáa u'jtx Antípatris
çxhabna. ³² Kuskuskhë' soldau çxidaçxáa
u'jsa' ki' sxawedtxi kuartel yatna, naapkaçxha'
jibatewe'sxa' u'jtx Pablo yakh. ³³ Cesarea
çxhabte pa'jçxa', karta's ũsna'wa Pablonawa
dukhtxi ne'jwe'sxa's. ³⁴ Txajû' ne'jwe'sxa' karta's
lëeyçxa' pëjxku Pablo's: ¿Majûwe'sxga? jîna.
Sa' Ciliciajûwe'sxtewa jiyuçxa', ³⁵ na'wëk we'we:
—Iidx yuuwe's jiyu'nja idxna açesawe'sx
pãatxhî'khya' pa'the jîk.

Txajû' Pablo's Herodes txaahni yatte kxu-
uphku thegwa'jsa txahçxa.

24

Pablo ma'wësaçxawa Felix tasxte we'weni

¹ Tahç ente' sacerdote npiiçthë'j Ananiasa'
pa'kh Cesarea çxhabte judiu nthë'jsawe'sx
yã'jçxa, sa' teeçx yuwee pu'çxsa Tértulo
yaasesa'sku pe'jçxa pa'j. Txãawe'sxa'
utxaatx ne'jwe'sx tasxte Pablo' ewmeesa' jîna
pãatxhî'khya'. ² Txajû' Pablo's nuykûhte',
Tértulo' Fxelixa's pta'sxku:

—Weçx u'pu'ga, ne'jwe'sx. Iidx jxkaahnite,
mteewa wët fxi'zena ũstha'w. ³ Mteewa

txã'wêçxaçxáa wēt fxi'zena ũstha'w, Fxelix idx txã'wē ew yūupa'ga. Txãasatha'w wala weçxá'. ⁴ Nawa idxa's jwee yu' en kaavx-itu'jya'wameeth, dudte meen mwēese'j kwe'sx we'weni's. ⁵ Naa piçthē'ja' iiméh seena' ewmeesatewa kwe'sxa' kpajkxtha'w. Maa kiwe-suwa jxuka judiuwe'sxtxi txuhdena puii kiisna ũsa'. Sa' txãái Nasarethuwe'sxa's nwēese'jsa npiiçthē'ja'. ⁶ Dxuus yatte yuhwa nasa pkalsatx ka'ga'jya'wak yu' kazx vxitna. Txãa pa'ga kwe'sxa' tudtha'w, kwe'sx ley ma'wē jxkaathe' kxtey yuuya'. ⁷ Nawa komadante Lisias kwe'sx yakh ja'da wala juuna' kühçxa kusa'kh, ⁸ sa' açesawe'sxa' ne'jwe'sx tasxte pãatxhí'khyá' u'jwetxna jīnak jxkaah. Kwe'sx we'weni' ĩsxiinimée jxuka isatewa jiyuya' idx yuu mpējx naa piçthē'ja's jīnak we'we.

⁹ Txajū' judiuwe'sx kxte ih ũssawa txã' jxuka isasa yuja' jīna we'wete', ¹⁰ ne'jwe'sxa' kuseju pta'sxku Pablo's we'wekahn. Aça' Pablo' na'wēk we'we:

—Adxa' jiith idxa' wala kuh anxu yã'j kwe'sx kiwete jxkaahna ũsgu. Txãa pa'ga adxa' iidx dxi'pte ũukhmée pasya'wath adx ma'wēsaçxawa. ¹¹ Idx yuu mpaapējx txãawe'sx we'weni' isa dxihtewa jiyuya'. Dxusa's Jerusalente neewe'weya' adx pa'jni doce ençxáa yuuça'. ¹² Adxa' txãa doce ensu' dxuus yatte nasatx kaapui'jna judiuwe'sx pkhaakheni yat-su çxhabte msuu yuhwa txã'wē yūuna ũsu'çmeeth. ¹³ Aça' ewmée yūunisa' naata' jīna āate kaavxya'ja'jya' yu' kim yuhwa ājameetxna naa nasa'. ¹⁴ Nawa āateth pta'sxi' Dxus

tasxte pa'jwa'j dxi'ja's ãçxh u'se kaajiyu'jnisa' ãxiinisa' jĩ'tx txã'snath nwẽese'je' kwe'sx yaçgawe'sxtxi jxpe'jsa Dxusa's selpiina. Sa' txã'wẽ Dxus jxkaahni leyte fxi'jni vxite' Dxus yuwe pta'sxsawe'sx fxi'jnitx jxukath kxtey nwẽese'je'. ¹⁵ Txãawe'sxwa ma'wẽne'ta Dxusa's nwẽese'jna yaaki' txã'wẽyçxáath adxwa nwẽese'jna yaaki'. Uusaawe'sxa' ki' ãtxi yuutxna ewsa ma'tx yuu meeçxa' ewmeesa ma'tx yuu nawa ja'daçxah sũhnath yaaki'. ¹⁶ Txãasath Dxus dxi'pte vxite' piçthẽ'jwe'sx dxi'ptewa yuuwemée fxi'zewa'ja's pa'pçxu'.

¹⁷ Adxa' vxite kiwesu maz anxu pekũhna u'juçxa', adx kiwen u'th judiuwe'sxtxi vxyu peesya' kaahnitx dukhna Dxus ofxreda'swa ũsya'. ¹⁸ Adxa' txã'wẽ yũuna ley jxkaahni'swa ki'sna jxã'jçxa dxuus yatte ũspkaçxha', judiuwe'sx Asia kiwejuwe'sx pa'jçxa dxuus yatte uytxi. Nawa nasatx kĩh yuhwa kaapui'jna ũsu'çmeeth. ¹⁹ Txã'wẽ uysaawe'sx ayte pãatxhĩ'khy'a' yuuwa'j ji'phta', adx ewmée yũuna ũstewa uyçxa'. ²⁰ Meeçxa' komadante pkhakhte judiu nthẽ'jsawe'sx vxite' sacerdote npiiçthẽ'jwe'sx kxte ũssa i'kwe'sxçxáawa adx ewmée yũuni's uywá'kwe na' mpeeta'sxwe. ²¹ Adxa' kxte ũsçxa', Uusaawe'sxa' ki' ãtxi yuutxna jĩnaçxáath we'we txã'sna wá'kwe ewméek yuu sũju'kx jĩk.

²² Fxelixa's ew yã'kh pta'sxni yu', txãasak txã'wẽçxáa wẽse'jçxaçxáa:

—Komadante Lisias pa'the, txãa yuwe's pheu'ju'nja jĩçxa nvxiht.

²³ Txajũ' Fxelixa' kpiitana's jxkaakh:

—Pablo's txhweetenu. Nawa jwee jxthaakwe juuna' yūumée miipe'j, sa' txajx namikuwe'sx yakh puutx we'wewa'ja'swa mes jĩk.

²⁴ Maz en skhēwniite', Fxelixa' txajx nyu Drusila yakh ki' kūhçxa Pablo's pa'ya kaakh, Jesukristo pta'sxni's we'wekahn. Txāa u'ya' judiuk yu'. ²⁵ Aça' Pablo' pta'sxku Dxus dxi'pte ew fxi'zewa'ja', sa' peekx kakwe's ewmée yūuna jxpe'jwa'jme'. Txā'wēme', nmeh ente' Dxusa' kastigaĩna jĩna we'wete', Fxelixa' wala ũukhçxa na'wēk we'we:

—Açxhĩ yu' txā'wēçxāa mpeeta'sx. Vxite ente adx en ji'phuçxa ki' pa'ya'nja jĩk.

²⁶ Pablo' vxyu dukhe'nja txhwetekahn jĩwáana sũhçxak txā'wē maz uswa pa'ya Fxelixa' txāa yakh puutx we'weya'. ²⁷ Txā'wē e'z anxup-kaçx Pablo's karcelte jxpe'jna ũsçxaçxāa Fxelixa' ne'jwe'sx kasejk, aça' vxite ne'jwe'sx Porcio Fxestok u'ka. Nawa Fxelixa' judiuwe'sx yaaçeni fxi'ze wēemeeçxa, Pablo's karcelte nvxihtku.

25

Pablo' Fxesto tasxte we'weni

¹ Txajũ' Fxesto' Cesarea çxhabte ne'jwe'sx u'kaçxa', tekh ente' Jerusalenna u'kh.

² Kxte' sacerdote npiiçthē'jwe'sx vxite' judiu jxtuhthesawe'sxa' utxaatx Pablo' ewmeesa' jĩna pāatxhĩ'khya'.

³ Sa' Pablo's pe'jya' mkaah Jerusalenna yuukahn jĩnatx pējx. Txāawe'sx yu' dxi'the ikhya' sũhçxatx txā'wē pējx. ⁴ Nawa Fxesto pasçxa':

—Pablo' Cesareate preesu ũsa'. Aça' maz enteçxáa adxa' txãa çxhabnaíi u'jweçthu. ⁵ Txãasath na'jĩ': Txãa piçthê'j ewmée yũuni's pãatxhĩ'khwa'j ji'phçxa', i'kwe'sx jxtuhthesawe'sxa' adx yakh yuwetxna Cesarea çxhabna jĩk.

⁶ Fxesto' Jerusalente oçxo en jxthaakwe ũsçxaçxáa ki' sxawedku Cesarea çxhabna. Sa' kuskuskhê' yuwe paapěyni yatte u'kaçxa kaçxna'wa, Pablo's yuukaakh. ⁷ Sa' kũjuçpkaçxha', judiuwe'sx Jerusalenuh pa'jsawa utxaatx kĩhtewa seena' ewmeesa' jĩna pãatxhĩ'khna. Nawa isasa yuja' jĩna áate kaavxya'ja'jya' yu' ájameeta'. ⁸ Txajũ' Pablo' na'wêk pas:

—Adxa' kĩhte yuhwa yuuwemeeth. Judiuwe'sx ley, Dxus yatna, Romate jxkaahsa Cesar maate yuhwa yuuwemeeth jĩte', ⁹ Fxesto' judiuwe'sx yakh ewte neeyũu wêeçxa na'wêk pějx Pablo's:

—¿Jerusalenna u'jwêega' iidx yuwe's kxte pheu'khan? jĩte', ¹⁰ Pablo pasçxa':

—Adx yuwe's pheu'jwa'jsa tasxte yã'j ũsthu, Cesar ki'pni iidx tasxte. Adxa' judiuwe'sx yakh kĩhte yuhwa yuuwemeetewa idxa' ew jiiçg. ¹¹ Meeçxa' adx uuwa'the áhwáane'tka yu-uwe yuu aça' txã'wête yu' uuwa'ja's wa'lme'nja. Nawa pãatxhĩ'khnisa kĩh yuhwa isameete yu', kim yuhwa pãatxhĩ'khsa kusete adxa's dukhya' ájameena. Wejxwa Cesar paapěyni wejx ewna jĩte', ¹² Fxesto' vxite npiiçthê'jwe'sx yakh puutx we'weçxa', na'wêk pta'sx Pablo's:

—Cesar paapěyni wejx ewna jĩ'g na' txajx tasxte pa'j u'jwene'ga jĩk.

¹³ Txajũ' maz en skhẽwniite', jxkaahsa Agripa vxite' Berenice yakh Cesarea çxhabte pa'jtx Fxesto's weçxaya'. ¹⁴ Kxte kuh entxi ũsu', aça' Fxesto' jxkaahsa's pta'sxku Pablo yuwe's:

—Ayte teeçx piçthẽ'j preesu ũsa', Fxelix nvxiitni. ¹⁵ Adx Jerusalente ũste', sacerdote npiiçthẽ'jwe'sx vxite' judiu nthẽ'jsawe'sx pãatxhĩ'khtxi txãa piçthẽ'ja's ewmeete nvxiitkahn. ¹⁶ Aça' adxa' pta'sxthu: Romanowe'sx leya' maa yuhnawa ikh kaja'çme', pãatxhĩ'khsa yuuwesa yakh kaapdx'i'pu'jçxa kim yuuwetewa jiyumey yu'. ¹⁷ Txajii adxa' jxthẽeyuumée pãatxhĩ'khsawe'sx pa'jaçpkaçxha', kuskuskhẽ' yuwe paapẽyni yatte u'kana'wa txãa piçthẽ'ja's yuukaath. ¹⁸ Sa' ¿kĩh yũupa'ga yuuwekx? sũhna ũythasnath u'pu', nawa pãatxhĩ'khya' utxasaawe'sxa' ma'wẽ yuhwa ewmeete nvxihtya' ajawa'jmeesaçxáanatx we'we. ¹⁹ Txãa piçthẽ'ja's açasawe'sxa' txãawe'sx Dxusa's neewe'wena fxi'zeni vxite' teeçx piçthẽ'j Jesus yaasesa uuçxawa ki' itxi yuuk jĩna Pablo pta'sxni'sçxáatx we'we. ²⁰ Txãa yuwe's adxa' ma'wẽ pheu'jya'wa ajameeçxa', Pablo's pẽjxthu: ¿Jerusalenna u'j wẽega' kxte iidx yuwe's pheu'khan? jĩna. ²¹ Nawa txãa we'weçxa': Cesar paapẽyni wejx ewna jĩk, aça' txã'wẽ yã'the', aytee preesu ũsune'ga Cesar tasxte adx kaahpkaçx jĩnath we'we.

²² Txajũ' Agripa' na'wẽk we'we Fxesto's:

—Txã'wẽyã'the', wẽse'je'nja txãa piçthẽ'j we'weni's jĩte', Fxesto pasçxa':

—Kuskusii wēse'jene'ga jīk.

²³ Kuskuskhē' jxkaahsa Agripa vxite' Berenice vxite' soldau npiīçthē'jwe'sx vxite' çxhabte jx-tuhthesa txāawe'sx yakh seena' zhiçxkwe susna u'kana kūhtx Fxesto u'pnite. Naapkaçxa' Pablo's yuu kaahçxa', ²⁴ Fxesto' na'wēk we'we:

—Jxkaahsa Agripa vxite' ayte pkhaakhena kwe'sx yakh ūssawe'sx ksxavxyte txajaçthu naa piçthē'ja's. Judiuwe'sx maazkuēsawa naa piçthē'ja's açewe'we'tx Jerusalente vxite' aytewa, sa' ikhteçxáa ewna jīna nestxi yu'. ²⁵ Nawa txā'wē ikhkahnwa kīhtewa yuuwe-meena'k thegu'. Nawa txāaiik Cesar paapēyni wejx ewna jī'. Aça' txajx tasxna kaja'nja sūju'th. ²⁶ Nawa kīhte yuuwetewa txā'sna pta'sxna jxkaahsa's fxi'jwa'j yu' uymeeth. Txāasa āçxa' jxkaahsa Agripa iidx tasxte txajaçthu, vxite' jxukaysa dxi'pte, aça' idx paapējçxa kīhte yuuwetewa kpajkçxa pta'sxte adxa' eça's fxi'jçxa kaja'nja. ²⁷ Txā'wēme', kxulna'k thegu' preesu kaahçxawa yuuwe yuuni's pta'sxmeete '.

26

Pablo' txajx yuwe's jxkaahsa Agripa's pta'sxni

¹ Txajū' Agripa' na'wēk Pablo's we'we:

—Idx kīh yūuna fxi'zeçxawa mpeeta'sx jīte', Pablo' kuse's kiisçxa na'wēk pta'sx:

² —Judiuwe'sxa' adxa's ewmeesa' jīnatx pāatxhī'khe' txā'sa' jxkaahsa Agripa iidx dxi'pte āate pta'sxwa'ja's ji'phuçxa' wala weçxa'th.

³ Idxa' jxuka ew jiig kwe'sx judiu ji'j fxi'zeni vxite'

na'wě fxiyfxiyçxah yajkxçxa puutx we'we'tha'w txã'sna. Txãasa wejx wa'lmée mwěese'j.

Kristo's jxpa'gamey Pablo fxi'zeni

⁴ Adx le'çxkuējũjx ma'wěne'tka fxi'ze adx kiwete vxite' Jerusalente txã'sa' judiuwe'sx jxukaysa jiita'. ⁵ Fxariseowe'sxa' seena' juuna' jxkaaja'tx Dxus leya's jxuka kxtey yuukahn adxa' txãatewe'sxthu yu' piçtakxtey, aça' txãawe'sxa' jiita' na' txã'sa' pta'sxya' ãjatxna wa'lmeeçxa yu'. ⁶ Dxusa' kwe'sx yaçgawe'sx yakh puutx we'weçxa uusaawe'sxtxi ki' itxĩ vxitya' neeyũuk txã'sa' kxtey yuuna sũhnath fxi'ze', naa pa'ga yuuçxáatx paapějxya' ayte nuypa'j. ⁷ Jxkaahsa Agripa mjiyu: Israelwe'sx docesate jĩj jxukaysatx ki' itxi yuuwa'ja's ũythasu', txãasatx een isa petx kus Dxusa's selpi'. Txã'wě yũuwa'ja's ũythaspa'ga yuuçxáatx judiuwe'sx adxa's ewmeesa' jĩçxa açe'. ⁸ Dxusa' txã'wě uusaawe'sxtxi itxi vxituna ¿sũju'çmeekwe' wakx i'kwe'sxwa?

Dxus yakh fxi'zesatx pkxuuni's pta'sxni

⁹ Adxa' nyafxíia' Jesus Nasarethuwe'sxa's ahçeçxa kĩhwa yu'nja sũhçxa, ¹⁰ Jerusalente sacerdote npiičthě'jwe'sx jxkaathe', Jesus kaapiya'jni's nwěese'jsawe'sx maazkuēesatxwa karcelte txahth. Sa' ikheçte uyçxa', ew yuh yuuçta' sũhnath fxi'ze'. ¹¹ Maazkuēe uswa iipkxuuth, Jesus yase's açewe'wekahn. Msuuwa judiuwe'sx pkhaakheni yat-su txã'wěçxaçxáath yuu. Sa' seena' pxũuskwe yuute', vxite kiwesuwa u'th, txã'wěy ahçeçxa pkxuuya'.

*Pablo' Dzus yakh fxi'zeyá' utxani's ki' pta'sxni
(Hch 9.1-19; 22.6-16)*

¹² Txã'wě yūuya' sūhçxa, Damasko dxi'j u'jweçthu yu', sacerdote npiiçthě'jwe'sx kaahni. ¹³ Nawa jxkaahsa mwēese'j: dxi'the u'jweçte ēepxāh yuuçpkaçxa', sekte jxthaakwe eena'sa ēejū kweethku adx vxite' pi'kxna yuusaa jxukaysatx. ¹⁴ Txajū' jxukaysa wetetha'w, naapkaçxa' adxa' wēse'th hebreo yuweju na'wě we'weni's: Saulo, Saulo, ¿kījxa'ga adxa's ahçeçxa pkxuuya' pakwé'? Idxa' peekiçxáa ya'kpā'yuuwa'ja's pakwena ũsgu jīte', ¹⁵ pějxthu: ¿Idxa' kinga? jīte', pta'sxku: Adxa' Jesusthu, idx na'wě ahçeçxa pkxuuya' pakwe'g txāath. ¹⁶ Nawa açxha' mkiite. Açxh na'wě vxyaath sa' vxite entewa vxya'nja, açá' txã'wěk vxya jīna mteewa pta'sxya' u'jwene'ga adxna selpiina. ¹⁷ Idxa's nwe'we'nja judiuwe'sx kuseju, sa' judiu jījmée vxite nasa kiwesu kajaçthu kxsūwa nwe'we'nja. ¹⁸ Txãawe'sx tasxsu kajaçthu, açá' idxa' txãawe'sx yafxtxi phaadene'ga, peena yu' çxhi'dxte fxi'zemée eena'sa's uykahn, sa' eçxthě'j kusete fxi'zemée Dzus yakh fxi'zekahn. Adxa's jxpa'gasa' txãawe'sx pkaltxi peltunāyni neeyūuçxa cielute ũswa'ja's jxpa'gatxna Dzus txhitxhnisawe'sx yakh ja'daçxah jīk adxa's.

*Pablo's Kristo vxyaaçxa jxkaahni's kxtey
nwēese'jni*

¹⁹ Agripa, idxa'sthu pta'sxi': Txã'wě vxyaaçxa we'weni's wa'lmée kxtey nwēese'jçxa
²⁰ Damaskote ũssawe'sx khuē'ytxi pta'sxthu

Dxus yuwe's, e'su' Jerusalente, vxite' Judea kiwesu jxuka. Sa' judiu ji'jmée vxite nasatxwa pi'kxthu, pkaltxi nvxihtçxa Dxusa's pakweçxa ew yūuna mfxi'zewe jīna. ²¹ Txā'wē yūupa'gatx judiuwe'sxa' dxuus yatte adxa's tudçxa ikh wēe. ²² Nawa Dxus pu'çxte', āçxpkaçx Dxus yuwe's le'çxkwe yuhwa jxpubameeth pta'sxna fxi'ze' jxtuhthesa ma'tx yuu ma'wēsatsxwa jxukaysatx. Sa' Dxus yuwe pta'sxsawe'sx vxite' Moises pta'sxni txāaju bagaçxte yuhwa fxiiy yu' pta'sxi'çmeeth. ²³ Txāawe'sxa' na'wētx pta'sx: Dxus tasxuh yuusa Kristo' wala pxthaa yuuçxa uuçxawa ki' txāa khuē'y itxī yuuna, sa' eena'te fxi'zewa'ja's pta'sxina kwe'sx ji'jtx txā'wēy vxite kiweju nasatxwa jīnatx pta'sx. Txā'wēyçxáath adxwa pta'sxi'.

Pablo' Agripa's Kristo tasxte kuutxa'ja'jdxijk

²⁴ Pablo txā'wē we'wete', Fxesto' na'jīnak sus we'we:

—Pablo, luuku yuunig. Jwee wala piyaçxane'ga txā'wē luuku yuu jīte', ²⁵ Pablo pasçxa':

—Ne'jwe'sx Fxesto idxa' mjiiyu: Adxa' luukumeeçxa íith ũus yajkxçxa jxpubamée isasaçxáana pta'sxi'. ²⁶ Txāa yuwe's jxkaahsa Agripa ayte u'pa' txāawa ew jiia'. Txāa pa'gath adxa' thaamemée pta'sxi' txajx dxi'pte. Naa yuwe' paaçte sūthçxa we'wenisame'. Txāa pa'ga jxkaahsawa txāa yuwe's ew jiina sūju'th. ²⁷ ¿Dxus yuwe pta'sxsawe'sx we'weni's ew jiiyuhmeegá' wakx, jxkaahsa Agripa? Idxa' jiiyuhne'ga sūju'th jīte', ²⁸ Agripa' na'wēk we'we:

—Adxa's Kristo ju'gu vxit-ya' le'çxkuëeg pejii jite', ²⁹ Pablo we'weçxa':

—Le'çxkuëe ma'k pejii meeçxa' wala ma'k pejii nawa idxçxáamée, ayte açxh wëse'jna ũsta' txãawe'sx jxukaysatxku Kristo ju'gu yuu jxthãasu' Dxusa', adxwa ma'wëtka Kristo ju'gu yuu txã'wëy, nawa kadenaju tudnimée.

³⁰ Pablo txã'wë we'wete', jxukaysa kiitetx, jxkaahsa, ne'jwe'sx, Berenice kxte ih pa'jsa jxuka.

³¹ Sa' fxiiix txuteena u'j, na'jĩna puutx we'weya' txãawe'sx pwe'sx:

—Naa piçthē'ja' kīh yuhwa yuuwemeesa' ikhkahn yuuwa. Sa' karcelteçxáa yuhwa ũswa'j ji'phme' jĩçxa', ³² Agripa' na'wëk we'we Fxesto's:

—Txã'wë txãái Cesar paapēyni wejx ewna jĩmeewaça', naa piçthē'ja's txhweteya' ewna jĩk.

27

Pablo's Roma çxhabna kaahni

¹ Italia kiwen kwe'sxtxi kaajxa' puutx we'weyã'jçxa', Pablo vxite preesu yã'jçxa dukhtxi Batalxón Augusto yaasesate kpiitan Julio kusete. ² Txajũ' Adramitio çxhabte barko Asia kiwen u'jsate khēetha'w, aça' Aristarkowa yuwe'k, Macedonia kiwete Tesalónika çxhabtewe'sx. ³ Kuskuskhē' Sidón çxhabte pa'tha'w. Aça' kpiitan Julio' Pablo's namiku yat-suk pa'jya' kaah txãawe'sx sã'jĩkahn. Txãa kpiitana' Pablo yakh wala ewsa yu'k, txãasak txã'wë yũu. ⁴ Sidón çxhabuh kasehçxa', Çxipre kiwe's jebu ju'gutha'w nvxihtna khēw, wejxa yuppa'ga. ⁵ Txajũ' Cilicia Panfxilia

kiwesu utxa skhēwna u'jçxa, Lisia kiwete Mira çxhabettha'w pa'j.

⁶ Kxtea' soldau kpiitana' teeçx barko Alejadia-juwe'sx Italia kiwen u'jsa'sku uy. Sa' kwe'sxtxi kxtek kaateka'j txajũ ki' u'jya'. ⁷ Nawa txã'wē wejxa yupna ũste', wala kuh en tuudkuēçxah u'jçxa, wala thēy pa'tha'w Gnido çxhab dxi'pte. Txajũ u'jçxa', Salmon kiwee dxi'psutha'w skhēw, Kreta kiwesu ta'guna. ⁸ Sa' txãa kiwe pukasu wala thēy u'jçxa, teeçx ahte pa'tha'w Bwenos Pwertos yaasesate. Txã' Lasea çxhab utxatek neeyũ'.

⁹ Txã'wē thēy u'jçxa wala en ivxiitpa'ga, nus pa'jwa'j en utxaak ikhte u'jwa'j seena' ũukhũukhsa. Txãa pa'gak Pablo' yu'kxpeh ¹⁰ na'jĩna:

—Jxukaysa mwēese'jwe, kwe'sx u'jwa'ja' wala ũukhũukha'. Barko petx karga vxituna, aça' kwe'sxwa uuwa'ja's ji'phuwá'nja'w.

¹¹ Txã'jĩtewa, soldau kpiitana' Pablo's nwēese'jmée barko namu vxite' barko thegsawe'sx we'weniçxá'sku nwēese'j. ¹² Kxte çxhaba' nus ente ũswa'j ewmeek yu'. Txãa pa'gatx jxukaysa u'jya' yajkx Kreta kiwete Fxenice çxhabte pa'jçxa nus ena's kxte yu'skhēwya' sũhçxa, Fxenice çxhabte' nus ente ũswa'j ũukhũukh meek yu' naa pa'ga.

Mar pxãhte wejxaa wala kiiteni

¹³ Bwenos Pwertos yaasesajũ kasejeçte yu', wejkuēçxáak wejxana ũsu', aça' Fxenice çxhabte pa'jya' ājawá'nja'w sũhçxa u'jtx Kreta kiwe pukasu tuudkuēçxah. ¹⁴ Nawa

wejkuē u'jweçpkaçxa', wejxaa wala kwe'sx u'jwa'j dxi'puh sēhçxa barko's yupku. ¹⁵ Sa' txajüyã'ja' ma'wēwa jxūna u'kh. Aça' barko's kaajxa' ājameeyã'jçxa', kuçx yuumeetha'w wejxa ma'wēwa jxūna u'khan. ¹⁶ İkh pxãhte kiwe le'çxkuēsa Klauda yaasesa e'ssutha'w skhēw, kxsūa' wejxa txakwe çxhãçxhameek ūs yu'. Aça' barko le'çxkuē jxūçxa u'jnisa's wala thēyçxáawa kaateka'jya' ājãtha'w barko walate. ¹⁷ Txajū' barko wala's lasu walaju pxãjūjx tudtha'w suweekahmen. Sa' txitx wala Sirte yaasesate wáa waçuya' u'jwena sūhna ūukhçxa, ēete tela wala's spajkxtxi wejxa ma'wēwa barko's jxūna u'khan. ¹⁸ Txã'wē wejxa seena' çxhãçxha ūste', kuskuskhē' karga's ĩkhkhē pūsxya' takhtxi. ¹⁹ Aça' tekh en yuuçte', kwe'sxíwa ĩkhkhē pūsxya' pu'çxtha'w barko ēseekahn. ²⁰ Txã'wē wejxa seena' yuuna ūste', sek, estrelxa, kīh yuhwa vxyaameeta' maazkuēe enwa. Aça' kwe'sx yuuwa ĩtxĩ yuume'nja'w sūhwa'ja'sçxáatha'w ji'phu'.

²¹ Txã'wē maazkuēe en kīh yuhwa ũ'mée yuhna ūssatx Pablo' na'wēk we'we:

—I'kwe'sxa' adx we'weni's nwēese'jçxa Kreta kiwejū kasehmeewaça', na'wē nxus knayna ivxiituwa'jmeene'tka'w yu'. ²² Nawa açxha' ūukhnuwe. Ayte u'jsa kim yuhwa uumeetxna, makwe barko yu' suweeçxa vxitutewa. ²³ Adxa' Dxusna selpisaath, aça' açxh kus Dxus angel vxyaaçxa ²⁴ na'wēk we'we: Pablo, ūukhnu. Idxa' Romate jxkaahsa tasxte utxaawa'j ji'phgu, aça' txãa pa'ga Dxusa' nwe'weya'wa' ay barkote u'jsa

jxukaysatx jĭk. ²⁵ Txāa pa'ga i'kwe'sxa' ũukhmée çxhāçxha miiyajkwē. Adxa' Dxusçxáanath yaaki', angel we'weni' kxtey yuuna sūhna. ²⁶ Sa' ĭkh pxāhte kiwe le'çxkuēsate nvxiitni yu'nja'w jĭk Pablo'.

²⁷ Adria ĭkhthe wejxa jxūna u'jni e'z ki'su ājaçte', txāa kuspāh yuuçpkaçxha', barkote thegsawe'sxa' kiwe utxasu u'jweççxatx jiyu. ²⁸ Sa' makhwe ĭkh dxiitewa jiyuya' isatx, aça' treinta y seis metroçxáak dxii yu'. Txajū' yaç yaçte u'jçxa ki' isatx, aça' kxtea' weintisiete metroçxáak dxii yu'. ²⁹ Txajū' penxate wáa iika'nja'w sūhna ũukhçxa, barko's neewewa'jsa pahz çam walatx ĭkhkhē akh barko e'skhē, wejxa jxūna u'khamen. Sa' wala ũukhna ũythastxi khijxpkçaçx. ³⁰ Naapkaçxha' barkote thegsawe'sxa' barko yaçkhē vxite çam walatx ĭkhkhē akheçtha'w jĭnaçxáa barko le'çxkuēs ĭkhkhē spaakiçtxi yu', txāate khēeçxa kasehna u'j wēeçxa. ³¹ Nawa Pablo' pta'sxku soldau kpiitan vxite' soldauwe'sxtxi:

—Naawe'sxa' barkojū kasehna u'the', i'kwe'sxa' ĭtxi yuumeene'kwe jĭte', ³² soldauwe'sxa' barko le'çxkuē tudni lasutx spē'thçxa ĭkhkhē wāatahtx barko le'çxkuēs.

³³ Txajū' Pablo' kusítey neewe'wek jxukaysatx kĭhçxáawa ũ'kahn:

—I'kwe'sx dehmée txā'wēy ũ'wamée ũsni e'z ki'su yā'j yuuça'. ³⁴ Aça' i'kwe'sxtxi neewe'we'th kĭhçxáawa ũ'kahn. Txā'wēme', kasejxa' ya'çxhāçxhameena. Açxha' ũukhnuwe. I'kwe'sx maa yuhwa vxitumeene'kwe.

³⁵ Txã'jĩna'wa, Pablo' jxukaysa dxi'pte Dxusa's weçxaçxa pana's ũ'k. ³⁶ Txajũ' jxukaysa wejx ũukhmée txãawe'sxwa ũ'tx. ³⁷ Barkote u'jsa jxukaçxah yu' doscientos setenta y seis nasatha'w yu'. ³⁸ Kĩh ũ' wēeçxawa txã'sna ũ'na jxã'jçxa', skuutxha's ĩkhkhě pūsxtha'w barko jweeĩçxáa ěseekahn.

Barko ĩkh dxiikhě khěeni

³⁹ Khijxna jxã'jnite', barkote thegsawe'sxa' jiyumeeta' maa kiwete pa'jçxawa. Nawa ĩkh pukasu kiwe ukwesa u'pte uyçxa', kxte nuypa'jya' ajãwá'nja'w sũhçxa kxtetx u'jya' yajkx. ⁴⁰ Sa' çam wala ĩkh dxiikhě akhnisa lasutx spě'thna'wa, tela's ěete ki' kiisçxa, barko's tudkuẽçxah jxũna u'jtx ukwete pa'jya'. ⁴¹ Nawa teeçx ahte ĩkh jwee yu' dxiimeete yu' seena' çxhãçxha ukapajxna ũsu'k kxtek kũjxa' u'j barko'. Aça' barko ĩçha' kiwete waçuna kũhte', ma'wě yuhwa ěseme', naapkaçxha' barko e'su yu'tũçxhasáa ujkana kũhçxa jxuka suwuuçku yu'. ⁴² Txã'wě yuuçte', soldauwe'sxa' preesutx jxuka ikhya'watx yu', pehdna kasehçxa iyuwe'sxte. ⁴³ Nawa soldau kpiitana' Pablo's nwe'weya' yajkxku, sa' kiikhe'jmeeçxa na'wěk jxkaah:

—Maawa pehdxa' jiisa' i'kwe'sx khuẽ'y yaçte me'jwe, ⁴⁴ naapkaçxha' vxite' taplasu mkhēewe, meeçxawa barko pe'lasu txã'wě yũuçxa mkaase-hwe jĩte', txã'wě yũuçxa jxukay kiwete pa'tha'w uumée.

28

Malta kiwete Pablowe'sx pa'jni

¹ Kxte jxukaysa uumée pa'jçxatha'w jiyu txãa ìkh pxãhte kiwe' Maltaga yaase yu'. ² Kxte u'psa nasa' kwe'sxtxi wa'lmée jxpa'gaçxa, ipx wala yuthçxa kwe'sxtxi bajçxya' pi'kxtxi, nus txã'wě wala pa'jna ũspa'ga. ³ Txajũ' Pablo' e'kx uhdx pkhakhçxa, ipxte àsxiçku yu', naapkaçxha' txãa ipx pxãjũ ul weeswee ũphna kasehçxa Pablo kusetek wa'kx. ⁴ Txã'wě Pablo kusetek ul wa'kxte', kxte ũssa' na'wětx we'we txãawe'sx pwe'sx:

—Naa piçthě'ja' nasa ikhsana. Makwe ìkhthe yu' uumeetewa, Dxusa' ìtxi u'ju jxthãasmeene' jĩ'tx. ⁵ Aça' Pablo' kuse's yahtaçxa ula's ipxkhě akhku, nawa txajx kuse yu' kĩhwa yuume'. ⁶ Aça' nasa thegna ũssa yu' ¿Ma'wěn uukx? sũhna jxukaysa ũyhasnatx ũsu'. Nawa kĩhwa yuumeyna wala txaçx yuute':

—Pablo' nasa ikhsamée wejxwa Dxusna jĩ'tx.

⁷ Txãa kiwete teeçx ne'jwe'sx jxtuhthesa u'pu'k Publio yaasesa. Txajx uthasx ja'datetka'w pa'j kwe'sxa', aça' txãa piçthě'ja' kwe'sxtxi wala ew jxpe'kh tekx enpkaçx. ⁸ Txãa ensu' Publio neya' ãça'naga ũsu' kakwesekte eeçxãa uçxi'çxçxa. Aça' Pablo' thegya' u'jçxa, peekizeçxa Dxus yakh puutx we'wete', çxhãçxhak. ⁹ Txajũ' txãa kiwete vxite ãça'sawe'sxwa pa'jçxa', jxuka katxhiçxatx neeyũ. ¹⁰ Txajũ' kwe'sxtxi wala peeygãhçxa kĩjkĩhwa dxi'the peejini's jxukatx pees, barkote khěeçxa ki' u'jya wagaçxha'.

Roma çxhabte Pablo pa'jni

11 Malta kiwete tekh a'te ũsçxaçxáa, Alejadría kiwejuwe'sx barko kxte ũsu'k nus pīpkaçx txãate khēeçxatha'w u'j. Txãa barko' yaçte e'z dxus ĩtximeesatxku piisani ji'phu', Kastor vxite' Polux yase ji'phsa. 12 Txajũ kasehçxa', Sirakusa çxhabte pa'jçxa, tekh entha'w ũsu'. 13 Txajũ ki' u'tha'w kiwe pukagaçxaçxáa, sa' Regio çxhabtetha'w pa'j. Kuskuskhē' e'su wejxa sēhte', thēymée u'jya' ājaçxa e'z enkhē' Puteoli çxhabte pa'tha'w. 14 Kxtea' puutx uytha'w yakthē'jwe'sxtxi, aça' txãawe'sxa' pi'kxtxi txãawe'sx yatte teeçx ki'su ũskahn. Txajũ kasehçxatha'w Roma çxhabna u'j. 15 Romate yakthē'jwe'sxa' kwe'sx yuhtewa jii yā'tha yu', sa' teeçx ahte Tres Tabernas yaasesa utxate teeçx çxhab ũsu'k Fxoro de Apio kxteta pu'thegya' yuwé'. Aça' Pablo' txãawe'sxtxi uyçxa', Dxusa's wala weçxana ũuste wēt wētku yajkx.

16 Romate pa'jna'wa, soldau kpiitana' vxite preesutxi' dukhku kxte karcelte thegsa npiiçthē'ja's, nawa Pablo yu'sa' vxite yatte fxiik txah teeçx soldau thegwa'jsa txahçxa.

Roma çxhabte pa'jçxa Dxus yuwe's pta'sxni

17 Kxte pa'jni tekh en skhēwniite', Pablo' pa'ya kaakh kxte Romate judiu npiiçthē'jwe'sxtxi. Sa' pkhaakhetē', na'wēk we'we:

—Adxa' kīhwa ewmée yu' yūumeeth judiwe'sxtxi, sa' kwe'sx yaçgawe'sx kaapiya'jni'swa ahçena fxi'zeçmeeth. Makwe txã'wētewa, Jerusálente adxa's tudçxa romanowe'sxtxi dukhtxi. 18 Aça' romanowe'sxa' paapējxtxi, nawa ewmée yūuni's yu' uymeeçxa',

adxa's txhweete wēetx ikhwa'the nvxiht-ya' yu' ājameeçxa. ¹⁹ Txã'wētewa, judiuwe'sx yu' kaatxhwete'jmeeta'. Aça' txã'wē yã'the', adxa' romanowe'sxtxi jxkaahsa Cesara'sthu pi'kx adx yuwe's paapēykahn. Nawa judiuwe'sx adxna preesu'jsa yuutxi' pãatxhî'khya'wameeth. ²⁰ Txãasath i'kwe'sxtxi pa'ya txã'jîna pta'sxya'. Israelwe'sxa' ūythasu'tha'w Dxus tasxuh yuusa Kristo's txãa pa'ga yuuçxáa adxa' na'wē kadenaju tudni ūsthu.

²¹ Txã'wē pta'sxte', na'wēt x we'we:

—Judeajũ idxna nuywe'wena kaahni karta kîhwa iijxpa'gameetha'w kwe'sxa', txajũ judiuwe'sx pa'jçxawa pta'sxiçmeeta' idxa's açewe'weni yu'sa'. ²² Açxh u'se pta'sxni's mteewa jxukatx açewe'we', aça' txã'sa' idxa' ¿maa sũju'ga? Iidx yaakxni's jiyu wēetha'w jîçxa', ²³ vxite ente ki' pa'jya' neeyũuçxa txãa en âhte', wala kuh pkhaakheçxa pa'jtx Pablo ūsni yatte. Aça' Pablo' kusîi pta'sxçxa kusna kîhpkaçxku pta'sx Dxus jxkaahwa'ja's. Sa' Moises fxi'jni ley vxite' Dxus yuwe pta'sxsa txãniiteywe'sx fxi'jni ma'wēçxahne'ta Jesusa's we'wena fxi'j txã'snak âate kaajiyu'j. ²⁴ Aça' maai' yu' Pablo pta'sxni's wa'lmeetx jxpa'ga, nawa vxite yu' wa'ltxi. ²⁵ Txã'wē maai' yu' nwēese'j wēemeeçxa txuteena u'jweçte', Pablo' na'wēk txãawe'sxtxi we'we:

—Dxus yuwe pta'sxsa Isaiasa's Dxus Espiritu kwe'we'the', isa yuh na'jîna pta'sxne' kwe'sx yaçgawe'sxtxi':

²⁶ U'jçxa txãa nasatxi' na'jîna mpeeta'sx: I'kwe'sxa' wēse'jçxawa, jiyumeene'kwe.

Meeçxa' uyuwá'kwe, nawa jiyumeene'kwe.

²⁷ Txãa pa'gatey txãawe'sx ũuste jiyuwa'j yu'sa' ji'phméé yã'tha',

Sa' wëse'jya'wa wa'lu'tx.

Txãawe'sx yafxa' aphanita', uymeeçxa' nwëese'jmeetxna.

Sa' ũustewa ew jiyumeetxna.

Sa' adx tasxtewa utxameetxna pkaltxi pel-tunãykahn jĩnak we'we.

²⁸ I'kwe'sxa' mjiyuwe: Æçxhũyã'ja' Dxus ewte nvxiitwa'ja's judiu ji'jmée vxite nasaçxáatx pta'sxwa'ja', açá' txãawe'sxa' nwëese'jetxna.

²⁹ Txã'wë Pablo we'wete', judiuwe'sxa' txãawe'sx pwe'sx wala kuh jwed we'wena u'jtx.

³⁰ Pablo' e'z anxu utak yat pki'jçxa txaahni ũsu', sa' kxte thegya' pa'jsatx jxukaysatxku jxpa'ga'. ³¹ Kxtea' kim yuhwa kuçx yuuniméek fxi'ze' Dxus jxkaahwa'j ena's pta'sxna, txã'wëy Jesukristo kaapiya'jni'swa ãatek pta'sxna fxi'ze'.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd